

НАРНИЯНЫҢ БИЖИЛГЕЛЕРИ

The Lion The Witch And The Wardrobe
Copyright© CS Lewis Pte Ltd 1950
Inside illustrations by Pauline Baynes
copyright©CS Lewis Pte Ltd 1950

Tuvan language edition

www.narnia.com

Лев, колдунья и платяной шкаф

К.С. Льюис

На тувинском языке

Тыва дылчэ очулга: Н. Ш. Куулар

Редакторлар: В. Войнов, А. Кужугет

© CS Lewis Pte Ltd, 1950
© Н. Ш. Куулар очулга, 2009

НАРНИЯНЫЦ
БИЖИЛГЕЛЕРИ

Бирги ном:

**АРЗЫЛАН, АК ҚАДАЙ
БОЛГАШ
ХЕП ШКАВЫ**

Клайв Льюис


РО ЕХБ «Посох»
Новосибирск
2009

Лүүси Барфилдиге тураскааткан

Мээн эргим Лүүсим!

Бо номну мен сенээ дээш бижидим, ынчалза-даа ону бижип эгелеп тура, бичии уруглар номнарның хевирлет-тингеринден дүрген өзөр дээрзин чөрле эки билбээним-не шын боор. Ынчангаш сен ам тоолдар номчуур хире эвес улгады берген-дир сен, а кажан номну парлааш, цндүрүп каарга, оон-даа улуг атаар-дыр сен. Ындыг-даа болза, кажан-бир шагда сен катап база тоолдар сонуургат эгелээр назыга чеде бээр сен. Ынчан сен бо номну полкадан аял, доозундан арыглат, ол дугайтында цүнц бодап турарынны менээ чугаалал берил шыдаар сен. Мен-даа ол өйдө сени дыннаар хире эвес дүлэйлеп каар база сээн, сөстериңни билир хире эвес ушпа кырган атаар боор мен. Ынчалза-даа сеткилим ханызындан сенээ ынак бооп артарымга бүзүрттим,

Клайв Льюис.



I

ЛҮҮСИНИЦ ХЕП ШКАВЫНЧЕ БАҚЫЛААНЫ

ЧЫРЫК ЧЕРГЕ ДӨРТ ООЛ-КЫС ЧУРТТАП ЧОРААН, оларның аттарын Питер, Сүүзен, Эдмунд болгаш Лүүси дээр турган чүве-дир. Бо номда, дайын үезинде агаар халдаашкыннарындан когаравазын дээш, оларны Лондон хоорайдан өскээр аппарган турда, олар-бile чүү болганын бижип турар. Уругларны Англияның бир көдээ булуунуга, эн чоок почтадан чээрби километр хире ырак черге чурттаап турган бир кырган профессорже чорудупкан чүве-дир. Профессор кажан-даа кадай ап көрбээн кижи болган, ол аажок улуг-делгем бажыңга Макриди деп аттыг ажыл-агый эргелекчизи хөрээжен-бile кады чурттаап турган. (Айви, Маргарет болгаш Бетти дээр үш хөдөл кыс база бар турган, ындыг-даа болза, оларның бистиң төөгүүске киржилгези барык-ла чок). Профессор болза өгбөгөр буурул баштыг, арнын долдур үнген сырый ак салдыг ирей чүве-дир. Удавайн уруглар ацаа ынак апарган, ынчалза-даа оон оларны уткуур дээш кол

эжикче үнүп келгени ужурашкан кежээзинде профессор оларга дыка-ла элдептиг кылдыр көзүлген ийик. Лүүси (эн бичиизи ол) харын-даа оон элэн корга берген, а Эдмунд (оон улуу ол) каткызын арай деп тудуп шыдаан — синмирген кижи бооп баажыланыр ужурга таварышкан.

Кажан уруглар ол баштайгы кежээ профессорга тамчыктыг удуурун күзеп кааш, үстүнде удуур өрээлдерже үнүп келгендө, оолдар кызыжактарның өрээлинчэ хүннү бадыр көрген чүүлдериниң дугайында шуугажыр дээш кире берген.

— Бөгүн биске шынап-ла аажок айлашты! — деп, Питер чугаалаан. — Манаа магалыг эки чурттаар боор бис! Күзээн бүгү чувевисти кылып шыдаптар бис. Бо ирэй бисти хай дээри-бile чаңгыс-даа сөс чугаалавас боор.

— Ол-даа кайгамчык эки хире кырган-дыр — деп, Сүүзен чугаалаан.

— Ыыттава! — деп, Эдмунд үзе кирген. Оол бичии-даа могаваан хевир көргүзүп турза-даа, шылай бергени маргыш чок болган, а могап-шылаанды, ажынчак апаар кижи чүве-дир. — Ынча диве сен!

— Чүүже? — деп, Сүүзен айтырган. — Сээн черле удуур үең келген-дир.

— Сагыжында ава кижи апардың бе? — деп, Эдмунд чугаалаан. — Менээ чүве айтыр хире кым сен сен? Бодун харын барып удуу.

— Бис шупту чыдып алзывыssa эки — деп, Лүүси чугаалаан. — Бисти улус дыңнап кагза, ат кылдыртыр бис.

— Ажырбас — деп, Питер харылаан. — Бо бажында бистиң чүнү кылып турарыбысты хайгаарал көөр кижи-даа чок-тур. Оон кадында бисти кым дыңнап карыл. Моон тура чөмненир өрээлгэ чедир янзы-бүрү чадалар, коридорлар дамчыштыр эвээш дээргэ-ле он минута хире кылаштаар чер-дир.

— Бо чүү ындыг шиммэнил? — деп, хенертэн Лүүси айтырган. Ол мынчага чедир мындыг улуг бажыңга чурттаваан болгаш, ээн өрээлдерже ажыттынып турар хөй-ле эжиктерлиг узун төнмес коридор дугайында бодап кээргэ, анаа дүвүренчиг апарган.

— Мелегейни сени-даа, анаа күш ышкажыл — деп, Эдмунд харылаан.

— Үгү-дүр-ле — деп, Питер немеп каан. — Мында янзы-бүрү күштар энме-хаяажок болур ужурлуг. Че, мен-даа удууйн

дээш. Дыңнацарам, даарта хайгылдал көөр бис бе? Мындыг чөрлерден кижи чүнү-даа тып алтар деп бил. Бээр кел чыдырывыста, дагларны көрдүнер бе? А арга-эзимни? Чугаажок, мында эзирлер бар боор, ивилер база! А хартыгалар ылап-ла турар деп билиндер.

- Морзуктар база — деп, Лүүси чугаалаан.
- Дилгилер база — деп, Эдмунд улаштырган.
- Тоолайлар база — деп, Сүүзен немеп каан.

Үнчалза-даа даартазында эртэн көөрлерге, аажок суггур чыс чаап, соңгадан хараарга, даглар-даа, арга-даа, оон туржук сесерликтө дамырак суг-даа көзүлбес болган.

— Билдингир херек-тири, чыс чокка туруп боор бе! — деп, Эдмунд чугаалаан.

Уруглар мырынай чаа профессор-бile кады эртенги чемин чип алгаш, оон оларга ойнаар кылдыр аңгылап бергени үстүкү өрээлчө көдүрлү бергеннер. Ол өрээл узун, чавыс, бир ханада ийи, а дужааш ханада ийи соңгалыг болган.

— Химиренмейн көр, Эд — деп, Сүүзен чугаалаан. — Чүү-даа дээш маргыжып боор мен — бир шак болгаш, аязы бээр. А амдызында мында приемник-даа, хөй номнаар-даа бар-дыр. Багай эвес-тири.

— Бо-даа меңээ таарышпас херек-тири — деп, Питер чугаалаан. — Мен бажың иштин хайгылдал көрүпкеш кээйн.

Арткан уруглар шупту чөпшээршкен. Оларның ужууралдары шак ынчаар эгелээн. Бажың дыка улуг болган — оон ужукуйдыры билдинмес ышкаш сагындырган — ында эц кайгамчык булуунарның хөйүн чүү дээр! Эгезинде уругларның ажыткан эжиктери, ындыг болур ужурлуг-даа дег, аалчылар удуур ээн өрээлдерже кирие берип турган. А үр болбаанда, олар дайынчы дериг-херекселдерлиг, чуруктар азып каан аажок узун өрээлгэ келген, а оон соонда ногаан көжегелерлиг өрээл турган, оон бир булуунунда арфа деп хөгжүм херексели турарын олар көрген. Оон соонда уруглар үш тепкииш куду баткаш, оон беш тепкииш өрү көдүрүлгеш, балконче үнер эжиктиг улуг эвес залга келген; залдың ындында шупту ханаларын дургаар номнарлыг шкафтар тургузуул каан шуушкак өрээлдер көзүлгэн, ол номнаар аар, аажок эрги номнаар болган.

А оон уруглар улуг хеп шкавы турган өрээлчө кирип келген. Силер, чугаажок, ындыг көрүнчүк эжиктерлиг хеп шкафтарын

көрген боор силер. Өрээлде шкафтан өске чүү-даа чок болган, чүгле соңганың адаккы эргининде кадып калган көк сээж чыткан.

— Куруг-дур! — деп, Питер чугаалаарга, олар шупту өрээлден шууштур үне берген, чүгле Лүүси артып калган. Ол шкаф эжийн хаап каапкан деп бүзүрезе-даа, ону ажыдарын шенээр деп бодал алган. А эжик чииги-бile ажыттына бээрge, уруг кайгап калган, оон оортан борбак ийи нафталин* кээп дүшкен.

Лүүси шкаф иштинчे бакылап көөрге, элээн каш узун алгы тон азып каан турган. А ол бо делегейге алгы суйбаарынга эц ынак уруг турган чүве-дир. Дораан-на шкафче киргеш, арнын алгыга өгөп-ле эгелээн, а эжийн ажык арттырып каан болбайн канчаар — бодун боду шкафка хаап аары дег мелегей чорук турбас дээрзин ол билир-ле болгай. Лүүси ханыладыр киргеш, тоннарның бирги одуруунуң артында ийги одуруг база барын көрүп каан. Шкафта каранғы боорга, думчуун оон артыкы ханазынга үзүп аарындан сезингеш, холдарын бурунгаар сунупкан. Уруг бир базым кылган, оон база, оон база... Салааларының ужу-бile ыяш ханажыгашка кажан-на даянырын манаарга-даа, салаалар куруг чер суйбаарынга өйлешкен.

«Коргунчуг улуг шкаф-тири аа! — деп боданып, Лүүси чымчак тоннарны чайлады идип, ыңдай бар-ла чыткан. Үнчан оон будунун адаанда бир-ле чүве кыйыраан. — Бо чүү деп чүвел? — деп ол боданган. — База бир борбак нафталин бе?»

Лүүси доңгайгаш, суйбанып эгелээн. Оргу-дески ыяш шала орнуунга оон холу бир-ле чымчак, тоглаачал болгаш аажок соок чүвеге дегген.

— Элдептиин аа! — деп чугаалааш, ол бурунгаар ийи базым кылган.

Ол дораан уруг оон арны болгаш холдары алгының чымчак сыйыглары эвес, а бир-ле кадыг, эрбенниг, харын-даа тенниг чүвеге үзүп турарын ожаап билип каан.

— Үяш будуктары-даа дег! — деп, Лүүси алгыра каапкан. Үнчан ол мурнунда, ынчалза-даа шкаф ханазы турар хире черде эвес, а дыка ыракта чырыкты эскерип каан. Кырындан бир-ле чымчак, соок чүве бадып турган. Ол-ла дораан уруг аргада турарын, буттарының адаанда хар чыдарын, а дүнеки дээрден харның кодан-майыктап чаап турарын көрүп каан.

* Нафталин — үзүт-хөвагандан камгалал кылдыр ажыглаар бүдүмел.

Лұғси коргуксай берген, ынчалза-даа сонуургалы коргуушкундан күштүг болган. Ол хая көрнүп келген: артында ыяштарның кара уннарының аразында шкафтың ажық әжиси болгаш ону өттүр ооң бәэр үнүп келгени өрәэл көстүп турган (Лұғси әжикти өжегәэр ажық арттырып қаанын утпаан боор силер). Ында, шкаф артында, хұндусқу үе хевәэр болган. «Бир эвес херек дедирлени берзе, қажан-даа болза әәп кәәп шыдаар мен» деп бодангаш, Лұғси бурунгаар шимчеп үнүпкен. Ооң буттарының адаанда хар қыйырап чыткан. Он минута хире болгаш, ол чырыктың үнүп тураганда черинге чеде берген. Уругнун мурнунда... фонарь азып қаан адагаш турган. Лұғси карактарын хере көргүләэн. Чүге арга ортузунда адагаш тураган чоор? Ол ам чүнү қанчаар ужурулугул? Ынчан уруг оожум шығыраан базымнар даажындыңнап қаан. Базымнар чоокшулап келген. Каш секунда эрткен соонда, ыяштар артындан аажок әлдептиг амытан көстүп кәәп, фонарь чырынынче киир туруп алган.



Амытан Лұғсиден бичии-ле бедик дүрт-сынның болган, ол бажының кырында хардан агара берген холмайтыны тудуп чораан. Ооң магабодунуң үстүкү талазы кишинии дег, а қылагар кара дүк-бile шыптынган буттары өшкүнүү дег, адаанда дуюгларлыг болган. Амытан кудуруктүг база болган, ынчалза-даа Лұғси ону баштай эскербәэн, чүге дәэрge демгизи кудурууун, харга сөөрттүнмезин дәэш, хол-майтыны туткан холун ажыр салып алган чораан. Мойнун долгандыр кызылзымаар кежинге өннеш кылын кызыл моюн-ораарлыг. Ол болза әлдептиг, ынчалза-даа аажок аянның арынның, чолдак, сүүр салдыг, бажының дүгү дыдыраш амытан болган. Хавааның ийи талазында дүктер аразында мыйысчыгаштар көзүлген. Ол амытан бир холунда, дем-не чугаалааным дег, хол-майтыны, а өске холунда чуга саазында ораап қаан эләэн каш саазын хап тудуп алгаш чораан. Саазын хаптар, чагган хар — амытан Чaa чылдың белектери-бile садыгдан чанып кел чыдар дег сагындырган. Ол

болза кижи-хуна болган. Лұғсина көрүп қааш, маңаваанындан ол сырбаш дәэн. Саазын хаптар шуптуу черже кәәп дүшкен.

— Ачам бажы! — деп, кижи-хуна алгырыпкан.



II

ЛҮҮСИ ОЛ ЧЕРДЕН ЧҮНҮ ТҮП АЛГАНЫЛ

— ЭКИИ — ДЕП, ЛҮҮСИ МЕНДИЛЭЭН.

А кижи-хуна бодунуң халтaryн чыyp, аажок чай чок олурган, ынчангаш мендиге харыы бербээн. Халтaryн төндүр чыyp алгаш, ол Лүүсиге мөгейип каан.

— Экиивенер — деп, кижи-хуна чугаалаан. — Өршээнер... Хөлүн эрттир сонуургак болуксавайн тур мен... ындыг-даа болза, часпаан-на болзумза, сiler Еваның бир кызы* сiler бе?

— Мени Лүүси дээр — деп, уруг, кижи-хунаның чүнү элдээртиг турарын эки билбейн, харылаан.

— А сiler... мени өршээнер аа... чүү дээр ийик мон... кыс уруг сiler бе? — деп, кижи-хуна айтырбышаан.

* Еваның кызы — христиан чүдүлгениң ыдыктыг ному Библиядада Ева болза баштайгы хөрээжен кижи болур, ынчангай кижи-хунаның Лүүсиге: «Кыс кижи сiler бе?» — деп турары ол.

— Үинчанмайын канчаар, кыс уруг мен — деп, Лүүси харылаарынга өйлешкен.

— Үндиг болза, сiler кижи амытан сiler бе?

— Үинчанмайын канчаар, кижи амытан мен — деп, Лүүси кайгал харылаан.

— Үндиг болбааже — деп, кижи-хуна чугаалаан. — Мээндээ мелегей деп чүвемни! Үндиг-даа болза, мен Адамның оглу азы Еваның кызынга — кижи амытанга чөрле таваржып көрбээн мен. Магадап тур мен. Өскээр чугаалаарга... — Үинчан ол, чугаалаап болбас ужурлуг чүвени билбейн өчүүтер часкаш, өй-шаандада сактып келген дег, ыыттавайн барган. — Өөрүү магадап тур мен! — деп, ол катаптаан. — Таныжарын чөпшээреп көрүнцөр. Мени Тамнус дээр ийин.

— Сiler-бile таныжып аары меңээ өөрүнчүг-дүр, Тамнус акый — деп, Лүүси чугаалаан.

— Билип аарын чөпшээреп көрүнцөр, о, Лүүси, Еваның кызы, сiler Нарнияга канчап чедип келдицөр?

— Нарнияга? Ол чүү деп чүвел? — деп, Лүүси айтырган.

— Нарния дээрge бо чурт-тур — деп, кижи-хуна харылаан. — Бис ам ында тур бис. Фонарьлыг адагаш биле чөөн далай эриинде кончуг улуг Кэр-Паравел шивээниң аразында чаттылган девискээрлиг чурт. А сiler... барыын чүкте ээн аргазимнерден келдицөр бе?

— Мен... ээн өрээлдэх хеп шкавын өттүр чедип келдим...

— Ах — деп, Тамнус муңгаргай чугаалаан, — бир эвес мен бичиимде географияны эки өөрөнгөн болзумза, чугаажок, ол билдинмес чурттарны билир турар ийик мен. Ам орайтаан-дыр.

— А ол дээрge чурттар эвес-тир — деп, Лүүси каткызын тудуп чадай-чадай чугаалаан. — Ол моон каш базым чөрдебети-ле дээргэ... ой, билбес мен. Ам ында чай дүшкен.

— Үинчарга мында, Нарнияда, кыш-тыр — деп, Тамнус чугаалаан. — Кыш шуут төнмөстээш туруп берди. Бир эвес мацаа, хар кырынга, чугаалажып туруп бээр болзуувусса, ийилээн соокка алзыптар бис. Хөвшье Кавы дээр чырыткылыг хоорайында мөнгө чай хааннап турар Ээ Нөрээл дээр ырак чурттан келген Еваның кызы, сiler мээзиинчэ кире дүжүп, аяк шайдан мээн-бile кады ишпес сiler бе?

— Улуу-бile четтирдим, Тамнус акый — деп, Лүүси чугаалаан. — Үинчалза-даа чанар өйүм келген боор.

— Мен моон ийи базым черде чурттап турар мен — деп, кижи-хуна чугаалаан. — Мәэниинде чыллы аажок... камин-одаамда от хып турар... быжырып каан хлеб бар... балык болгаш хуужуур бар.

— Силер дыка-ла ээлдек-тир сипер — деп, Лүүси чугаалаан. — Ыңчалза-даа үр саадап шыдавас мен.

— Менден четтинип алган болзуңарза аа, Еваның кызы — деп, Тамнус чугаалаан. — Мен ынчан хол-майтынын ийилдиривикин кырынга тудуп аар мен. Бәэр углут баар бис. Че, чоруптаалы.

Лүүси кижи-хуна-бile бүгү назынында таныш чораанды дег, оон четтинипкеш, аргада оруктап кады базып чорупкан.

Удавайн оларның буттарының адаанда орук дески эвес апарып, ында-мында улуг даштар кожайтылап турган; чорумалдар бирде тейже үнүп, бирде тейден бадып туруп берген. Улуг эвес чоога дұвұнғе Тамнус, хая өттүр эрте бәэр дәэн дег, хенеретен кыдырынчे эзпкен, ыңчалзажок хаяга чыпшыр чеде бергеш, Лүүси көөрге, куй аксында турғаннар. Олар ынаар кирип кәэрге, уруг караан шийипкен — камин-одагда ыяштар ындыг чайынналдыр хып чыткан. Тамнус эәккеш, аштап каан кыскаш-бile оттүг кезектi алгаш, чырыткыны кыпсыпкан.

— Че, ам үр болбас — дәеш, ол доп-дораан отче хөнек салып каан.

Лүүси ол хире сагышка тааржыр черни мынчага чедир көрүп көрбәэн. Олар бичежек, арыг, кургаг, кызылзымаар өңнүг даш ханаларлыг күйда турган. Шалада хевис чадып каан, ийи чымчак сандай («Бирәзи мәэни-дир, өскези әжимни-дир» — деп, Тамнус чугаалаан), стол болгаш комод турган,



камин-одаг кырында ак салдыг кырган кижи-хунаның чуруун азып каан болган. Булунда әжик көзүлген («Тамнус ақыйнын удуур өрәэлинчे болап кирер боор» деп Лүүси бодаан), оон чанында номнарлыг полка турган. Тамнус столчес аыш-чем салып турар аразында, Лүүси номнар аттарын номчутулапкан:

«Силенниң амыдыралы болгаш чагаалары»,

«Сүг әэлери болгаш оларның ёзу-чаңчылдары»,
«Нептеренгей тоолчурғу чугааларның шинчилели», «Кижи дәэрge бурун-чугаа бе?»

— Чемненип көрүңер, Еваның кызы — деп, Тамнус чалаан.

Столда чок-ла чүве чок болган! Кайызынга-даа бирәэ-бириә кылдыр чымчадыр хайындырып каан чуургалар, быжырган хлеб, балыкчыгаштар, үс-саржаг, ары чигири, кылайтыр чигирлеп каан хуужуур.

Лүүси хырын быжыбы-бile чемненип аарга, кижи-хуна уругга аргада амыдырал дугайында чугаалаан: күдүктарда чурттап турар сүг әэлери кыстарның база ыяштарда чурттап турар ыяш әэлери кыстарның кижи-хуналар-бile танцылаар дәеш үнүп кәэри дүн ортузунун танцы-самының дугайында; сүт дег Ак Ивини (а ону тудуп ап шыданптар болзуңза, ол сәэн күзәэн-не чүвеңни күүседип бәэр) аңнарының дугайында; чыкпак гномнар-бile кады ханы күйларга найыр-дойлар болгаш әртине-байлак диләш-киннериниң дугайында база арганың ногаарара бәэри чай дугайында.

— Чүгле ам бисте үргүлчү кыш турар апарды — деп, ол муңгаргай немеп каан.

Омакшыр дәеш кижи-хуна комодта чыткан хаптан тараа саваңындан кылган дег көстүр әлдептиг бичии лимби ужулгаш, этсип ойнап әгеләэн. Лүүси чаңгыс угда каттырыксап, ыглаксап,



танцылаксап база удуксай берген. Ол миннип келгеш, мынча дигижеге чедир чаңғыс эвес шак эрткен болган:

— Ах, дээрги Тамнус... силерни үзе кирери меңээ дыкала эпчок-тур... бо алга менээ тааржыр-даа-дыр... ынчалза-даа, шыны херек, чанар үем келди. Мен чүгле каш минутада кирип келген болгай мен.

— Ам ол дугайында чугаалаары орайтаан-дыр — деп, лимбизин салып, бажын мунгаргай чайбышаан, кижи-хуна ыыттаан.

— Орайтаан че? — деп, Лұүси катап айтыргаш, тура халаан. Аңаа коргунчуг апарған. — Силер ооң-бile чүү дээр деп бодадынар? Мен доп-дораан чанар ужурулуг мен. Ында хамык улус дүвүреп тур боор. — Оон ол дораан айтырган: — Тамнус акый! Канчап бардыңар?

Чүге дээрге кижи-хунаның сарғыл карактарын чаштар дола берген, карак чаштары ооң чаактарын куду чуглуп, думчуунун ужуундан дамдылап бадып турган, адак соонда ол арнын холдары-бile дуй туткаш, ишкирнип ыглай берген.

— Тамнус! Тамнус акый! — деп, аажок хөңнү баксырап, Лұүси кыйтырган. — Соксанар, ыглавайын көрүнөр! Чүү болуп тур? Баксырап тур силер бе? Тамнус акый, чугаалаңарам: бо канчап бардыңар?

А кижи-хуна, ооң чүрээ чарлыр чазып турган дег, иш-кирнип ыглап туруп берген. Лұүси аңаа чедип келгеш, куспактааш, аңаа бодунуң думчук аржылын бээрge безин, демгизи оожургаваан. Кижи-хуна чүгле аржыылчыгашты ап алгаш, думчуу биле карактарын чодуп, чуга пөс хөлүн эрттири өде бээрge-ле, ону иийи холу-бile шалаже сы тудуп турган, ынчангаш үр-даа болбайн, Лұүси төгүлген суг сүзүп эгеләэн.

— Тамнус акый! — деп, Лұүси кижи-хунаның мырыңай кулаанче дыңзыдыр алгырып, ону силгигилепкен. — Соксан көрүнөрөм. Доп-дораан соксанар. Мындыг улуг кижи-хуна эртирип, ыятпас силер бе! Чүге, чогум чүге ыглап тур силер ынчаш?



— А-а-а! — деп, Тамнус өөледир ыглаан. — Багым кончуг кижи-хуна болгаш, ыглап тур мен.

— А мен силерни багай кижи-хуна кылдыр бодавадым — деп, Лұүси чугаалаан. — Силер, мен бодаарымга, кончуг эки кижи-хуна-дыр силер. Мээн ужурашканым эң онза, эки кижи-хуна-дыр силер.

— Аа, билир турган болзуңарза, черле ынча дивес ийик силер — деп, ишкирнип ыглавышаан, Тамнус харыылаан. — Чок, мен аажок багай кижи-хуна мен. Чырык чер кырынга ындыг багай кижи-хуна туруп-даа көрбээн.

— А силер чүнү үүлгедип кагдынар? — деп, Лұүси айтырган.

— Мээн ачам... камин-одаг кырында чурук оонуу-дур... ол болза кажан-даа ынчанмас ийик.

— Чүнү ынчанмас? — деп, Лұүси айтырган.

— Мен ышкаш — деп, кижи-хуна харыылаан. — Ак Кадайга бараан болуп турар — мээн үүлгеткен чүүлүм ол-дур. Мен Ак Кадайдан төлевирип турар мен.

— Ак Кадайдан? А ол кымыл?

— Ол бе? Бүгү Нарнияны бүрүн чагырып алган тергиидекчи-дир. Оон уржуу-бile бисте ам мөңгө кыш дүшкен. Мөңгө кыш бар, а Чая чыл болгаш час чок-ла чок. Чүгле бодап көрүнөр даан!

— Халаптыг-дыр! — деп, Лұүси чугаалаан. — А силерге ол чүү дээш төлөп турарыл?

— Эң-не багай чүүл ында болбазыкпе — деп, Тамнус улуг тынып чугаалаан. — Мен — бичии уруглар оору мен, ол дээш. Менчэ көр даан, Еваның кызы. Аргага меңээ багай чүнүдаа кылбаан күжүр урутга таваржы бергеш, аңаа найыралдыг хөөннүг болуп баажыланып, ону бодунуң куюнче чалап алгаш, лимбизинге удуудур ойнап кааптар — ол бүгүнү аас-кежик чок күжүр урутну Ак Кадайның холунга кирип бээр дээш кылып шыдаарымга бүзүреп боор-дур бе?

— Чок — деп, Лұүси чугаалаан. — Ындыг чүве кылып шыдаавазыңарга бүзүрээр мен.

— А мен ону кылдым — деп, кижи-хуна чугаалаан.

— Чүл ынчаш? — деп, Лұүси харыылаан (ол меге чүве чугаалаар хөңнү чок болган, а өске талазында ооң-бile аажок дошкун болуксаваан). — Ам канчаар, силерниң талаңардан багай болган-дыр. Ынчалза-даа силер кылган чүүлүнөр дээш хомудап

туар-дыр силер, моон сонгаар кажан-даа ынчанмас силер деп бүзүрээр мен.

— О, Еваның кызы, таанда-ла, билбейн тур силер бе? — деп, кижи-хуна айтырган. — Мен моон мурнунда бир шагда, бир катап эвес, а ам, бо шакта ынчаар кылыш тур мен.

— Ол чүү дээринер ол? — деп, Лүүси хөлзеп алгырып-каш, арны ак тос апарган.

— Силер — ол уруг-дур силер — деп, Тамнус ыттанаан. — Ак Кадай менээ бир эвес мен аргага Адамның оглун-даа азы Еваның кызын-даа көрүп кагзымза, ону туткаш, аңа дамчыдып берип турарымны дужааган. А силер — менээ таварышкан баштайгы кижи болдунар. Силерниң өңнүүнер бооп баажыланып-каш, аяк шайже чалап алгаш, ол үе дургузунда, Ак Кадайга бүгүү чувени барып чугаалаар дээш, удуп каарыңарны манап турдум.

— Ах, дээрги Тамнус, а силер аңаа мээн дугайымда чугаалавас боор силер аа?! — деп, Лүүси хөлзеп чугаалаан. — Ылапла, ыттавас силер аа. Ынчанмайн көрүнцер, хей!

— А бир эвес мен аңаа чугаалавазымза — деп, кижи-хуна база катап ыглай берип уламчылаан, — Ак Кадай ол дугайында ыялп-ла билип каар. Он мээн кудуруумну одура кезерин, мыйысчыгаштарымны одура хирээллээрин, салымны чулуп кааптарын дужаар. Ол илби-шидиллиг мергежигежин чайыптарга, мээн чарааш адыр дуюгларым айттыы дег адыр эвес апаар. А бир эвес ол аажок хорадаза, мени даш кылдыр хуулдуруптар. Мен ынчан кижи-хунаның көжээзи апарып, Кэр-Паравелде дөрт дүжүлгэ ээллеттингижеге чедир, ооң коргунчуг ордузунга турар мен. А дүжүлгелер кажан ээллеттинерин база черле ындыг чүве болур-болбазын кым билир боор.

— Менээ дыка-ла харааданчыг-дыр, дээрги Тамнус — деп, Лүүси чугаалаан. — Ынчалза-даа мени бажынымче салып-тип көрүнцерем.

— Чорудуптайн канчаар мен — деп, кижи-хуна чугаалаан. — Мен ынчаар кылыш ужурлуг-даа мен. Ам ону кончуг эки билип тур мен. Силер-бile ужурашпаан шаамда, кижилер деп кымнарыл дээрзин билбес турдум. Ам, кажан силер-бile таныжып алганымда, силерни Ак Кадайга тудуп берип канчап шыдаар мен. А бис дүрген чоруптар ужурлуг бис. Мен силерни фонарылыг адагашка чедир үдел каайн. Оортан Хепше Хавы биле Ээ Нөрээлчэ орукту тып алтар-ла болгай силер але?

— Тып албайн канчаар мен — деп, Лүүси харылаан.

— Аргалыг-ла болза, аяар-оожум чоруур херек — деп, Тамнус чугаалаан. — Ак Кадайның шивишкеннери арга долу. Чамдык ыяштар безин ооң талазында.

Олар айш-чем, аяк-саваны безин аштап-аайлалаан. Тамнус база катап хол-майгынын ажыдып, Лүүсини чедип алган, олар куйдан үнүп келген. Дедир орук кижи-хунаның куюнче орукка көнгүс дөмей эвес болган: чаңгыс сөс-даа солушпайын, олар ыяштар аразы-бile дуюкаа барык-ла маңнажып бар чыткан. Тамнус эң караңгы черлерни шилип ап чораан. Ам-на олар фонарылыг адагашка чедип келген. Лүүси оожургап улуг тынган.

— Силер моон ыңай орукту билир силер бе, о, Еваның кызы? — деп, Тамнус айтырган.

Лүүси дүмбейже топтап көргеш, ыракта, ыяштар уннарының аразында чырык черни көрүп каан.

— Ийе — деп, ол харылаан, — мен хеп шкавының ажык эжинин көрүп тур мен.

— Ындыг болза, дүрген-не чана маңнаптынан — деп, кижи-хуна чугаалаан. — А силер... силер мени кылыш деп турган үүлгедиим дээш өршээп шыдаар силер бе?

— Ынчанмайн канчаар — деп, Лүүси сеткилиниң ханызындан көдүрлүүшкүннүг харылаан. — Мен база мени чоруудуканынан дээш силер-бile багай чүве болбас боор деп идегеп тур мен.



— Орук-суур менди-чаагай болзун, Еваның кызы! — деп, кижи-хуна чугаалаан. — Мен силерниң аржылыңарны тураскаал кылдыр арттырып ап болур мен бе?

— Ап алыңар даан — дээш, Лүүси ыракта хүндүску чырык черже сыр маң-билие ыңдай болган. Удавайн ол ооң холдары ыяштарның кадалчак будуктарын эвес, а чымчак алгы тоннарны чайлады идип турарын, ооң буттарының адаанда кыйырааш хар эвес, а манза шала барын эскерип каан, а оон — хоп! — ол ужу-ралдары эгелээн демги-ле ээн өрээлде турган! Уруг шкаф эжин ыяк хаапкаш, тыныш алыр харыы чок долгандыр көрдүнген. Чайс күтпушаан болган, коридорда ооң угбазы биле акыларының үннери дынналган.

— Мен мында мен! — деп, Лүүси алгырыпкан. — Мында мен. Ээп келдим. Шупту чуве анаа!



III

ЭДМУНД БОЛГАШ ХЕП ШКАВЫ

ЛҮҮСИ ЭЭН ӨРЭЭЛДЕН АРТКАН УРУГЛАР ТУРГАН
коридорже үне халаан.

— Шупту чуве анаа — деп, ол катаптаан. — Мен ээп келдим.

— Чүү деп тур сен? — деп, Сүүзен айтырган. — Чүнү-даа билбейн тур мен.

— Чүү деп чүнүл? — деп, Лүүси кайгап айтырган. — Мээн кайнаар чиде бергеним дээш дүвүрөвенир бе?

— Сен чаштына бергениц ол бе кай? — деп, Питер чугаалаан. — Лүү күжүр чаштына бээргэ, кым-даа ону эскербээн ышкажыл. Улус сени дилезин деп бодаар болзуңза, дараазында элээн үр чаштынып шене даан.

— А мен маңаа элээн каш шак турбаан мен — деп, Лүүси чугаалаан.

Уруглар удур-дедир карактарын хере көрүшкен.

— Тений берген-дир сен! — деп, салаазы-билие хаваан со-гугулааш, Эдмунд чугаалаан. — Шуут чайлып каап-тыр сен.

— Чүү дээр деп турарың ол, Лүү? — деп, Питер айтырган.

— Чугаалаан чүвемни — деп, Лүүси харылаан. — Мен шкафче эртэнги чем соонда дораан кире бердим, маңаа элээн каш шак дургузунда турбадым, аалчы бооп шай ижип олурдум, мээн-бile янзы-бүрү ужураддар болуп турду.

— Хей чүве чулчурба, Лүүси — деп, Сүүзен чугаалаан.

— Бис бо өрээлден мырыңай чаа үнүп келдивис, а сен анаа бис-бile кады турдун.

— Ол чулчурбайн турар кижи-дир — деп, Питер чугаалаан. — Солун болур кылдыр ол бүгүнү анаа-ла чогаадып алгандыр бо, шынап бе, Лүү? А чүгэ чогаадып болбас деп.

— Чок, Питер — деп, Лүүси чугаалаан. — Мен чүнү-даа чогаатпадым. Ол дээргэ хуулгаазын шкаф-тыр. Оон иштинде арга-эзим бар, ында хар чаап турар. Ында кижи-хуна, Кара ил-бичи Кадай бар, а чурттуң адын Нарния дээр. Барып көр даан.

Ургулар чүү-даа дээр аайын тыппайн турган. А Лүүси аажок хөлзөп турар боорга, олар оон-бile кады ээн өрээлчэ эглип келген. Дунмазы шкафка халып чеде бергеш, оон эжин ажыткаш, алгырган:

— Дүрген боже кирицер, ийи карааңар-бile көрүнөр!

— Мелегейни сени-даа! — деп, бажын шкафче суп, тоннарны тарады итпишаан, Сүүзен чугаалаан. — Анаа хеп шкавыла-дыр. Көр даан, оон артыкы ханазы бо-дур.

Ынчан арткан ургулар шупту шкафче бакылап, тоннарны тарады идипкеш, анаа хеп шкавын көрүп каан — Лүүси боду-даа оон өске чүве көрбээн. Тоннар артында арга-даа, хар-даа чок — чүгле артыкы хана болгаш ында аскылар, дээктөр бар. Питер шкафче киргеш, хана тудуш деп бүзүрээри-бile ону чудуруу-бile соктагылаан.

— Сен бисти тулдур-ла мегеледин, Лүүси — деп, Питер шкафттан үнмушаан чугаалаан. — Даап бодааның-даа тулган-дыр, чүү дээр боор. Сенээ бичии-ле болза бүзүрэй бээр частывыс.

— А мен чүнү-даа мегелеведим — деп, Лүүси удурланган.

— Кырым сынар! Ам чаа-ла борта бүгү чүве көңгүс өске турду. Ылап болганы-ла шын чүве.

— Сокса, Лүү — деп, Питер чугаалаан. — Эмин эрттире бербе. Бистин-бile баштактанып ойнап шаг болдуң, ам болзун.

Лүүси кыза хона берип, чүнүң дугайында деп боду билбес-даа болза, бир чүве чугаалаксаан, оон өөцөйнип ыглап эгелээн.

Дараазында каш хонук Лүүсиге муңгаранчыг болган. Ол өске ургулар-бile чайлыг эптежип ап болур турган, чүгле бүгү чүвени каткы-шоот үндүрери-бile чогаадып алган бооп чөпшээрежипсе ол-ла. Ынчалза-даа Лүүси аажок ак сеткилдиг уруг бооп, бодунуу шынныг деп билир болгаш, бодунун-на сөстеринден ойталаар кылдыр бодун черле албадап шыдаваан. А оон угбазы бile ақылары ол бүгүнү мелегий меге деп санап турар боорга, Лүүсиге кедергей-ле хомуданчыг болган. Оода улуг ақызы бile угбазы оон-бile үрелдешпейн-даа турган болза, Эдмунд, чамдыкта бак сагыштыг апаар боду, бо удаада бодун ол талазы-бile дыка-ла көргүсken. Ол Лүүси-бile өлүржүп, ону амыратпайн хорададып: «Өске шкафтарда кандыг-бир чурттар ажыдып албаан сен бе?» — деп соксаал чок айтыргаш туруп берген. База бир хомуданчыг чүве — бактажышкын эвес болза, ол бо хүннерни эки эрттир турган ийик. Агаар кончуг эки болуп, ургулар хүнүнү бадыр даштыгаа туруп, эштип, балыктап, ыяштарже үнүп, ойт-сигенге андаштанып турган. А Лүүсиге бүгү чүве өөрүнчүг эвес болган. Дараазынданыг чайстыг хүнгэ чедир ынчаар уламчылап келген.

Дүүш соонда-даа агаар өскерлир хире эвэзин көрүп кааш, ургулар чаштынчып ойнаар деп шиитпирлээн. Сүүзен тываар болган, артканнары тарадыр маннажы бээрge, Лүүси хеп шкавы турар ээн өрээлчэ чорупкан. Ол шкафка чаштынар-даа дивээн, чүгэ дээргэ ол, өскелер ону оон тып алза, демги хайлыг төөгүнү катап база сактып кээрин билген. Ынчалзажок уруг шкафче ам бир катап бакылаксаан, чүгэ дизе ынчан ол боду безин кижи-хуна биле Нарния чүгле оон дүжүнгэ киргэн эвес бе деп бодай берген чүве-дир.

Бажын аажок улуг, кижи аза берги дег, озалааш булуңнары эндерик болгаш, уруг бир караа-бile шкафче бакылапкаш, оон өске чөрье чайлыг чаштына берип шыдаар турган. Ынчалза-даа Лүүси өрээлчэ кире бээри билек, даштын базымнаар дынналган. Ол чүгле дүрген-не шкафче киргеш, эжин хаап аарынга өй болган. Ындыг-даа болза, бичии үт арттырып алган, чүгэ дээргэ хуулгаазын эвес, бөдүүн-даа шкаф иштинге бодун дуглап аары бодал чок чорук дээрзин билир-ле болгай.

Ынчаарга Лүүсинин дыннаан базымнары Эдмундунуу болган; кирип келгеш, оол Лүүси шкафче чаштына бергенин өскерип четтигипкен. Ол база шкафче дораан кире бээр деп

шиитпирлээн. Аңаа чаштынары арай эгчок боорга-даа эвес, а Лүүсини ооң даап бодап алган чурту-бile база катап ажындырып, өлүржүрүн күзээш, Эдмунд эжикчигешти ажыдыпкан. Ооң мурнунда алгы тоннар азып каан турган, нафталин чытталган, шкаф ишти оожум болгаш караңы болган. А Лүүси кайыл?

«Мени Сүүзен-дир деп, ам ону тудуп аарым ол-дур деп бодаан-дыр бо — деп, Эдмунд иштинде чугаалаттынган. — Ынчангаш артыкы ханажыгаш чанында чаштынып чыдыпкан-дыр». Оол шкафче шурай бергеш, бодунуң соондан эжикти хаапкан, ынчаар қылышы аажок мелегей чорук дээрзин-даа уттулган. Оон тоннар аразын чинчерлеп эгелээн. Лүүсини дораан тудуп аарын манап турган болгаш, ону тыппайн баргаш, ол аажок кайгаан. Оол аңаа чырык боору-бile шкаф эжин ажыдар деп шиитпирлээн, ынчалза-даа эжикти база тып чадап каан. Ындыг чүүл аңаа таарышпайн баргаш, артында-ла аажок таарышпайн баргаш! Оол янзы-бүрү талаларже кыйбыңап:

— Лүүси, Лүү! Кайда сен?! Сени мында деп билир мен!
— деп алгыргылаан.

Ынчалза-даа аңаа кым-даа харыылаваан, Эдмунд сактырга, ооң үнү элдептии кончуг дыңналыр болган — шкафта эвес, а даштын-даа тураг ышкаш. Оон ыңай ол, чүге-ле ийик, аажок соой бергенин эскерип каан. Ынчан оол чырык чер көрүп каан.

— Ух! — деп, Эдмундуң сагыжы оожургай берген. — Эжикчигеш боду ажыттына бээр боор.

Оол Лүүси дугайында уттулкаш, чырыкче шиглиг шимчеп үнүпкен. Ол дээргэ шкафтың ажык эжии боор деп бодаан кижи чүве-дир. Ынчалза-даа шкафттан ээн өрээлчэ үнүп кээриниң орнуунга, ол кайгал-харал эскерерге, шыргай шивилер арасындан дүмбэй арга ортуунда аяңчэ үнүп орар болган.

Ооң буттарының адаандада кадыг хар кыйыраан, шивиниң будук-холдарында база ожук хар чыткан. Оолдуң бажының кырында чырык ак-көк дээр көзүлген — ындыг дээр чүгле аяс кышкы хүннүң даң бажында тураг. Ооң чиге мурнунда ыяштар уннарының аразында дыка улуг кызыл хүн үнүп орган. Оожуму аажок, ол мында дың чаңгыс дириг амытан ышкаш болган. Ыяштарда күштар-даа, дииңнер-даа көзүлбээн, бүгү талаларже карак четки дег черде караңы арга шэйлүп чоруткан. Эдмунд дидиреп эгелээн.

Чүгле ынчан оол Лүүсини дилеп турганын сактып келген. Дунмазы-бile өлүржүп, ону даап бодап алганы чурт дээш

ажындырып турганын база сактып келген, а чурт ылап бар болган ышкажыл. Дунмазы ырак эвес бир черде боор деп бодааш:

— Лүүси! Лүүси! Мен база мында мен. Эдмунду-дур мен!
— деп алгыргылаан.



Кандыг-даа харыы чок болган. «Сөөлгү хүннөрдэе ооң биле өлүржүп чугаалаан бүгү чүүлдерим дээш ол меңээ хорадаандыр» деп Эдмунд боданган. Бодунуу шын эвес деп миннир хөнүү ындыг кончуг күштүг эвес-даа болза, шак бо коргунчуг соок, ыыт чок аргага чааскаан тураг хөнүү барык чок бооп, ол катап база алгыра берген:

— Лүү! Дыңнам, Лүү... Сеңээ бүзүревейн турганым дээш өршээп көр. Сээн шынын чугаалап турганынны көрүп тур мен. Че, үнүп кел, эптеҗип аалы.

Биеэги хевээр кандыг-даа харыы чок.

«Кыс уруг дөмей-ле кыс уруг боор-дур — деп, Эдмунд бодунга боду чугаалаан. — Менээ хорадаар, буруум минниримгедаа, тоовас». Ол база катап долгандыр көрдүнгэн, бо чөр ооң сеткилингэ шуут таарышпайн баргаш. Оол чанар деп барык шиитпирлеп алган тургаш, хенертен ыракта конгурааштар эткенин дыңнап каан. Ол эткен ыыт дыңзыза-дыңзыза, аяңчэ шанактап каан ийи иви уне халчып келген.

Ивилер шотланд пони деп бичии аyttар ышкаш дуртсынның, оларның дүгү маңган ак, хардан-даа аккыр болган; адыланган мыйыстарын алдыннап каан болгаш, оларже хүн херели дээптерге, оларны чалбырааш хөме алган дег, кыптыгып турган. Чидиг кызыл хөмден кылган шанак херекселин конгурааштар-бile дуй азып каан. Шанакта холунда моожа туткан семис гном* олурган, ооң бүткүр бодунун узуну бир метрден бедивес хире. Ол ак адыг кежи тоннуг, бажында узун шидигде халаңнаан алдын салбактыг бедик кызыл бергттүг болган. Аажок узун салы гномнуң дискектерин ширтек ышкаш шып турган.

А ооң артында бедик олутта анаа чүзү-бile-даа дөмөйлешпес херээжен кижи саадап олурган. Ол болза сыңзыг, узун, Эдмундуң билири бүгү херээжнендерден узап көстүр агай болган. Ол база-ла ак алгы тон кедип алган, ооң бажында алдын дүжүлгө бөргү чайынналган, а холунда ол алдын мергелиг болган. Ооң арны база-ла ак, ак боорда, куузумаар эвес, а хар дег, саазын дег, хуужуурну чагган кылаң чигир дег ак, а аксы — кыпкызыл. Арын-шырайы чараш-даа болза, турамык, соок болгаш шириин көстүр.

Шанактыг ивилер Эдмунду же углай бар шаа-бile халдыптарга, тергиин онза көстүр болган: конгурааштар дагжаан, гном кымчызын дазылаткан, иий талаже хар чайыннап эстээн.

— Тур! — деп, херээжен чугаалаарга, гном моожаны ивилерниң артыкы даваннарын олурту тыртыпкан. Оон олар суглуктарын дайнап, аар тынып, кадап каан дег туруп алган. Соок агаарда оларның думчуунун үттеринден бус, дүргектелген ыш дег, дывыржып үнүп турган.

— А бо чүү деп чүвел? — деп, херээжен оолче топтап көрбүшаан айтырган.

— Мен... мен... Мени Эдмунд дээр — деп, оол илдиге ааррак химиренген. Демги херээжнениң оолче ынчаар көрүп турарынга оол таарзынмаан.

— Кадынны кым ынчаар аажылаар чүвел? — деп, ол Эдмунду же ооң мурнундаазындан-даа дошкуурадыр көрбүшаан чугаалаан.

— Мени өршээцер, дээрги мындаагылар — деп, Эдмунд чугаалаан. — Мен силерни танываан-дыр мен.

— Нарнияның Кадының билбес деп че?! — деп, демгизи алгырып үнген. — Че, удавайн бисти таныыр апаар сен. Катап база айтырып тур мен: сен чүү деп чүве сен?

— Өршээцер, дээрги мындаагылар, мен силерни арай-ла билбейн тур мен — деп, Эдмунд чугаалаан. — Өөреникчи мен ийин... кандыг-чүү-даа болза, школа барып турар мен. Ам бисте дыштанылга уези.

* Гномнар — Европа чоннарының мифологиязында кижиге дөмей бичишик, чыкпак амыттаниң, чер иштинде, аргада азы дагларда чурттап турар.



IV

РАХАТ-ЛУКУМ

— КАНДЫГ УКСААЛЫГ СЕН? — ДЕП, КАДЫН КАТАП база айтырган. — Сен дээрге салын үзе кезип алган, назылап кырый берген чыкпак гном сен бе?

— Чок ыңар, дээрги мындаагылар. Мээн салым ам-даа үнмәэн. Оолчугаш мен.

— Оолчугаш! — деп, Кадын алгырыпкан. — Сен — Адамның бир оглу мен диксеп тур сен бе?

Эдмунд ыыт чок шимчеш дивейн турган. Ол үеге чедир ооң угааны шуут ээдереп калган, Кадынның айтырыын-даа билбейн барган.

— Мен көөрүмгө, сен кым-даа болган болзуңза, сээден амьтандыр сен — деп, Кадын чугааланган. — Ам-на меңээ харыла, оон башка шыдашпайн баар мен. Сен кижи амьтан сен бе?

— Ийе, дээрги мындаагылар — деп, Эдмунд харылаан.

— А сен канчап мээн ээләэн черимче чедип келдин, ол кандаай чоор?

— Өршээп көрүцер, дээрги мындаагылар, мен хеп шкавын өттүр чедип келдим.

— Хеп шкавы? Ол чүү деп турарың ол?

— Мен... мен эжикчигешти ажыдыпкаш... мында келген болдум, дээрги мындаагылар — деп, Эдмунд чулчураан.

— Ха! — деп, Кадын аңаа-даа эвес, бодунга-ла боор, чугаалаан. — Эжикчигешти де! Кижилер делегейинден эжик! Мен ындыг чүүлдер дугайында дыңнаан мен. Бүгү чувени ол чок кылып каап болур. Ынчалза-даа бо кижи чүгле чааскаан ышкаждыл, ону ажып эртери чайлыг херек-тир он.

Ынча дээш, Кадын олудундан туруп кээп, Эдмундуң арнынчे дорт көрүп келген. Ооң карактары кыптыгып турган. Ол илбилиг мергезин көдүрүп келген. Эдмунд Кадын ооң-бile бир-ле кончуг багай чүве кылышы ол-дур деп бүзүреп турган, ынчалза-даа шимченип чадап каан. Кажан оол «өлдүм-не» деп шуудунга кирип бодай бергенде, демгизи өскээр бодапкан.

— Мээн күжүр төлүм — деп, Кадын көңгүс өске аян-бile чугаалаан. — Доңа берген боор сен аа. Бээр кээп, мээн чанымга шанакка олуруп ал. Бодумнуң тонум-бile шуглап каар мен, оон чугаалажыр бис.

Ол санал Эдмундуң хөөнүнгө шуут таарышпаан, ынчалза-даа оол удурланып диттикпээн. Эдмунд шанакче үнгеш, Кадынның буттарының чанынга олуруп алган, а демгизи олче тонунуң эдээн шуглай каапкаш, алгыны бүгү талазындан чылыглай көвөп берген.

— Кандыг-бир изиг суксун ижиксей-дир сен бе? — деп, Кадын айтырган.

— Ийе, дээрги мындаагылар, хайырлап көрүнчөрөм — деп, оол харылаан. Ооң диштери доңганындан шаккынайып турган.

Кадын тонунуң иштии хойнун үженгеш, чес дег сарыг өннүг металлдан кылган бичии хойлаарак уштуп келген. Холун сунгаш, ол хойлаарактан бир дамдыны шанак чанында харже дамдыладыпкан. Эдмунд көөргө, дамды агаарга брильянт дег кылаш дээн. Дараазында секундада дамды харга дээлтергэ, шиилээн дааш дыңналган соонда, оон мурнунда бусталып турар билдинмес суксун куткан, улуг үнелиг даштар-бile шып каастаан дашка көстүп келген. Гном ол дораан ону тудуп алгаш, Эдмунду же мөгейбишаан база хүлүмзүрбүшсаан сунган. Ооң хүлүмзүрүү, шыны-бile чугаалаарга, ындыг-ла ак сагыштыг

эвес болган. Эдмунд шак ол чигирзиг, көвүктүг митпек суксуну пактап эгелээрge, ацаа экизи кончуг апарган. Ол кажан-даа ацаа дөмөй чүве ижип көрбээн, суксун ону тейинден бажынга чедир чылыдыпкан.

— Чем чивейн, чүгле ижери чалгааранчыг — деп, Кадын чугаалаан. — Адамның оглу, сен чүнү эн чиксээр-дир сен?

— Рахат-лукум^{*} болза, дээрги мындаагылар — деп, Эдмунд харылаан.

Кадын катап база хойлаарактан бир дамдыны харже дамдыладыптарга, ол дораан дамды ногаан торгу кожаа-бile шарып каан борбак хааржакчыгаш кылдыр хуула берген. Эдмунд ону ажыдыптарга, кайгамчык чаагай рахат-лукум-бile долдунган болган. Борбак рахат-лукумнаар шупту ёттүр көстүр, аажок чигирзиг, Эдмунд назынында ындыг таптыг амданныг рахат-лукум черле чип көрбээн. Оол чылыгып, бодун миннирге, экизи-даа кончуг апарган.

Ол амданинанып чемненип турда, Кадын ацаа улай-улай айтырыглар салгаш туруп берген. Баштай Эдмунд аксы долу туруп чугаалажыры ээлдек эвес дээрзин утпайн турган, ынчалзадаа үр болбаанда, ол ынчыгыс чүүлдүү: аксынче хөй-ле рахат-лукум киир дыгып аарын бодап эгелээн. Ол хөйнү чиген тудум, ам-даа чиксээш туруп берген, ынчангаш Кадын чүге ындыг сонуургал биле ацаа айтырыглар салып турарыл дээрзин ынчыгыс-даа катап бодаваан. Кадын албадаарга, оол бир акызы, кыс угба-дуңмазы барын, оларның бирээзи Нарнияга кээп чорааш, кижи-хунага таварышканын, оон боду биле акызы, угба-дуңмазындан ангыда, кым-даа Нарния дугайында билбезин өчүп чугаалап берген. Оларның дөрт санны Кадынны онза сонуургаткан, ол катап-катап ынаар эглип:

— Силер ылап-ла дөрт силер бе, сен ол дээш бүзүрледиг сен бе? — деп айтырып шаг болган. — Адамның ийи оглу биле Еваның ийи кызы — оон хөй-даа, эвээш-даа эвес силер бе?



* Рахат-лукум — чигир, далган болгаш крахмалдан тоорук, миндалъ, чимис чулуу холуп тургаши кылыш чөөн чүктүүт амданы чаагай чигир-бооба аймаа.

Эдмунд аксын рахат-лукум-бile долдур дыгып алгаш, катап-катап харыылап-ла турган:

— Ийе, мен сilerге дем-не чугаалаан ийик мен.

Оол «дээрги мындаагылар» деп немээрин уттуп-ла турган, а кадын бүгүү чувениң аянын бодаарга, ынаар кичээнгей салбастаан хире.

Ам-на рахат-лукум төнген. Эдмунд куруг хааржакчыгашчे үзе кайгааш турупкан — Кадын оон ам-даа чиксеп турарын айтыра берзе канчаар. Оолдуң сагыжын ол даап билип-даа турган чадавас, чүгэ дээргэ рахат-лукум илбилиг дээрзин Кадын билир, а Эдмунд билбес-ле болгай — ону чаңгыс амзап шенэн кижи ам-даа чиирин бодаар, ацаа чөвшэрээр болза, идээлеп чарылгыжеге чедир чип кээр. Ынчалза-даа Кадын Эдмундуга оон ыңай бербейн барган. Оон орнунга ол ацаа мынча дээн:

— Адамның оглу! Сээн акын биле угба-дуңманды көөрүү менээ дыка-ла өөрүүнчүг боор ийик. Оларны менээ аалдадып эк-кээр сен бе?

— Шенеп көөр мен — деп, куруг хааржакчыгаштан көрүжүн ам-даа чайлладып чадап, Эдмунд харылаан.

— Бир эвес бээр база катап кээр болзуунза, олар-бile кады келбейн канчаар сен, мен сени база катап рахат-лукум-бile хүндүлөп чөмгерер мен. Ам ынчап шыдавас-тыр мен, илби-шиди ам күштүг болбас-тыр. А мээн ордумга болза, өске херек.

— А чүгэ ам силерниинчэ барып болбас бис? — деп, Эдмунд айтырган. Кажан Кадын ацаа оон шанаанче олуарын саналдап турда, ол ону кандыг-бир ырак, билдинмес черже сөөртүп аппаар ирги бе деп, оортан дедир орук тыппайн баар ирги мен бе деп корга берген, а ам коргуушкунун шуут уттупкан.

— Мээн ордум дыка чарааш — деп, Кадын чугаалаан. — Ол сээн сагыжынга тааржыр деп бүзүрээр мен. Ында дээвийиргэ чедир рахат-лукумнуг хааржакчыгаштар салып үндүрген өрээлдер бар. Оон ыңай мындыг чугаа бар: мээн бодумнуң ажытөлүм чок. Дыка эки оолдан азырап алгаш, ону тажы кылып аар күзелдиг мен. Чок апаарымга, ол тажы Нарнияның хааны апаар. Тажы алдын дүжүлгө бөргү кедер база хүннү бадыр рахат-лукум чиир, а сен болза менээ таварышкан оолдардан эн угааннны база эн чаражы-дыр сен. Мен сени тажы кылып аарынга удур эвес мен... чүгле оон, өске ургуларны бээр эккелгениң соонда.

— А чүгэ ам эвэзил? — деп, Эдмунд айтырган. Оон арны кыза берип, аксы биле холдары рахат-лукумдан чыпшынычал

апарган. Кадын чүү деп-даа турган болза, оолче көөргө, ол чарашиб даа эвес, угааныг-даа эвес болган.

— Бир эвес сени ам эдертеп аар болзумза — деп, Кадын чугаалаан, — сээн угба-дуңмаң биле акыңы көрбезим ол-дур. А мен сээн эки төрелдерин-били дыка-ла таныжып алыхсаар-дыр мен. Сен тажы болур сен, а сөөлзүреди — хаан, ол-даа ам шиит-пирлэтигэн херек-тир. А сенээ орду дүжуметтери, эки ызыгуурлуг чоок кижилер херек. Сээн акыңга, угба-дуңмаңга бедик эрге-дужаал тыпсыр мен.

— Аа, оларда онзагай чүү-даа чок ийин — деп, Эдмунд химиренген. — Чүү-даа болза, оларны кандыг-даа өске хүнде бээр эккэри менээ бичии-даа берге эвес.

— Ынчалза-даа мээн ордумга баргаш, оларны уттууптуул болур сен — деп, Кадын чугаалаан. — Ында байдал сээн сеткилингэ кирип, оларны эккээр дээш чоруур хөңнүү чок апаар. Чок, сен ам бодуңнуң чуртуңчэ чана бергеш, дараазында менээ олар-били кады чедип кел, билдинг бе? Чааскаан хей-ле келир сен.

— А мен чанар оруум билбес мен — деп, Эдмунд ыгланаан.

— Ону тып аары белен — деп, Кадын чугаалаан. — Фонарьлыг адагашты көрүп тур сен бе? — Ол илбилиг мергежигэжин сунуптарга, Эдмунд Лүүсиниң кижи-хуна-били ооң чанынга ужурашканы фонарьны көрүп каан. — Оон артынчэ дорт чоруптар болзуңца, Кижилер оранынчэ орук бар. А ам бээр көр! — Кадын удур талаже айыткан. — Ыяштар артында ийи тейни көрүп тур сен бе?

— Ийе — деп, Эдмунд харылаан.

— Мээн ордум ол тейлерниң таптыг-ла аразында турар. Дараазында бээр чедип келгеш, фонарь чанынга баргаш-ла, бо ийи тейни дилээр сен, а оон мээн ордумга чеде бергиженгэ чедир, арга ишти-били чоруур сен. Ынчалза-даа сактып ал: арткан өөрүңнүү шуптузун эдертеп эккээр ужурулуг сен. Чааскаан кээр болзуңца, коргунчуг хорадаар мен.

— Оралдажыр мен — деп, Эдмунд чугаалаан.

— Шынап, оларга мээн дугайымда чугаалавас болзуңца эки — деп, Кадын немеп каан. — Ол бистиң чажыдывыс бооп артын, ынчаар болза, оон-даа солун боор, ындыг аа? Оларга хенертен болган чүүл болзун. Анаа-ла оларны бо ийи тейже эк-кел... Сен ышкаш угааныг оол ону канчаар кылыр айын черле

тыптар. А силер мээн ордумга чедип кээриңергэ: «Мында кым чурттап турар эвес, көрүп көрээли» — дээр сен азы ындыг янзылыг өске-бир чүведен чугаалаар сен. Ынчаар кылыр болза, эн дээрэзи ол болур ийик. Бир эвес сээн дуңмаң борта кижи-хуна-били ужурашкан болза, мээн дугайымда янзы-бүрү меге чүүл дыңнап шаг болган чадавас... ынчангааш менээ аалдап кээринден корга бээр-даа чадавас. Кижи-хуналар чүнү-даа нүгүлдеп чугаалап шыдаар болдур ийин. А ам...

— Мени буруудатпайн көрүнчөр — деп, Эдмунд хенертен ону үзе кирген. — Орукка чиир дың чанғыс борбак рахат-лукум ап ап болур ирги бе?

— Чок — деп, Кадын каттырыбышаан харылаан, — сен дараазында удаага чедир манаар болган-дыр сен.

Оон Кадын гномга шимчеп үнер медээ берген. Шанак ырай бергенде, ол Эдмунду же холун чайгаш:

— Дараазында! Дараазында ужурашкыже! Утпас сен! Дүрген ээп кел! — деп алгырган.

Эдмунд шанактың чиде берген чөринчэ кезе кайгап алган тургаш-ла, бир кижи ооң адын адап кый деп турарын дыңнап каан. Хая көрнүп келгеш, оол арганың дужаашкак талазындан Лүүсиниң олче далажып кел чыдарын көрүп каан.

— Ах, Эдмунд! — деп, уруг хөлзеп чугаалаан. — Сен база мында келген ышкаждың чүл. Элдептиг эвес-тир бе? Ам...

— Ийе-ийе — деп, Эдмунд ону үзе кирген. — Мен ам сээзийн шыннын, шкаф херек кырында хуулгаазын болганын көрүп тур мен. Ынчалза-даа кандаай чоор, бо бүгү үеде сен каяа чорааның ол? Мен сени кайының-даа дилеп турдум.

— Сээн база мында турарыңын билген болзумза, мен сени манап аар ийик мен — деп, Лүүси чугаалаан. Ол аажок өөрүп хөлзеп турган болгаш, Эдмундуң арны кайы хире кыза бергенин база элдептиг аян-шинчилийн, ооң чугаазының кайы хире донгунун эскербээн. — Мен дээрги Тамнус, кижи-хуна-били кады эртэнги чөм чидим. Ооң шуптуу чувези эки-дир, мени салып чорудупканы дээш Ак Кадай аңаа бағай чүве кылбаан болду. Ак Кадай болган чүүл дугайында чүнү-даа билбес болганды, барза-барза бүгү чүве чогумчалыг эрте бээр деп кижи-хуна бодап турар.

— Ак Кадай? — деп, Эдмунд катаптаан. — Ол кым боор?

— О, ол дээргэ шуут-ла коргунчуг амытан-дыр — деп, Лүүси чугаалаан. — Ол Нарнияның Кадыны мен деп адаттынып

турар, ындыг-даа болза, бодун ынчаар алдынар кандыг-даа эргези чок. Бұғы кижи-хуналар, ыяш, суг әэлери, гномнар болгаш дириг амытаннар, чүү-даа болза, бұғы әки амытаннар аңаа шуут-ла дириг кара хөңү чок. Құзәэр-ле болза, ол қымны-даа даш қылдыр хуулдуруп шыдаар, өске-даа коргунчуг чүүлдерни қылып турар. Ол Нарнияны илби-шидилеп қаапкан болгаш, ам мында кезәде қыш турар, кезәде чүгле қыш, а Чая чыл-даа, час-даа чок-ла чок. Ол аргага ак ивилер көжуп сүккан шанактыг, холунда илбилиг мергелиг болгаш бажында дүжүлге бөрттүг чоруп турар.

Хөлүн эрттири хөй амданныг чүүл чипкен болгаш, Эдмунд ол чокка-ла баксырап турган, а найыралдажып алғаны агай коргунчуг караң көрнүр херәжен деп билип қаш, ооң хөңү оон-даа артық баксырай берген. Ынчалза-даа биеэги хевәэр ол чырык черде бұғы чүведен артық рахат-лукум чиксеп турган.

— Ак Кадын дугайында ол бұғы хоозун чүвени кым сенәэ чугаалады? — деп, оол айтырган.

— Тамнус ақый, кижи-хуна — деп, Лұғаси харыылаан.

— Кижи-хуналарга черле бұзүреп болбас — деп, Эдмунд олар-бile Лұғсиге көөрде, чоок таныжар-даа ышкаш, ооң аксын дүй шапкан дег чугаалаан.

— Сен канчап билир сен? — деп, Лұғаси сонуургаан.

— Ол дәэрge бұғы улуска билдингир чүве ышкаждыл — деп, Эдмунд харыылаан. — Кымдан-даа болза айтыр даан... А маңаа харга турган ажыы чүл. Чанаалы че.

— Чоруулу харын — деп, Лұғаси харыылаан. — Ах, Эдмунд, сәэн мында келгениң дәеш аажок өөрүп тур мен. Ам-на Питер биле Сүүзен, бис ийиләэн маңаа кәэп чораан болғаныбыста, Нарния шынап-ла бар деп бұзүрей бәэр; ынчан хөглүг-ле болур!

Эдмунд иштинде бодунга, дунмазы урутта ышкаш, ындыг-ла хөглүг болбас боор деп бодаан. Лұғсинии шынныг деп бұғы денин мурнунга миннир апаар, ооң кадында акызы биле угбазы кижи-хуналар болгаш дириг амытаннарың талазынче кирер дәэрзинге ол чигзинмейн турган, а ол боду колдуунда Кадын-ның талазын тырткан болгай. Бир эвес өске үш кижи Нарния дугайында чугаалажы бәэр болза, боду чүү дәэр ужурлуун база бодунуң чажыдын канчап қадагалап шыдаарын ол әки-ле билбейн турган.

Ол аразында олар әләэн черни әртип келген. Хенертен олар долгандыр шивилерниң тенниг будуктары эвес, а чымчак

тоннар турарын әскерип қааннар, а үр болбайн ээн өрәэлде шкаф мурнунда турғаннар.

— Эд, дыңна — деп, Лұғаси чугаалаан. — Кадыкшыл байдалың анаа-дыр бе? Даشتыңдан көөрге, баксыраан деп чүвенни.

— Мәэн шупту чүвем анаа — деп, Эдмунд мегелеп чугаалаан, а оон кускузу келип ат болуп турған.

— Ынчаарга өскелеривисти барып диләэли. Оларга чугаалап чедер чүвөвис-ле хөй-дүр. А кайы хире кайгамчык ужураддар бисти манап турар деп, артында-ла бис ам шупту оларга киржир-ле болгай бис.



V

АМ БАЗА ШКАФТЫҢ КИЖИЛЕР ОРАНЫ ТАЛАЗЫНДА

АРТКАН УРУГЛАР ЧАШТАНЧЫП ОЙНАВЫШААН турган, ынчангаш Эдмунд биле Лүүси оларны дораан тып ап шыдаваан. Кажан олар ам-на дайынчы дериг-херексел тургузуп каан узун өрээлге шуптуу кады чыглып келгенде, Лүүси хөөрөп үнген:

— Питер, Сүүзен! Ол чурт шынап-ла бар! Эдмунд база ону көрдү. Хеп шкавы дамчыштыр шынап-ла ынаар эрте берип болур-дур. Бис аңаа ийилээн турдувус. Аргага ужуражы бердивис. Че, Эдмунд, бүгү чүвени оларга чугаалап бер.

— Чүү болду, Эд? — деп, Питер айтырган.

Бис ам бо төөгүнүң эң-не ыядынчыг-бак черинге чедип келдивис. Эдмунд аажок хөөн былганип, Лүүсинин шын болганды дээш аңаа ажынып турган, ынчалза-даа чүнү канчаарын ол ам-даа билбейн турган. Ам, кажан Питер аңаа айтырыг

салырға, ол хенертен бодап ап-ла шыдапканы эң бак сагыштыг чүүлдү кылым деп шиитпирлеп алган. Ол Лүүсини садыптар деп шиитпирлээн.

— Эд, биске чугаалап берем — деп, Сүүзен дилээн.

Эдмунд Лүүсиден элээн улуг-даа турган дег, а херек кырында оларның назы-харының ылгалы чүгле чаңгыс чыл чуведир, дунмазынче улуургап көргеш, кыжырганзыг каттырымзааш, мынча деп дүжүрген:

— А!.. Бис аңаа ойнап турдувус... ооң чурту деп оюн. Хеп шкавында ооң чурту шынап-ла бар деп. Каткы-шоот кылдыр болбайн канчаар. Бында чүү-даа чогу билдингир чүве ышкаждыл.

Күжүр Лүүси Эдмундуже чүгле чаңгыс катап көрүпкеш, өрээлден уне халаан.

А демгизиниң багы кезек болгаш-ла, кедереп турган. Аажок улуг чедиишкиннег болдум деп бодап, Эдмунд:

— Ол-ол, ам база бодунун чаңын көргүзүп тур. Черле канчап барган уруг боор? Чаш уруглар ындыг шүүттүг-дүр! Олар кезээде-ле...

— Эй, сен, кедереве!.. — деп, Питер ооң кырында-ла барган. — Бодунун тейинде төвени көрбес... Лүү хеп шкавы дугайында ол бүгү мелегей чүве чугаалап эгелээнден бээр сен бодуну хаванзыг алдынып тур сен, а ам оон-бile ол чурт деп ойнап этелээш, катап база ону хөлзедиптиң. Хоралыындан ынчаар кылганыңга шуут бүэүрээр мен.

— А ол дээрge хей чүве ышкаждыл — деп, аайын тыппайн баргаш, Эдмунд чугаалаан.

— Хей чүве болбайн канчаар — деп, Питер харыылаан. — Хамык ужур ында. Кажан бис бажыңызыстан чоруп турувуста, Лүү уруглар ышкаш уруг турду, а боже чедип келген үөвистен бээр, ол чок-ла болза бичишилеп тенек аарып турар-дыр, чок-ла болза эң кедергей мегечи кижи апар чыдар-дыр. Ынчалза-даа ол-даа, бо-даа таварылгада бир эвес сен бирде оон-бile өлүржүп шоодуп турар, бирде ооң даап бодап алган чүүлдерин деткип турар болзунза, аңаа черле ажыктыг болбас.

— Мен... ынча деп бодадым... мен — деп, Эдмунд химиренген, ынчалза-даа удур харыылаптар чүве тыппаан.

— Сен чүнү-даа бодаваан сен — деп, Питер чугаалаан, — чүгле хора чедиреринге ынак-тыр сен. Бодундан бичий кижилирни багай аажылап пат чаңчыкканың ол-дур — бис ону школага-ла көрген бис.

— Соксап көрүңер — деп, Сүүзен чугаалаан, — бир эвес бактажып аар болзунарза, ол чүү-даа чувеге дузалавас. Лүүсини барып дилээлем.

Олар Лүүсини ам-на тып алгаш, ооң ол бүгү үени ыглап эрттиргенин көрүп кааннар. Ында кижи кайгаар чүү бар деп. А олар аңаа чүү-даа дээрge, ол дыннавас болган. Бодунуу дээш турупкан.

— Силерниң чүнү бодап турарыңар меңээ дөмей-ле, чүү деп-даа турарыңар база меңээ дөмей-ле — деп, ол катап-катаң чугаалаан. — Бүгү чувени профессорга чугаалап азы авамче бижип болур сiler. Күзээн-не чүвөнөрни кылышнар. А мен аңаа кижи-хуна-бile ужурашканымны билир мен, харын-даа... аңаа кезээ шагда артып каарым кай, а сiler шүпту хаванзыг сiler...

Ол кежээ шүптузунун сагыжынга аар болган. Лүүсиниң хөңү аажок баксыраан, а Эдмунд ооң кылган чүүлү көңгүс-ле манавааны түннелдерге чедиргенин чоорту билир каан. Уругларның ийи улуу Лүүси тенек аарый бербээн бе деп шыны-бile дүүреп эгелээн. Лүүси уdup чыдып аарга, олар коридорга ол дугайында үр-ле сымырашкан.

Даартазында эртен олар ам-на бүгү чувени профессорга барып чугаалаар деп шиитпирлээн.

— Бир эвес Лүү-бile кандыг-бир чүве болур болза, профессор ачавысче бижиптер — деп, Питер чугаалаан. — Бис ону боттарывыс ажып эртип шыдавас бис.

Оон улуг акызы биле угбазы барып, профессорнуң кабинединиң эжин соктаарга, ол: «Киринер!» — деп харылааш, олудундан турup, сандайлар эккеп бергеш, ам чүгле олар-бile чугаалажырынга беленин илергейлээн. А ооң соонда ол салааларын тудуштуруп алгаш, оларниң чугаалаан төөгүзүн эгезинден төңчүзүнгө чедир, чангыс сөс-бile-даа үзе кирбейн, дыңрап алган. Олар чугаазын төндүрүптергэ-даа, ол элээн үр ыыт чок олурган. Оон хөрээн ажыдып чөдүргүлээш, уругларның дыңнаар бис деп барык-ла манавааны чүве чугаалаан.

— Дунмаңарның чугаазы шын эвес дээрзин сiler канчап билдинер? — деп, ол айтырган.

— О, ындыг болза — деп, Сүүзен эгелеп алгаш, соксап каан. Кырган профессорнуң арнында-ла ооң шүпту шын сеткинден айттырып турары илдең болган. Сүүзен бодун туттунуп: — А Эдмунд болза анаа-ла ойнап турдувус диди — дээн.

— Ийе — деп, профессор чөпшээрешкен, — ону маргышдаа чок кичээнгейге алыр херек. Ынчалза-даа айттырым дээш хомудай бербес-ле боор сiler, чүү деп бодаар сiler, көрүп эрткениңерден алыр болза, кымга бүзүреп боорул — дунмазы уругга бе азы оон акызынга бе? Оларның кайзыы ак сеткилдигил?

— Хамык ужур ында-ла болгай, профессор — деп, Питер харылаан. — Амдыгаа чедир мен боданмайн-даа Лүүси деп харылаар турган ийик мен.

— А сээции-бile ол кым боорул, кызым? — деп, профессор, Сүүзенче эргилип келгеш, айттырган.

— Аа, мен черле Питер-бile чөпшээрежир кижи мен, ынчалза-даа ол бүгү шын бооп болбас-ла болгай... арга болгаш кижи-хуна дугайында...

— Билбес мен, билбес мен — деп, профессор чугаалаан.

— Ындыг-даа болза, сilerге кажан-даа мегелеп көрбээн кижиини мегечи деп буруудадыры шүпту-ла оюнчук эвес-тир.

— Херек оон-даа дорайтай бээринден коргуп тур бис — деп, Сүүзен чугаалаан. — Бис бодаарывыска, Лүүсиниң угааны баксыраан хире.

— Оон угааны тений берген деп бодадыңар бе? — деп, профессор шөллээн айттырган. — Че, ол дээш шүпту-ла дүүрөвейн барып болур сiler. Дунмаңарже көргеш, ооң-бile чугаалажыргала, ооң угааны анаа деп чүве көскү-дүр.

— А ынчаарга... — деп, Сүүзен эгелеп чоруй, ара соксап каан. Оларның профессордан дыңнаан чүвэзин улуг кижи канчап чугаалаарыл! Уруг ону даап бодап безин шыдавас болгаш, ам чүү деп-даа бодаар айын тыппайн турган.

— Логика! — деп, профессор оларга-даа эвес, бодунга чугааланган. — Чүгэ-ле боларны демги школаларынга логиктиг боданыр кылдыр ёөретпес ирги? Уш борбак болгу дег чүүл бардыр: азы сilerниң дунмаңар мегелеп турар, азы ол тенек аарый берген, азы ол шынын чугаалап турар. Оон кажан-даа мегелеп чорбаанын билир сiler, кым-даа көөр болза, ооң угааны сээден-невээн-дир. Ындыг болганды, биске кандыг-бир чаа барымдаалар тыптып келбээн шаанда, ол шынын чугаалап турар деп хүлээн көөр ужуурлуг бис.

Сүүзен профессор же ийи караа улгады берген көрүп турган, ынчалза-даа ооң арын-шырайының аянындан алырга, көңгүс баштактамайн турар хире.

— А ол бүгү канчап шын бооп болурул, дээрги? — деп, Питер айтырган.

— Сени чүү чүве дүвүрдип тур? — деп, профессор удур айтырган.

— Че харын, бирээде — деп, Питер чугаалаан, — бир эвес ол чурт ылап-ла бар болза, хеп шкавынче чоокшуулап келген бүгү улус чүге ону тыппайн турагыл? Бис шкафче бакылаарывыска, ында тоннардан өске, чүү-даа чок болганын чугаалаксап тур мен; ооң-бile Лүүси безин маргышпайн турган болгай.

— А ол дээрge чүл ынчаш? — деп, профессор айтырган.

— Канчап ындиг боор, дээрги, бир эвес кандыг-бир чүүл ылап-ла бар болза, ол кажан-даа тургай-ла.

— Кажан-даа бе? — деп, профессор база-ла айтырган, а Питер ацаа чүү деп-даа харылаар аайын тыппайн барган.

— А ынчаарга ўе? — деп, Сүүзен чугаалаан. — Ындыг чурт ылап бар-даа болза, Лүүсиге ацаа четкеш кээр ўе мырыңай турбаан-дыр. Ол бо өрээлден бистин барык соовус-бile үне халып келди. Ацаа бир минута хире безин турбаан боду хөй шак эрткен дээр-дир.

— Ооң чугаазыныц шынныын ол чүүл бадыткап тур — деп, профессор чугаалаан. — Бир эвес бажында өске, биске билдинмес делегайже ажыттынып турар эжик бар болза (а мен си-лерге бо дээргэ элдептиг бажынц деп, мен безин ооң дугайында долузу-бile билбес мен деп сагындырар ужурлуг мен), бир эвес, катаптап чугаалап тур мен, Лүүси өске делегайже чеде берген болза, ында ўе бодунуу-бile санаттынып турарында, ылангыя мензээ, кижи кайгаар чүү-даа чок. Өске делегайже турган үнер чеже-даа үр ышкаш сагындырар болза, ол аразында бистин үенинг каш-ла борбак секундазы эрткен бооп болур. Өске талазында, ол хире назылыг бичии уруг шак ындыг нарын чүүлдү боду канчап даап бодап алыр деп. Бир эвес ол баажыланып турган болза, шкафтан үнүп келгеш, си-лерге бодунун төөгүзүн чугаалап бээр бетинде, ацаа оон үр олурап ийик.

— А си-лер шынап-ла ынчаар санап турар си-лер бе, дээрги? — деп, Питер чугаалаан, — өске делегайлер бар деп... мында, бистен иийи базым хире чоокта?

— Ында бүзүрээр аргажок хире чүү-даа чок — деп, профессор карааныц шилин уштуп, чотпушаан харылаан. — Со-лунун аа, уругларны ам школаларда черле чүү чүвеге өөредип турар ирги — деп, ол иштинде химиренген.

— А бис канчалзывысса экил? — деп, Сүүзен айтырган. Ол сактырга, чугаа кол уг-шиинден өскээр барган ышкаш болган.

— Менде бир санал бар — деп, хенертен оларны аажок чүве эндевес көрүш-бile шивегейлевишаан, профессор чугаалаан. — Ол амдыгаа чедир кымныц-даа бажынче кирбээн, а ону боттандырар болза, багай эвес болур ийик.

— Кандыг? — деп, Сүүзен айтырган.

— Бодунун ажыл-хэрээн ылтыр, а өскенинче киришпес — деп, профессор чугаалаан. Чугаа ооң-бile төнгөн.

Ам Лүүсинин амыдыралы черле чиигей берген. Эдмунд ооң-бile өлүрүшпезин дээш Питер харагалзап турган, уруг-даа, өскелер-даа хеп шкавы дугайында чугаалажыр күзел шуут чок турган — ол тема элээн анчыг апарган. Сактырга-ла, бүгү ужу-ралдарныц төнчүзү келген дег. Ынчалза-даа ындыг эвес болган.

Профессорунуң бажыны — а ооң дугайында ээзи безин шоолуг билбес болгай — шаандагы база алдарлыг бажынч чүвэдир. Англияныц бүгү булуңнарындан улус ынаар чедип кээп, ону көөр чөвшээрэл айтырар турган. Ындыг бажынца дугайында тайылбыр дентерлеринде, оон туржук өөредилгэ номнарындаа бижип турары үндезиннig, чүгэ дээргэ ол бажынца хамаарышкан янзы-бүрү чугаалар нептеренгэй апарган — оларнын чамдызыы мээн ам си-лерге чугаалап берип турарым төөгүдэн-даа элдеп-чиктиг болдур ийин. Туристчи бөлүктөр келгеш, бажынцы



көргүзерин дилээрge, профессор оларны үргүлчү кирип аар, а бажында ажыл-агый эргелекчили Макриди угбай аалчыларны бүгү өррээлдерни кезип эдертил алгаш чоруп, чуруктар, дайынчы дериг-херекселдер болгаш библиотекада ховар номнар дугайында чугаалап берип турган. Макриди черле уругларже шоолуг-ла ээ көрбес болгаш, келгеннерни бажыңға эдертил чоруп турда, ону үзе кирер болза, хөңүн чок кижи турган. Уругларның келгени баштайгы эртенде-ле чыгыны ол Питер биле Сүүзенге: «Сактып алыңар — мен бажың көргүзүп турумда, мәэн караамга көзүлбес ужуулуг силер» — деп сагындырып каан.

— Бажыңны эргий кезип, хәй улуг улус-бile сөөртүнчүп, чартык хүн чидирер деп чүү чүвел ол — деп, Эдмунд чугаалаарга, арткан уш уруг оон-бile сагыжында чөпшээрешкен.

Макридинин демги сагындырынының ужун оларның ужуулдары катап база эгелей берген.

Бир-ле эртен, профессор-бile чугаа соонда каш хонук эрткенде, Питер биле Эдмунд дайынчы дериг-херекселдер көрүп, «Оларны кезектеп адырып шыдаар бис бе?» деп чаңгыс-ла айтырыгны боттарынга салып турда, өррэлчө Сүүзен биле Лүүси кире халчып келгеш:

— Чашты бериндер, бээр мөөң туристер эдерткен Макриди кел чыдыр! — деп алгыржы берген.

— Дүрген — деп, Питер чугаалаарга, олар дөртелээ ырак ханаже ыңай болган. Ынчалза-даа олар Ногаан өррэлди эрте маңнажып, библиотекага кээрge, мурнунда үннөр дыңналган, ынчангаш Макриди туристерни кол чада эвес, а артыы чада-бile эдертил бар чыдарын билип кааннар. А оон — азы аңгадааш бе, азы Макриди оларны тудуп аар деп баарга бе, азы Нарнияның билди-билии салдарын чедирип эгелээрge бе — олар кайнаар-даа халчырга, келген улус оларны ызыртыр сүрүп чоруп олуур дег болган. Адак сөөлүнде Сүүзен:

— Че, оларны-даа канчаар, бо туристерни. Эрте бергижеге чедир хеп шқавы турар өррэлчө чаштына берээли. Ынчаар кым-даа кирбес боор — дээн.

Ынчалза-даа уруглар ынаар кирип четтикпейн чыдырда-ла, даштын коридорда үннөр дыңналган... бир-ле кижи эжик ту-дазын сүйбап эгелээн соонда, олар көрүп турда-ла, туда долганип эгелээн.

— Шымда! — деп, Питер алгырган. — Оон ыңай баш су-гар чер чок-тур!

Оон ол шкаф эжин ажыдыптарга, дөртелээ ынаар сыңмарлажып киргеш, арай деп тыныш алыш, караңгыда чаштына бергеннер. Питер шкаф эжин шала дуглапкан, ынчалза-даа шуут хаай итпээн — угаанныг кижи ышкаш, ол бодун боду шкафка дуглап ап канчап-даа болбас дээрзин билир турганы билдингир.



VI АРГАЖЕ

- МАКРИДИ БО БҮГҮ УЛУЗУН ДҮРГЕН АППАРГАН болза — деп, Сүүзен сымыранган. — Мээн будум курлу берди.
- Нафталинзиг чыттың багайын! — деп, Эдмунд чугаалаан.
- Үзүт-ховаган чивезин дээш тоннаар карманнарын доддур нафталин суп каан чадапчок — деп, Сүүзен чугаалаан.
- Бо чүү чүве мээн ооргамче кадалып тур? — деп, Питер айтырган.
- Ой, соогун аа! — деп, Сүүзен чугаалаан.
- Ылап-ла соогун, эскербейн турган-дыр мен — деп, Питер чугаалаан. — Өл деп чүвэзин. Бо чүү боор? Бир-ле өл чүвэде олур мен. Өлүү кедереп-ле тур. Оол арай деп туруп келген.
- Үне берээли — деп, Эдмунд чугаалаан. — Олар чоруй барган-дыр.
- Ой-ой! — деп, хенертен Сүүзен алгыра каапкан.
- Бо канчап бардың? Чүү болду? — деп, артканнары айтырган.
- Мээн артымда ыяш тур — деп, Сүүзен чугаалаан. — Ойт, көрүңер даан!.. Чырып кел чыдыр...

— Шынап-ла — деп, Питер чугаалаан, — бээр көрүңер... боже база... Ойт, мында долгандыр ыяштар бар-дыр. А бистин адаавыста хар. Ийе, мен часпайн турар болзумза, бис черле Лүүсинин аргазында турар-дыр бис.

Ам ол дугайты чигзиниг артпаан — дөртөлээ хүннүн чырык херелдеринден caratterын шийип, аргада турганнын. Оларның артында тоннаар азып каан турган, а мурнуунда хар шыпкан ыяштар турган.

Питер Лүүсиже дүрген эргилип келгеш:

— Сенээ бүзүрревэним дээш өршээп көр. Менээ ыядынчыы аажок-тур. Эптеҗип аар бис бе — дээн.

— Үнчанмайн канчаар — деп, Лүүси чугаалаарга, олар хол тудушкан.

— А ам чүнү кылыр бис? — деп, Сүүзен айтырган.

— Кылыр че? — деп, Питер харыылаан. — Билдингир херек-тир, аргаже хайгылдан киргей бис.

— Ой — деп, Сүүзен буттарын тепсенигилевишаан чугаалаан, — мында соогун! Бо тоннарны кедип аар-дыр че.

— Олар бистии эвес — деп, Питер шиитпирлиг эвес шөйген.

— Биске кым-даа чүве дивес — деп, Сүүзен удурланган.

— Бис оларны бажындан үндүрөр дээн эвес бис. Шкафттан безин ужуулбайн турар-дыр бис.

— Мен ол дугайында бодаваан-дыр мен, Сүү — деп, Питер чөвшээрэшкен. — Үнчар бодаар болза, сээний шын болбааже. Бир эвес сен тонну азып каан шкавындан ужуулбаан болзуңа, ону оорлаан дээш сени кым буруудадырыл? А бо чурт бүрүнү-бile хеп шкавынга сыңып турар хире.

Сүүзенниң саналы сарыылдыг боорга, олар ону допдораан боттандырган. Тоннар уругларга улуг болуп, олар кедип аарга, ээжектерге чедип турган, ынчангаш анаа тоннаар эвес, а хааннар кедер узун тоннаар ышкаш сагындырган. Уруглар дораан-на чылыга берген, олар бот-боттарынчे көрүшкеш, чаа хептери оларга-даа база оларны долгандыр турар черниң аянхевирингэ-даа тааржыр-дыр деп шиитпирлээннер.

— Арктиканың шинчилекчилери ышкаш бооп болур-дур бис — деп, Лүүси чугаалаан.

— Маңаа ол чокка-ла солун болур боор — деп, Питер чугаалааш, арганың ханызынче баштай шимчеп үнүпкен. Ол аразында аар куу булуттар дээргэ бөлдүнчүп келген — удавайн хар катап база чаар хире болган.

— Даынчацарам — деп, хенертен Эдмунд чугаалаан, — фонарь чанынче чеде бээр болзуусса, солагай талаже ээпсивиссе эки.

Ол маңаа бир дугаарында келген кылдыр баажыланыр ужурлуун Эдмунд хензиг када уттупкан. Ол сөстерни чугаалапкаш-ла, бодунун чажыдын билдирил алганын билип каан. Шупту уруглар черже кадап каан дег тура дүшкеш, олчекезе кайгап эгелэн. Питер сыгырыпкан.

— Ынчарга сен маңаа кээп турган ышкакыл сен — деп, ол чугаалаан. — Лүү сээн-бile аргага ужурашканын чугаалалтурда... дунмаң мегелеп турар деп шынзыдып турган сен але!

Шип-шимээн апарган.

— Шынап, ындыг чудек-бужар хейни, ындыг хаванны... — деп, Питер эгелеп чоруй, эктин кыскаш, ыттавайн барган. Шынап-ла, бо таварылгада чүү дээр боор! Бир минута болгаш, дөртэлээ катап база орук-суурже үнүүкеннер. «Ажырбас — деп Эдмунд боданган, — аксыныц кежий дудаан адыыргакпайлар, бүгү чүве дээш мен силерден орнун эгидип аар мен!»

— Черле кайнаар бар чыдарывыс ол? — деп, Сүүзен, колдуунда-ла чугаанын уг-шиин өскертir дээш, айтырган.

— Мен бодаарымга, Лүү бистиц кол киживис болур ужурлуг. Ол ону чедип алган-даа. Лүү, сен бисти кайнаар аппаар сен?

— Тамнус акый-бile барып ужуражылынарам — деп, Лүүси чугаалаан. — Силерге чугаалап турганым аянныг кижихуна ол-дур ийин.

Арткан уругларда удурланыпкы дег чүве чок бооп, буттарын тепсемишаан, бурунгаар дүрген базып чоруканнаар. Лүүси эки орук баштакчызы болган. Баштай ол оруун тыппайн баарындан коргуп чораан, а оон бир чөргө элдептиг ээмек ыяшты, өске чөргө төжекти танып каан, ынчар-ла олар тейлер аразында бичии чоогада дээрги Тамнустуң кую турар чөргө чедип кээп, оон аксында барганаар. Ынчалза-даа оларга орта ажыттынган коргунчуг байдалды олар шуут-ла манавааннаар.

Эжикти шүнчүүндөн дүжүр тырткаш, буза шаап каапкан болган. Кий иштинде караңгы, соок болгаш шык болуп, каш хонук дургузунда кым-даа чурттаваан бажында дег чытталып турган. Кайда-даа хар бир-ле кара чүве-бile холуштур чыткан, а кара чүве дээрге камин-одагның хүлү база от кезектери болган. Бир-ле амытан хып чыткан ыяштарны куйну бир кылдыр тарай октагылапкаш, оон отту өжүр таптап каапканы илден. Шаллада аяк-сава бузундулары уш-баш чок чыткан, кырган кижихунаның чуруун бижек-бile кезип каапкан болган.

— Хайлыг, чоруувус аайлашпаан-дыр — деп, Эдмунд чугаалаан. — Бээр хей-ле келген-дир бис.

— А бо чүл? — деп, Питер доңгайбышаан чугаалаан. Хевис өттүр мырыңай шалаже кадап каан калбак саазынны ол ам чаа көрүп каан.

— Ында кандыг-бир чүве бижээн-дир бе? — деп, Сүүзен айтырган.

— Ийе, бижээн ышкакш-тыр — деп, Питер харылаан.

— Ынчалза-даа мен чунуң-даа номчуп шыдавас-тыр мен, мында каранғызы аажок-тур. Чырык черже үне берээлем.

Олар күйдан үнгеш, Питерни долганып келген. Оон оларга номчуп берген чүүлү бо-дур.

«БО ОРАН-САВАНЫҢ БИЕЭГИ ЭЭЗИ,
ТАМНУС КИЖИ-ХУНА, ТУТТУРУП
ХОРУГДАТТЫРГАН. КҮРҮНЕГЕ УДУР
ӨСКЕРЛИКЧИ ЧОРУК ДЭЭШ БАЗА
ДЭЭРГИ ИМПЕРАТРИЦА МЫНДААГЫЛАР
ДЖЕДИС, НАРНИЯНЫҢ КАДЫНЫ, КЭР-
ПАРАВЕЛДИН ЧАГЫРЫКЧЫЗЫ БОЛГАШ
ОЗАЛААШ ОРТУЛУКТАР БАЗА ӨСКЕ-
ДАА ЭЭЛЕЛ ЧЕРЛЕРИНИҢ ЭЭЗИНГЕ
ШЫНЧЫ ЧОРУКТУ ҮРЭЭНИ ДЭЭШ, А ОЛ
ЫШКАШ ШИВИШКИННЕРГЕ ХОРГАДАЛ
БЕРИП, ДЭЭРГИ МЫНДААГЫЛАРНЫң
ДАЙЗЫННАРЫН ХҮНДҮЛЕП, КИЖИ
АМЫТАННАР-БИЛЕ НАЙЫРАЛДАЖЫП
ТУРГАНЫ ДЭЭШ ШИИТКЕЛДИ ОЛ
МАНАП ТУРАР.

АТ САЛГАН: *Мохтим*, чажыт айыыл чок
ЧОРУК АЛБАНЫНЫң КАПИТАНЫ.

КАДЫН ДЕЛГЕРЕЗИН!

Уруглар бот-боттарынчे кезе кайгашкан.

— Бо чер мәэн сагыжымга шоолуг-ла кирбеди ышкаш — деп, Сүүзен чугаалаан.

— Кадын деп кымыл ол, Лүү? — деп, Питер айтырган. — Сәэн ол дугайында билир чүвөн бар бе?

— Ону кандыг кадын дәэр боор — деп, Лүүси харылаан.

— Ол дәәрге коргунчуг кара илбичи херәэжен, Ак Кадай-дыры. Арганың бүтү чурттакчылары ону көөр хөннү чок. Ол чуртту илбилеп каапкан, ынчангаш ам мында кезэеде кыш турар; кыш бар, а Чая чыл-даа, час-даа чок.

— Ажыы бар бе, билбес-тири мен, оон ыңдай чораан ажыы бар бе? — деп, Сүүзен чугаалаан. — Мында ындыг-ла айыыл чок эвес-тири, биске маңаа хөглүг болур хире база эвес-тири. Бичии болгаш-ла, соогу дендей бәэр-дир, чиир аыш-чем албаан-дыры бис. Эәп чана бергенивис дәәре боор.

— А бис ам чана берип шыдавас бис — деп, Лүүси чугаалаан, — сен ону билбейн тур сен бе? Бис анаа-ла мынчаар дезе берип шыдавас бис. Құжүр кижи-хуна мени дәәш айыылга таварышкан-дыры. Ол мени Ак Кадайдан чажырыпкаш, чанар оруумнұ айтып берген болгай. «...шивишкіннерге хоргадал берип, кижи амытаннар-бile найыралдажып турган...» деп сөстерниң утказы ол-дур. Бис ону камгалап аарын қызыдар ужурлуг бис.

— Бис бо таварылгада чүнү қылыштар бис — деп, Эдмунд химиренген. — Чиир аыш-чемивис безин чок ышкажды.

— Аксың тырт... сен! — деп, Питер ону үзе шапкан. Ол Эдмундуға ам-даа аажок хорадап турган. — А сен чүү деп бодаар сен, Сүү?

— Чеже-даа коргунчуг болза, Лүүнүң шын чугаалап турарын билир тур мен — деп, Сүүзен харылаан. — Чаңгыс-даа базым бурунгаарлаар хөннүм чогул, бистин бәэр келгенивис дәәш хараадап тур мен. Ыңчалза-даа мен бодаарымга, бис дәәрги... оң ады кым ийик моң? Кижи-хунага дәәрим ол, дузалаар ужурлуг бис деп тур мен.

— Мәэн бодалым база-ла ындыг — деп, Питер чугаалаан. — Бисте аыш-чем чогу мени дүвүредип тур, бажындывыстан бир-ле чем аймаа ап, чангаш кәэрин саналдап болур ийик мен; чүгле бо чурттан үнүп чоруй баргаш, ынаар катап кәэп шыдавайн баары-выстан коргуп тур мен. Ыңчангаш ам оон ыңдай чоруур апаардыры бис.

— Бис база ынча деп санап тур бис — деп, уруглар деткәэн.

— Хөөкүйнү кайда хоругдал қаанын билир турган болзу-вусса! — деп, Питер чугаалаан.

Эләэн каш минута иштинде шупту ам чүнү қылышын боданып, ыыт чок турганнар. Хенертен Лүүси чугаалаан:

— Көрүнег даан! Кызыл хөректиг күшкашты көрүп тур силер бе? Мәэн маңаа көргеним баштайты күшкаш бо-дур. Солунун аа: мында, Нарнияда, күштар чугаалап билир ирги бе? Ону даштындан көөрге, биске бир-ле чүве чугаалаксаан дег-дир.

Лүүси күшкашче эргилип келгеш:

— Әршәэп көрүнег, күшкажды, кижи-хуна Тамнус акыйны кайнаар аппаратан ирги, биске дыңнадып шыдаар силер бе? — деп айтырган.

Ону чугаалавышаан, ол күшкашче бир базым қылган. Күшкаш дораан ужа берген, ыңчалза-даа ырадыр эвес, а чүгле кожа ыяшче. Ол аңаа будукка хонуп алгаш, уругларның чугаалаан бүтү үүвезин билген-даа дег, оларже топтап көрген. Боттары ону әскербейн, уруглар күшкашче каш базым ზоокшулап келген. Күшкаш ыңчан база катап кожа ыяшче ужа бергеш, оларже ам база топтап көрген. Уруглар шак ындыг қызыл хөректиг база ындыг қылан карактарлыг күшкашты қажан-даа көрүп көрбәэн.

— Билдиңер бе — деп, Лүүси чугаалаан, — мен бодаарымга, ол биске ону әдерзин деп турар хире-дир.

— Мәәни-бile база — деп, Сүүзен чугаалаан. — А сен чүү деп бодаар сен, Питер?

— Чүл ынчаш? Шенеп көрзүвүссе — деп, Питер харылаан.

Күшкаш ол бүгүнү билип қаан ышкаш болган. Олардан каш базым бурунгаар черге бир ыяштан өске ыяшче ужуп эртип,



уруглар ооң соо-бile чоруп шыдаар қылдыры дыка ыравайн турган. Ыңчалдыры күшкаш уругларны ырадыр аппаратла чыткан. Ол будукка хонуптарга, оор-тан черже харжыгаштар дүжүп бадып турган. Удавайн оларның қырында булаттар тарай берип, кышкы хүн көстүп келген; хар чайынналчак ак апарып, карак чылчырыктап әгеләэн. Олар ыңчалдыры чартык шак хире чоруп келген, уруглар — мурнунда, а оолдар — соонда. Ыңчан Эдмунд Питерже эргилип келгеш:

— Мени дыңнаарын болгаар болзуңза, сенээ бир-ле чүве чугаалаар мен — дээн.

— Чугаала — деп, Питер харылаан. — Кыш-ш, үнүң дыңзытпа, уругларны коргуткан хэрээ чок. Бистиң чүнү кылып турарыбысты билип тур сен бе?

— Чүүже? — деп, Питер база сымыранган. — Орук баштакчызының дугайында чүнү-даа билбес боттарывыс ону эдерип чоруп-ла ор бис. Бо күшкаш кымның талазында дээрзин канчап билип аар бис? Ол бисти какпа-дузакче аппар чыдар чадавас.

— Ындыг болза, херек багай-дыр. Ынчалза-даа... күшкаш... Мээн номчааным бүгү номнарда кызыл хөректиг бо күшкаштарның аажы-чаңы эки. Бо күшкаш база буяның талазында деп бузурраар мен.

— Че, ол дугайында чугаа үнүп келген чүве болза, буяның талазы кайызындал? Сен чүге кижи-хуна чогуур талазында, а Кадын өске талазында деп бодаар сен? Ийе харын, биске Кадын дээргэ Кара илбичи Кадай-дыр деп чугаалаан-дыр. А мегелептип база болур-ла болгай, бис кымның-даа дугайында чүнү-даа эки билир эвес бис.

— Ынчалза-даа кижи-хуна Лүүнү камгалап каан-дыр.

— Камгалаан деп кижи-хуна боду чугаалаан-дыр. А бис ону канчап билир бис? Ам өске айтырыг бар-дыр. Моон канчап чана бээривисти билир сен бе?

— Пүү-хайт! — деп, Питер алгырыпкан. — Мен ол дугайында бодаваан мен.

— А дүштеки чемниң оода чыды безин чок — дээш, Эдмунд улуг тынгандан.



VII

КУНДУСТАР-БИЛЕ КАДЫ ЭРТТИРГЕН ХҮН

ХЕНЕРТЕН МУРНУНДА БАР ЧЫТКАН ИЙИ УРУГ чаңгыс үн-бile: «Ой!» — деп алгыржыпкан, доктаай бээргэ, оолдар сымыранчырын соксадыпкан.

— Күшкаждывыс! — деп, Лүүси хөлзеп алгырыпкан. — Ол ужуп чоруй барган-дыр!

Шынап-ла ындыг болган: күшкаш көзүлбейн барган.

— Ам канчаар бис? — деп, Эдмунд айтыргаш, Питер же «Сенээ чүү дижик мен?» дээнзиг көрүш октай каапкан.

— Кыш-ш... Көрүңер — деп, Сүүзен сымыранган.

— Чүү болду? — деп, Питер айтырган.

— Мынаар, ыяштар артында, бир-ле чүве шимчеп тур... дуу ында, солагай талада...

Уруглар ыяштарже топтал көрүп-ле турган. Оларның дүвүрээри-даа аажок.

— Катап база шимчей берди — деп, Сүүзен чугаалаан.

— Бо удаада мен база көрдүм — деп, Питер бадыткаан.

— Ол ам-даа ында тур. Дуу улуг ыяш артында барды.

— Ол чүү боор? — деп, кортпaaн хевир көргүзерин кызып, Лүүси айтырган.

— Чүү-даа болган болза — деп, Питер сымыранган, — ол бистен чаштынып турар-дыр. Ону эскерип каарывысты күзевин турары ол-дур.

— Чана берээлем — деп, Сүүзен чугаалаан.

Ынчан, кым-даа ону дыңналдыр чугаалаваан-даа болза, уруглар Эдмундуун Питерге мурнундагы эгеге сымыранып турган чүүлүн хенертең медереп билип каан — олар аза берген!

— Ол чүү чүвеге дөмей-дир? — деп, Лүүси айтырган.

— Ол... ол болза бир-ле аң-дыр — деп, Сүүзен чугаалаан.

— Көрүңер! Көрүңер! Дүрген! Ол бо-дур.

Ынчан олар шупту ыяш артындан бакылап турар сыйрый чолдак дүк-бile шыптынган салдыг хаайны көрүп каан. Бо удаада ол дораан-на чаштына бербээн. Харын-даа, аңчыгаш, «оожум» диксээн кижи олчаан, даванын аксынга дээскен. Оон база-ла чаштына берген. Уруглар тыныжын тыртып алган.

Бир минута болгаш, танывазы амьттан ыяш артындан үнүп келгеш, ону истеп көрүп турарындан корткан-даа дег, долгандыр хайгаарал көргүллээш: «Кыш-ш...» деп сымырангаш, оларны бодунун турганы шыргайже имнеп кый депкеш, чиде берген.

— Бо кымыл дээрзин билир мен — деп, Питер сымыранган.

— Мен оон кудуруун көрдүм. Кундус-ла-дыр.

— Оон чанынга чеде бээривисти манап турар-дыр аа — деп, Сүүзен чугаалаан. — Бисти шимээргевезин деп сагындырып база тур.

— Шынап-ла але — деп, Питер чугаалаан. — Одче баарбарбазывыс дугайында айтырыг туруп турар-дыр. Сен чүү деп бодаар сен, Лүү?

— Мен бодаарымга, ол эки кундус ышкаш.

— Эки-даа бооп чадавас, ындыг эвес-даа чадавас. Бис канчап билир бис — деп, Эдмунд чигзинген.

— Кандыг-чүү-даа болза, диттигип көөр бис бе? — деп, Сүүзен чугаалаан. — Манаа турарывыска дөмей-ле ажык чоктур... чөм чиксээrim база аажок.



Ол өйде кундус катап база ыяш артындан бакылап келгеш, оларны бодунче шудургу имнеп кый дээн.

— Бараалыцар че — деп, Питер чугаалаан, — оон чүү боорун көрээли. Бот-боттарыцардан ыравацаар. Дайзын-даа апаар болза, чангыс кундуска күш четпес эвес бис.

Ургулар бөкперлежип алгаш, ыяшче кылаштааш, оон артында барганин, а ында, оларның бодааны дег, кундус манап турган. Оларны көрүп кааш, аңчыгаш ол дораан шыргайның ханызынче киргеш, киргирээш үн-бile чугаалаан:

— Ам-даа бурунгаарлацар. Бээр боже. Ажык черге турары биске айылыдиг.

Кундус ургуларны эң шыргай, хадылар дыка чоок үнгенинден будуктары ораажып турар, а оларның доорзуу күзүрүм-бile дүй шыптынган, ынчангаш хар безин ынаар чагбас черже эдертип эккээрge, чугле ынчан оон чугаазы үнүп келген.

— Силер — Адамның оолдары, Еваның кыстары силер бе? — деп, ол айтырган.

— Ийе, оларның дөртү бис — деп, Питер харыылаан.

— Кыш-ш-ш — деп, кундус сымыранган, — дыңзыдыр чугаалавайн-на көрүңер. Манаа безин биске айыыл кыжанып турар.

— Айыыл че? Чүден коргуп тур силер? — деп, Питер айтырган. — Мында бистен өске кым-даа чок-тур.

— Үяштар бар-дыр — деп, кундус чугаалаан. — Бүгү чүвени кезээде дыңнат турар ыяштар. Оларның хөй кезии бистиң талавыста, ынчалза-даа бисти аңаа садыптып болур ыяштар база бар.

Ынчангаш кундус бажын чайган.

— Кым кымның талазындал деп чугаа турup келген болза — деп, Эдмунд чугаалаан, — силерни өңүүүвүс деп канчап билир бис?

— Турамык деп бодай бербенер аа, Кундус акый — деп, Питер немеп каан, — ынчалза-даа бодунар билир силер — бис мында чаа келген улус-тур бис.

— Черле чөптүг, черле чөптүг — деп, кундус чугаалаан. — Мээн таныдыглыг демдээм бо-дур.



Ыңча дээш, ол уругларже бичиижек ак кезинди пөс сунган. Олар олче элдепсинип көрүнгөн, а Лұуси ынчан хөлзеп алтырыпкан:

— Ах, ынчанмайын канчаар! Бо дээрге мәэн думчук аржылыым-дыры. Күжүр Тамнус акыйга арттырып кааным aan.

— Ылап-ла шын — деп, кундус бадыткаан. — Хөөкүйнү! Ону хоругдаар деп турар дугайында медәә дыңнааш, ол бо аржылыды менәә берип каан чүве. Бир эвес оон-бile айыыл болу берзе, менәә сilerни уткуп алгаш, оон эдертип чедире бәэр ужуруумну ол чугаалаан чүве... — Кундус борта ыыт чок баргаш, чүгле бажын чажыт шинчилиг эләэн каш катап соганнаткан. Оон оон салы уругларның арыннарынга мырыңай дәэп турар кылдыр оларны улам чоокшуладыр имнеп кый деп алгаш, арай деп дыңналыр сымыранышкын-бile немеп каан: — Аслан бисче үнүпкен, орукта дәэр-дир. Ол эрикче дүжүп келген-даа чадавас.

Ыңчан элдептиг чүүл болган. Уруглар Аслан дугайында сilerниң билириңдерен хәйнү билбес-даа болза, кундус ол сөстерни чугаалаары билек, оларның кайызын-даа онзагай мederәшкін хаара тудупкан. Сiler-бile дүжүнерде ындыг чүве болган чадавас: бир-ле кижи сilerге билдинмес сөстер чугаалап турар, а сiler ол сөстерде аажок улуг утка барын мederеп билип чыдар сiler; ол сөстер чамдықта коргунчуг кылдыр сагындыраар, уйгу ыңчан коргунчуг дүшче шилчий бәэр, а чамдықта — сөс-бile илереттимес кайгамчык чараши кылдыр сагындыраар, ыңчан ол дүшту бүгү назыныңарда утпайн сактып, кажан-бир шагда оны катап көрүксеи бәэр сiler. Ам база шак-ла ындыг болган. Аслан деп ат дыңналырга, уруглар шупту иштинде бир-ле чүве серт кылынганын эскерип каан. Эдмундуң тайылбырлаттынмас коргуушкун хаара тудупкан. Питер бодунуң анаа эвес дидимин, кандыг-даа айыылды уткуурунга беленин билип каан. Сүүзенге агаарда чаагай чыт тараап, кайгамчык хөгжүм дыңналган ышкаш болган. А Лұуси, кажан сен эртен оттуп келгеш, бөгүн школачы дыштанылғаның бирги хүнү деп сактып кәэрингө, турары дег сеткиишкінніг апарган.

— А Тамнус акый канчалғаныл? — деп, Лұуси айттырган.
— Ол кайдал?

— Кыш-ш — деп, кундус чугаалаан. — Манаңар шинме. Мен silerни аңаа таптыг чугаалап бәэрим база... дүштеп ап болур чөрже бәэр ужурулуг мен.

Ам шупту улус, Эдмундуңдан аңғыда, кундуска бүрүнү-бile бүзүрөй берген, олар шупту, Эдмунду-даа ышкаш, «дүштәэр» деп сөстү өөрүшкү-бile дыңнаан. Ыңчанга уруглар оларны эң сырый шыргайлар аразы-бile аажок дүрген эдерткен чаа өңиүүнүң соондан арай боорда четтигип, далаш-бile бар чыткан. Олар бир шак хире чоруп келгеш, дыка шылап, аажок аштай берген, а оон хенертен оларның мурнунда ыяштар орук чайлап, а орук кудургайлап эгеләэн. Бир минута болгаш, олар ажык дәэр адаанда турган — хүннеп турар хевәр — оларның мурнунда көстүп турар бойдус чуруу кедергей каас-чараш болган.

Уруглар кызаа, хенертен кудургайлап баткан чоога кыдының турган, оон дүвүнде хем агып бадып чыткан — ылавылаарга, дошталы бербәэн болза, агып бадып чыдар ийик — эләэн калбак хем. А мырыңай буттар адаанда хемни боогдал чал дүй чыдыркан. Ону көргеш, уруглар кундустар үргүлчү чалдар тударын сактып кәэп, бо чалды дәэрги Кундус тутканы ылап боор деп бодааннар. Олар оон ынай оон шырайында өжегәэр көргүскең дег биче сеткил тыпты бергенин эскерип каан: ындыг шырай боттарының холу-бile ажаап өстүрүп алган садын өскелерге көргүскең азы бодунуң бижән номун сilerге номчаан улуска турар. Анаа хүндүләәчел чорук Сүүзенни: «Кандыг кончуг кайгамчык чал боор!» — дәэринче албадапкан. Бо удаада дәэрги Кундус: «Кыш-ш» — дивейн, а: «Ол чүү дәэринер ол, бо дәэрге анаа бөдүүн чүве ышкаждыл. Артында-ла доостунмаан ажылдыр» — деп каан.

Чалдың үстүнде терең салдам, ылавылаарга, бир шагда ындыг сүглүг чөр турган, а ам уруглар каранғы ногаан оргу дош кыры көрген болбайн канчаар. Чалдың адаанда, дөвүн күду, база дош чыткан, чүгле ол оргу эвес, а эң-не элдеп-чикиг дүрзү-лерлиг — сооктуң кончуг дүрген тудуп каапканы көвүктүг сүг шуралгаадыр ийин. Оон мурнунда сүгнүң чалды ажа шурап азы ону өттүр агып турган чөринде ам хар дег аккыр чигирден кылган чечектер, өрүглүг боодал чечектер дег дошталган дамдылар ханазы кылан наан. Чалдың дал ортузунда улуг ары өө ышкаш каттырынчыг бажыңчыгаш турган, оон крыйазында үттен ыш бургуралан. Ол ыш, ылаңгыя сiler аш болзуңарза, дүштеки чөм дугайында бодандырып кәэр, ыңчанга чөм чиксәриңер дам баар.

Уругларның көрген чүвези ол-дур. А Эдмунд өске чамдык чүүлдер база эскерген. Хемни күду бичии бада бәэрge, олче

өске улуг эвес чоогалап баткан адырык киир агып чыткан. Ынаар көргеш, Эдмунд иий тейни эскерип кааш, Ак Кадынның оон-бile фонарльыг адагаш чанынга байырлажып тура, анаа көргүскени иий тей ол-дур деп барык-ла бүзүрөй берген. Ындыг болганда, ол иий тей аразында, мөн бир километр хире черде, оон ордузу туарар-дыр деп ол боданган. Оол рахат-лукум дугайында база хаан апаарының дугайында сактып келген. «Питерге ол бүгү тааржыр ирги бе?» деп ол боданган. Ынчан оон бажынга коргунчуг бодалдар кирип келген.

— Че, чедип келгенивис бо-ла-дыр — деп, Кундус чугаалаан. — Кадайым Кундус бисти манап туар ышкаш-тыр. Мени эдеринер. Оваарымчалыг болуңар, тая бердинер халак.

Чал кыры ону кырлап болур хире делгем болган, ынчалзадаа ында сеткил ханар хире чүве эвээш, чүте дәэрge орукту дошта изеп каан, а доңа берген салдам бир талазында чал-бile чанғыс деңелдиг болза-даа, өске талазында кадыр эл бар. Уруглар ынчалдыр дәэрги Кундустүн соо-бile шууштур чоруп оргаш, чалдың ортузунга чедип келген, а оортан дыка ырадыр хемни өрү база дыка ырадыр хемни куду көрүп болур турган. Олар чалдың ортузунга четкеш, кундустар бажыңчыгажының эжининг келген.

— Бис-даа бажында келдивис-ле, авазы — деп, эр Кундус чугаалаан. — Мен оларны тып алдым. Бо-дурлар — Адам биле Еваның оглу-кызы.

Уруглар оон бажыңче кирип келген.

Лүүсинин бир дугаар дыңаан чүүлү — ыыткыр эвес шартылаан ыыт, а бир дугаар көрген чүүлү — дижинде удазын ызырып алгаш, даараныр машинада бир-ле чүве даарап олурар чаагай сеткилдиг хөрээжен кундус болган. Шартылаан дааш машинаны бооп-тур. Уруглар өрээлчे кирип кәэри билек, бажыңың хөрээжен ээзи дааранырын соксадып, туруп келген.

— Ам-на чедип келдинер аа! — деп, ол, сыйыгларлыг кырган даваннарын оларже сунмушаан, алтыра каапкан. — Ам-на! Бо хүнгө чедир чурттапканым ол-дур, элдеп-ле аа! Кartoшка хайнып тур, хөнек сыйырып эгеледи... Ачазы, биске балыктан тудуп эккеп көрүнерем.

— Күзелдиим-бile — деп харылааш, эр Кундус кочалын туткаш, бажыңчыгаштан уне берген, Питер ону эдерип чорупкан. Олар салдамның дош шывыын кырлап, Кундустүн хүннүң-не балдыжыгаш-бile катап буза шаап ап турганы бичии хараалчаже четкеннер. Кундус хараалчаның эриинге



олуруп алгаш — соок ацаа чүү-даа эвес хире болган — сүгже кезе кайгап эгелээн. Хенертен ол даванын сүгже супкаш, Питер «ах» деп четтикпээнде, тулган-даа балыкты ушту тыртып келген. Оон база, оон база — кочалы долгужеге чедир.

Ол аразында кыс уруглар кыс Кундуска дузалажып эгелээн: олар столга аыш-чем салып, хлеб кезип, тавактарны духовкаже чылыктыр суп, эр Кундуска хана чанында туар доскаардан аажок ишкир дашкага пиво кудуп берип, отче сковородка салып, чаг эргизип турганнар.

«Кундустарның бажыңчыгажы кижи-хунаның куюнга шуут-ла дөмей эвес-даа болза, аажок таарымчалыг-дыр» деп Лүүси боданган. Өрээлде номнар-даа, чуруктар-даа чок. Анаа оруннар орнунда — корабльда ышкаш, ханаже киир тудуп каан оруннар. Дээвиирден борбак эльттер база дизиг согуналар халаңнаан, ханалар дургаар резин сапыктар чыскаалган, дээктэрде хана-карактыг плащтар астынган, балды, хүүрек, мастероктар чыткылаан, сыйрткыныштар болгаш чугай хайылдырар деспи турган, четкилер болгаш шоодайлар уш-баш чок чыгдынган чыткан. Стол шывыын арыг бөдүүн пөстен кылган болган.

Сковородкада чаг хөглүг дазырткайнып эгелээнде, өрээлче Питер биле эр Кундус иштин аштап каан балыктар туткан кирип келген. Чая туткан балыкты быжырарга, кайы хире амданнныг чытталып, ол бүгү белеткелден аштааны дам барган уругларнын чаак суу сайырап турганын даап бодап болур силер.

Адак соонда эр Кундус: «Ам-на чем белен болду» — дээн. Сүүзен картошканы эзип каапкаш, сакпыңын кургадыры-бile суугу кыдынычесалып каан, а Лүүси кыс Кундуска балыкты столче салышкан. Бичии болгаш, бажың ээлери, аалчылар борбак сандайларын столче чоокшуладыр идип алгаш — өрээлде кыс Кундустүн олурча чайганды хуузунда сандайындан ангыда, чүгле үш буттүг борбак сандайлар бар турган — аыш-чемни амданнанып чииринге белеткенип олуруп алганнар.



Столдун ортузунда уруглар ижер хоюг сүттүг донға турган, а эр Кундус пивога шынчы бооп арткан, база аажок улуг борбак сарыг саржаг чыткан, ону картошкаде чежени-даа салып ап болур. А чырык чер кырында чүгле чартык шак бурунгаар туткаш, чүгле бир минута бурунгаар сковородкадан дүжүрген хем балындан амданның чүү барыл деп уруглар боданып турган, мен база олар-бile черле чөпшээрешпес аргам чок. Олар балыкты чип доозупканда, херээжен Кундус — хенертен болган чүүл

ол-ла болгай! — духовкадан аажок улуг, изии чалынналып турар повидлолуг рулет уштуп келгеш, ол дораан отче хөнек салып каан, ынчангаш уруглар рулетти төндүр чипкенде, шай кудуп ап болур турган. Бодунун аян ап алган кижи бүрүзү борбак сандайын столдан ыңай идип, ооргазы-бile ханага чөленипкеш, сеткил ханышкын-бile улуг тынган.

— А ам — деп, эр Кундус, пиво ижер куруг дашказын столче салташ, шайлыг аякты бодунче чоокшулатышаан чугаалаан, — адыр, даңзамны кыпсып аарымны манаар болзуңарза, чүү боор, катап база ажыл-херекче кирип боор-дур. Хар ам база чаай берди — деп, ол соңгаже хыйыртааш, чугаалаан. — Харын эки-дир, манаваанывыс аалчылар келбес, а бир эвес кандыг-бир амытан бисти тудуп алысаар-даа болза, ол ам изивисти тыппас.



VIII

ДҮШТЕКИ ЧӨМ СООНДА ЧҮҮ БОЛГАНЫЛ

— А АМ — ДЕП, ЛҮҮСИ ОО҆ СООНДАН КАТАПТААН, — буюн болзун, Тамнус акыйй-бile чүү болганын биске чугаалап берип көрген болзуңарза.

— Ах — деп, эр Кундус улуг тынгаш, бажын чайган. — Дыка-ла муңгаранчыг төөгү чүве. Ону полиция тудуп аппарган, мында кандыг-даа чигзиниг чок. Ол бүгүнү көрүп турган күшкүш менээ дыннатты.

— Тудуп аппарган? А кайнаар? — деп, Лүүси айтырган.

— Оларны сөөлгү катап көргенде, сонгу чүкче углай бар чытканнар-дыр, ол чүү дээнил дээрзин бис шупту билир бис.

— Силер билир силер, а бис — чок — деп, Сүүзен удурланган. Эр Кундус база катап бажын муңгаргай чайган.

— Тамнусту Ак Кадайның ордузунче аппарган боор деп коргул тур мен.

— А аңаа ону канчап кааптарыл? — деп, Лүүси хөлзеп айтырган.

— Че, шуут тодаргай чугаалаары болдунмас — деп, эр Кундус чугаалаан. — Ындыг-даа болза, ынаар аппарган амытаннارдан

катап база көстүп келгеннери ховар. Көжээлер. Ында көжээлерле эмгежок дээр чораан — херим иштинде шөлдэ, улуг чадада, залда (ол доктаай бергеш, сырбаш кылынган)... Ак Кадайның даш кылдыр хуулдурупканы дириг амытаннар.

— Ах, дээрги Кундус! — деп, Лүүси алгырыпкан. — Бис шыдавас бис бе... Тамнус акыйны ыяап-ла камгалап аар ужурлуг бис деп чугаалаксап тур мен. Ол бүгү коргунчуг-дур... артында-ла мээн ужумда.

— Шыдаар турган болзунза, ону камгалап аар ийик сен, мен аңаа чигзинмейн тур мен, чараптай — деп, кыс Кундус чугаалаан. — Ынчалза-даа ол ордуже бодунуң күзел-соруунга чөрүштүр киргеш, оон бүдүн-бүрүн үнер деп де! Аңаа идегээн-даа хэрээ чок.

— А бир эвес кандыг-бир кажар арга бодап алза? — деп, Питер айтырган. — Мынчалза дээрим ол-дур ийин: өске-бир кижи кылдыр кеттинип алза, бис... улчумал садыгжылар азы оон өске улус бооп баажыланыпсызысса... чок-ла болза чаштына бергеш, Ак Кадайның бир-ле черже чоруй баарын манап алза... чок-ла болза... кандыг-бир арга канчап турбас деп! Ол кижи-хуна бистиң дунмавыс уругну бодунуң амы-тынын айылга таварыштырышаан камгалап каан-дыр, Кундус акый. Ол калыр кылдыр, Ак Кадай ону ынчаар аажылаар кылдыр, бис ону анаала каапкаш барып шыдавас бис.

— Ажыы чок чүве-дир, Адамның оглу — деп, эр Кундус харыылаан. — Шенээн-даа хэрээ чок, ылангыя силер дөртке. А ам, Аслан орукта чорда...

— О, че! Аслан дугайында биске чугаалап беринерем! — деп, ол дораан элээн каш үн дыңналган, уруглар база катап элдептиг сеткилге хаара туттурупкан — сактырга, агаарга час чытталган-даа дег, оларны таварылга болган өөрүшкү манап турган-даа дег болган.

— Аслан деп кымыл? — деп, Сүүзен айтырган.

— Аслан че? — деп, эр Кундус катаптаан. — Билбес силер бе, кай? Арга-эзим ээзи. Ынчалза-даа Ол Нарнияга удаа-дараа кээп турбас. Мен турумда-даа, мээн ачам турда-даа, ол маңаа кээп көрбээн. Биске Ол ээп келген деп медээ дыңналган. Ол ам мында. Аслан Ак Кадайга көргүзүптер. Тамнус акыйны өске кым-даа эвес, Ол камгалап аар.

— А Кадын ону даш кылдыр хуулдуруплас бе? — деп, Эдмунд айтырган.

— Кенен айтырыг-дыр! — деп, эр Кундус алгырыпкаш, тадыладыр каттыра берген. — Ону даш кылдыр хуулдурага де!

Бир эвес Ак Кадай Асланның көрүжүн ууптуп, кортканындан кәэп дүшпес болза, экизи-ле ол. Оон хөйнү ол кулугурдан манаан-даа хөрөэ чок. Аслан маңаа корум-чурумну тургузар; шаандагы бир чугаада мынча дээни дег болур:

*Аслан кээргэ-ле, чөптүг чорук катап тургустунар.
Ол ырланытарга, мунгагдал тишлөттириер.
Аслан диштерин арзайтыптарга, кыш кызырлыт эгелээр.
Ол челин силгиптерге, час бисчэ эглип кээр.*

Ону көрүп кааш, бүгү чүвени боттарынар билип каар сiler.

— А бис Ону көөр бис бе? — деп, Сүүзен айтырган.

— А чүгэ мен сiler бүтүдени бээр эккелген деп мен? Сilerни ацаа Ооң-бile ужуражы бээриңер чөрже аппарзын деп менээ чарлык болган чүве-дир — деп, эр Кундус харылаан.

— А Ол... Ол — кижи амытан бе? — деп, Лүүси айтрыган.

— Аслан — кижи?! — деп, эр Кундус хорадап алгырган.

— Чок болбайн канчаар. Мен сilerге чугаалап тур ышкажыл мен: Ол — Арга-эзим хааны! Дириг амытанинарын үн хааны кымыл дээрзин билбезиңер ол бе? Аслан — Арзылан... Онза Дээди Арзылан; Өндүр улуг Арзылан.

— О-о-о! — деп, Сүүзен узун-суук үн үндүрген. — Мен Ону кижи-дир деп бодадым. А Ол... айылдыг эвес бе? Мен... менээ арзылан-бile ужуражыры коргунчуг-дур.

— Коргунчуг болбааже, чарашибайым, канчап ындыг эвес боорул — деп, кыс Кундус чугаалаан. — Асланның көрүп кааш, балдыры сириңейни бербес кижи тураг болза, чок-ла болза чырык чөрдө эн дидим кижи ол-дур, чок-ла болза тулган мелегей кижи-дир.

— Ынчарга Ол айылдыг ышкажыл? — деп, Лүүси хөлзеп айтрыган.

— Айылдыг че? — деп, эр Кундус катаптаан. — Өөм ишти Кундустуң чугаалаан чүвезин дыңнавадын бе? Айыл чок чорук дугайында кым чугаалады. Ол айылдыг болбайн канчаар. Ынчалза-даа Ол дириг амытанинарын ачылыг Хааны-дыр, мен сенээ чугааладым чоп.

— Мен ону дыка-ла көрүксеп тур мен! — деп, Питер хөлзеп алгыра каапкан. — Корткаш, угаан-кудум оскунуптар-даа болзумза, дөмөй-ле.

— Шын-дыр, Адамның оглу — деп, эр Кундус чугаалааш, столду мурнуу даваны-бile чула хаптарга, хамык аяк-тавак кыңгырткайны берген. — Сен Ону көөр-даа сен. Силер дөртке даарта Асланны Даши Ширээ чанынга уткуурун доктааткан деп медээни менче чорудупту.

— Ол чөр кайдал? — деп, Лүүси айтрырган.

— Мен силерге көргүзүп бээр мен — деп, эр Кундус харылаан. — Хемни куду, моон элээн ыракта. Силерни ынаар чедирип каар мен.

— А хөөкүй Тамнус-бile чүү боорул? — деп, Лүүси айтрырган.

— Аңаа дуза кадарының эң бүзүрлөдиг аргазы — Аслан-бile дүрген-не ужуражыры — деп, эр Кундус харылаан. — Ол бисчэ чедирип кээргэ-ле, хөделип эгелээр бис. А силерниң дузанар чокта, база хоржок. Чүгэ дээргэ база бир бурунгу чугаа бар:

*Кэр-Паравелге Адамның ук-салгалы
Хамыкты чагырыт эгелээргэ,
Хай-халап үезиниң төнчүзү кээр.*

Ынчангаш ам, силер-даа, Аслан-даа мында турда, хөрек эчизинге чедер деп барган хире. Аслан ооң мурнуунда-даа бистин чөр-чуртувуска кәэп турган дижир болгай... шаг шаанды, үе-дүпте. А кижилер аймаа маңаа кажан-даа кәэп көрбээн.

— Мен ону харын билип шыдавайн тур мен, Кундус акый — деп, Питер чугаалаан. — Ак Кадай боду кижи эвес чүве бе?

— Бистин ацаа бүзүрэй бээривисти ол күзеп турар — деп, эр Кундус чугаалаан. — Чогум-на ынчангаш ол хаан дүжүлгезин ээлээрин кордап турар. Ынчалза-даа ол Еваның уруу эвес. Ол силерниң аймаанарын ада-өгбэзи Адам (Кундус маңаа мөгейип каан) биле оон баштайгы кадайы Лилиттен* төрүттүнген. А Лилит дээргэ албыс кадай турган. Ак Кадайның бир талазындан өгбелери ындыг боор-дур, а өске талазындан ол даг-кижилдерден укталган. Чок-чок, Ак Кадайда ёзуулуг кижи ханы эвээш деп билицер.

— Ынчангаш-ла ол ындыг кара сагыштыг боор аа, ашак — деп, кыс Кундус чугаалаан.

* Лилит — бир эртө-бурунгу еврей тоолчургу чугаа езугаар Адам Еваның мурнуунда Лилит дээр баштайгы кадайлыг турган.

— Ылап-ла шын, кадай — деп, ашаа харылаан. — Кижилерге хамаарыштыр ийи аңғы бодал туруп болур — мында турар бүгү улус хомудавас-ла боор, а дүрзү-хевири кижи ышкаш болза-даа, херек қырында кижи эвестерге хамаарыштыр ийи аңғы бодал туруп болбас ужурлуг...

— Мен эки гномнарны билир чораан мен — деп, кыс Кундус чугаалаан.

— Бир эвес чугаа ол дугайында чоруп турар чүве болза, мен база — деп, ооң ашаа харылаан. — Чүгле хөй эвес гномнарны, артында-ла кижилерге эң-не дөмей эвестерин. Черле ынчаш, мәэн сүмемни дыңрап көрүнер: кижи болуксаар, ынчалза-даа ам-даа кижи апарбаан азы мурнунда кижи чорааш, ам кижи эвес апарган, азы кижи болур ужурлуг турган, ынчалза-даа кижи эвес кандыг-бир амытанга таварышсынарза, оон карак салбанар база дайынчы балдыңарны холунардан дүжүрбенер. Ак Кадай үргүлчү сезиктүг чоруур-дур: Нарнияга ёзуулуг кижилер чедип келзе канчаарыл дәэш aan. Ол силерни бүгү бо чылдар дургузунда манап келген. А бир эвес ол силерни дөрт кижи деп билип каар болза, оон-даа улуг айыылга таваржып болур силер.

— А бистиң чежевис кандыг хамаарылгалыг чүвел? — деп, Питер айтырган.

— Ол дугайында үшкү бурунгу чугаада айтып турар — деп, эр Кундус харылаан. — Ында, Кэр-Паравелде — бүгү чүве болур-чогууру-бile чоруп турган болза, хемниң далайже кирген аксында турар, Нарнияның найысылалы болур ужурлуг шивээде — ында, Кэр-Паравелде, дөрт дүжүлгө бар. А бисте үе-дүптен бәэр ол дүжүлгелерге Адамның ийи оглу болгаш Еваның ийи кызы саадаар болза, Ак Кадайның чүгле хааннаашкыны төнөр эвес, а ооң амы-тыны үстүр деп бүзүрел-чугаа бар. Ынчангаш бәэр ындыг кичээнгейлиг келгенивис ол. Бир эвес ол дөрт кижи силер-дир деп билип каар болза, амы-тынынар аңаа мәэн салымың чангыс дүгүндөн-даа үне чок болдур ийин.

Уруглар дәэрги Кундустан чугазынга алзыпкаш, долгандыр чүнү-даа эскербейн турган. Ол чугазын доозуптарга, шуптуу ыыт-шиммән чок барган. Хенертең Лүүси:

— Дыңнацарам... Эдмунд кайыл?! — деп хөлзеп үнген.

Олар бот-боттарынчы коргуп көрүшкен, ол дораан айтырыглар төктүп-ле келген:

— Кым ону сөөлгү катаң көрдү?

— Ол кажан чиде берди?

— Ол үне берген-дир аа?

Уруглар эжикчө халышкаш, дашкаар бакылаан. Бүгү ол үеде хар кодан-майыктап чаап-ла турган, дош боогдал-чал кылын ак чоорган-бile шыптыныпкан болган. Чалдың ортузунда кундуустар бажыңчыгажы турган черден ол чарык-даа, бо чарык-даа эриктер көзүлбестей берген. Ужелээ эжиктен үне халчып кәэрge, буттары чымчак, кым-даа баспаан харже кажык чедир шымны берген. Уруглар бажыңчыгашты долгандыр маңнажып, боску дунгуже: «Эдмунд! Эдмунд!» — деп алтырышкан. Черже дааш чок дүшкен хар оларның үннериң бичеледип, харыы кылдыр чангы безин дыңналбаан.

— Бо бүгүнүң коргунчуун! — деп, Сүүзен, кажан олар оолду тып чадашкаш, бажыңчө эглип келгенде, чугаалаан. — Ах, бис бо чуртка кажан-даа келбәэн боорувус кай!

— Ам чүнү канчаарывысты аайын тыппайн тур мен, Кундус акый — деп, Питер чугаалаан.

— Канчаар че? — деп, ол үеде кидис идиин кедип четтигипкен эр Кундус харылаан. — Канчаар боор. Моон доп-дораан чоруур ол-ла. Бисте чангыс секунда безин үе чок-тур.

— Кезектей үстүп алзывыssa эки эвес бе? — деп, Питер чугаалаан. — Чүк башка чоруптар-дыр. Ону баштай тып алган кижи дораан бәэр чедип келгеш...

— Кезектей деп чүнүл, Адамның оглу? — деп, эр Кундус айтырган. — Чүгэ?

— Эдмундуңу-ла диләй бис, оон ыңай чүгө деп.

— Ону диләэн ажыы чок — деп, эр Кундус чугаалаан.

— Канчап ажыы чок чүвел?! — деп, Сүүзен айтырган. — Ол ам-даа ырак эвес бир черде. Ону тып аар ужурлуг бис. Чүгө силер ону диләэри ажыы чок деп тур силер?

— Көңгүс бөдүүн чылдагаан-бile — деп, эр Кундус тайылбыраан, — бис оон кайнаар чоруй барганын билир бис!

Шупту олчө элдепсинип көрген.

— Таанда-ла, билбейн тур силер бе? — деп, эр Кундус кайгай берген. — Ол Ак Кадайче, ылап-ла олчө, чоруй барган-дыр. Ол бисти садыпкан-дыр.

— О, чүү дәэринер ол?.. Ол чүңерил... Эдмунд ынчап шыдас! — деп, Сүүзен алтырып үнген.

— Силерниң бодалынар ындыг бе? — дәэш, дәэрги Кундус уругларже топтап көрген. Олар ыыттаар чүве тыппайн барган,

чүгэ дээрge кайызы-даа сеткилиниң ханызындан Эдмунд ылапла ынчаар кылган деп мөдереп билип каан.

— Ынчаарга ол Ак Кадайже орукту канчап тып аарыл? — деп, Питер айтырган.

— А Эдмунд Нарнияга кээп турган бе? — деп, эр Кундус удур айтырган. — Маңаа ол кажан-бир чааскаан келген бе?

— Ийе — деп, Лүүси дыңналыр-дыңналбас харылаан. — Кээп чораан ышкаш.

— А ол силерге маңаа чүнү кылыш турганын чугаалады бе?

— Ч-чок...

— Ындыг болза, мээн сөстеримни сактып алындар — деп, эр Кундус чугаалаан. — Ол ынчан-на Ак Кадай-бile ужурашкаш, ооң талазынче кире берген-дир, а демгизи аңаа бодунуң ордузу кайда турарын айтып берген-дир. Ол кижиңерни көргөн дораан-на иштимде «Аңаа идегеп болбас» деп бодап каан мен. Мен ол дугайында эрте чугаалаар хөннүм чок болду, чүгэ дээрge ол силерниң төрелинөр дээш баар-ла болгай. Ол Ак Кадай-бile ужурашкаш, ооң аьш-чемин чиген деп чүве дораан-на илден апаар чорду. Нарнияга үр чурттаар болзунза, ону тодарадыры берге эвес. Көрүжүндөн-не...

— Дөмөй-ле — деп, Питер арай боорда чугаалаан, — дөмөй-ле бис ону барып дилээр ужурулуг бис. Канчап-даа кээрge, чеже-даа бак болза, ол бистиң дунмавыс-тыр. Ам-даа чаш оол-дур.

— Ак Кадайның ордузунчे баар деп тур силер бе? — деп, эр Кундус чугаалаан. — Таанда-ла, ону камгалап аарының база боттарындар бүдүн-бүрүн артарыннарын чанғыс-ла аргазы — оон ырак турары дээрзин билбейн тур силер бе?

— Мен билбейн тур мен — деп, Лүүси чугаалаан.

— Канчап ындыг боор. Ак Кадай Кэр-Паравелде дөрт дүжүлгэ дугайында хензиг када-даа утпайн турар болгай. Ооң ордузунга чеде бээриңер билек-ле, силер ат болганаң ол. Карааңар чивеш кылыш четтикпээниндер-ле, ооң чып алган көжээлөрингэ дөрт чаа көжээ немежип кээр. Ынчалза-даа силерниң дунманар чааскаан ооң эргезинге турда, Кара илбичи Кадай аңаа дөгбес — артканнарын тудуп аар дээш ону чемиш кылдыр ажыглаар.

— О, таанда-ла, биске кым-даа дузалашпас бе? — дээш, Лүүси ыглай берген.

— Чүгле Аслан — деп, эр Кундус чугаалаан. — Бис Оон-бile ужуражыр ужурулуг бис. Бүгү идегеливис чүгле ында.

— Мээн эргим дунмаларым — деп, хөрээжен Кундус чугаалаан, — бодаарымга, силерниң дунманар бажындан кажан чылбыртып үнгенин тодарадып аары эргежок чугула-дыр. Оон маңаа чүү хире хөй чүве дыңнат алганындан Ак Кадайга чүнү чугаалап чедери хамааржыр. Чижээлээргэ, Аслан дугайында чугаалажы бергенивисте, ол маңаа турган бе? Турбаан болза, бүгү чүве менди-чаагай төнүп болур — Шулбус Кадай Аслан-ның Нарнияже ээп келгенин база бистиң Оон-бile ужуражыр деп турарывысты билбейн баар. Бир эвес турган болза, оон сезиктий дам баар.

— Мен бодаарымга, Аслан дугайында чугаалажып турувуста, ол маңаа турбаан... — деп, Питер эгелеп чорда, Лүүси ону муңгаргай үзе кирген:

— Чок, турду, турду... Таанда-ла, сагынмас-тыр сен бе? «Кадын Асланны база даш кылдыр хуулдуруп шыдаар бе?» — деп айтырып турду чоп.

— Шын-дыр, дангыраглап болур мен — деп, Питер чугаалаан. — Ынчаар кылышы ооң аажы-чаңынга тааржыр-дыр.


— Багай-дыр оо — деп, эр Кундус улуг тынган. — База бир айтырыг: Аслан-бile ужуражылга Даш Ширээ чанынга док-тааттынган деп чугаалап турумда, ол маңаа турган бе?

Аңаа кым-даа харыы берип шыдаваан.

— Бир эвес турган болза — деп, эр Кундус уламчылаан, — Кара илбичи Кадай бисти орук ара дозуп алыр дээш ынаар шанактыг чоруптар, Асландан үзе кирдирип аар бис.

— Чок, баштай Шулбус Кадай өскээр кылыш — деп, кыс Кундус чугаалаан. — Мен ооң чаңын билир мен. Эдмунд аңаа бистиң дугайывыста чугаалаар билек, ол бисти тудуп аар дээш бээр халдыр. Бир эвес оол чартык шак бурунгаар чоруй барган болза, Ак Кадай чээрби минута болгаш, маңаа турар.

— Сээции мырыңай шын, кадайым — деп, ооң ашаа бадыткаан. — Чанғыс-даа минута чидирбейн, моон дүрген чоруур ужурулуг бис.



IX

АК КАДАЙНЫҢ ОРДУЗУНДА

СИЛЕР ЭДМУНД-БИЛЕ ЧҮҮ БОЛГАНЫН БИЛИП алыксап турбайн канчаар силер. Ол бүгүн улус-бile кады чемненген, ынчалза-даа дүштеки чем, өске уругларга ышкаш, аңаа таарышпаан, чүгэ дээрge ол үргүлчү-ле рахат-лукум дугайында бодал турган болгай. А хуулгаазын чем дугайында сактыышындан өске, бөдүүн эки чемниң амданын баксырадыпкы дег чүү барыл? Оол эр Кундуустун чугаазын дыңнаан, ол чуга база оон хөөнүнгэ таарышпаан. Эдмундуга үргүлчү-ле улус олче өжегерээн кичээнгей салбайн турар, оон-бile эвилен эвес чугаалажып турар ышкаш сагындырар болган, а херек кырында ындыг эвес-ле болгай.

Ынчалдыр-ла ол дыңнаалап олурган, а кажан эр Кундуустун оларга Аслан дугайында база олар Оон-бile Даш Ширээ чанынга ужуражыр ужурууун чугалаарга, Эдмунд эскет чоктап эжикчэ чылып эгелээн. Чүгэ дээрge «Аслан» деп ат дыңнаарга, ону, шупту уругларны дег, бир-ле билдинмес сагыш хаара тудупкан, ынчалза-даа өскелер өөрүп турган болза, Эдмунд корга берген.

Эр Кундуустун:

— Кэр-Паравелге Адамның ук-салгалы
Хамыкты чагырып эгелээрge,
Хай-халап цезиниң төнчүзү кээр — дээни минутада

Эдмунд эжиктиң тудазын дыңналбас кылдыр эргилдир тыртышкан, а база бир минута болганда, эр Кундуус «Чүгле Ак Кадай дээрge ёзулуг кижи эвес, а хайнак — бир чартыы албыс, бир чартыы даг-кижи — амытан-дыр» дээрзин чугаалап эгелеп турда, Эдмунд бажың-дан үнгеш, эжикти аяар хаапкан.

Эдмунд ындыг багай оол болуп, оон акызы биле угбадунмазы даш кылдыр хуула бээрин күзеп турган деп бодавас ужурулуг силер. Ол анаа-ла хуулгаазын рахат-лукумну аажок чикsep, баштай тажы, оон хаан болуксан, ону «хаван» деп сөглээн дээш Питерден адаанын алыхсал турган. Кадынның Питер болгаш уруглар-бile эвилен-ээлдек болуру, оларны оон-бile, Эдмунд-бile, деңней көөрү мырынай албан эвес ийик. А оол Кадын оон кады төрээннеринге багай чүнү-даа кылбас деп бодун көгүдүп апкан, ылавылаарга, ындыг боор деп бүзүрээр кылдыр бодун албадапкан турган. «Чүгэ дээрge — деп, ол бодунга чугаалаан — Кадын дугайында бак чүве шуугажып турар бүгүн амытаннар оон дайзыннары-дыр, ол шуугаазының чартык ке-зии меге бооп чадавас. Менээ ол шымбай хамаарылга көргүсken, оларның шуптузундан дээрэ болган болгай. Ол — ёзулуг кадын деп бодаар мен. Чүү-даа болза, демги коргунчуг Асланга көөрдэ, ол черле дээрэ боор». Эдмунд бодунун мурнуунга ынчалдыр агартынып турган. А ол болза ындыг-ла эки эвес агартыныышыны ышкожыл, чүгэ дээрge ол сеткилиниң ханызында Ак Кадайның кара сагыштыын, каржы-дошкунун билип турган.

Эдмунд дашкаар үнүп келгеш, хар чаап турарын көрүп каан; чүгле ынчан ол бажында каапкан тонун сактып келген. Дедир барып ону ап аар дугайында бодаан-даа ажык чогу билдингирле болгай. Оон ыңай ол имир дүшкенин көрүп каан — олар хүндүскүнүң үш шакта дүштеп олурупкан болгай, а кышкы хүн дурту кыскажак. Оол ол дугайында мурнуунда шуут бодаваан болган, а ам канчалтар деп? Эдмунд хөйлениниң моюндуруун көдүргеш, чалды кырлап хемниң ындыы талакы эриинчэ чорупкан. Аас-кеҗик бооп, чагган хар сүзүп кылаштаары ындыг-ла тайгыр эвес болган.

Кажан оол эрикчэ үнүп кээрge, орук бичи-даа чиигевээн. Харын-даа, бичи болгаш-ла, имир кылыннап, кодан-майыктаан хар каракты дуй чаап турган. Эдмунд үш базым хире бурунгаар чүнү-даа көрүп албастай берген. Орукту база тыппайн барган. Оол бедик хөртүктөргө кадалып, дона берген хөөлбектөргө тайып, ужуруп каан ыяштар уннарынга ылдыртынып барып ужуп, ханы

арыктарже ойлуп кәэп дүжүп, буттарын даштарга соя сок-туруп чораан. Ол өдүп, донуп калган, бүткүр боду көктерлиг апарган. А кайы хире коргунчуг шыпшың долгандыр турупкан деп, аңа кайы хире чааскаанзыргай апарган деп!

Шынын чугаалаарга, Эдмунд бодунун бодалындан шуут ойталаап, дедир эггеш, бүтүгү чувени миннип, угба-дуңмазы, акызы-билие эптеҗип аар турган деп бодаар мен. Ынчалза-даа хенертеп ооң бажынга: «Нарнияның хааны апаргаш, эн баштай эки оруктар тударын дужаар мен» деп бодал кирип келген. Ынчан ол канчаар хааннаарының, оон ыңай чүнү канчаарының дугайында күзелдерге чайгаар алзыпканы билдингир, ол күзелдер оолду омакшыдыпкан. А кажан оон ордузу кандыг боорул, ол чеже автомашиналыг боорул, чанғыс чүгле бодунга кандыг кинотеатр тударыл, демирорукту ол каяя кылырыл, кундустарга болгаш моондак чалдарга удур кандыг хоойлулар үндүрерил деп үзе шиитпирлеп каапкан турда база Питерниң ооң мурнунга адышыраарын канчап болдурбазыл деп бирден бирээ чокка боданып апкан турда, агаар өскерли берген. Хар чагбастап, хат көдүрүлгеш, соогу аажок апарган. Дээрде буулуттар арлып-чиидип, чедишкен ай үнүп келген. Хүндүс ышкаш чырый берген, чүгле маңган ак харда кара хөлөгелер оолга эләэн элдептиг болуп турган.

Эдмунд ай эвес болза, шын орукту канчап-даа тыппас ийик. Ол кундустарлыг хемче агым айы-билие кудулдур киир аккан бичии адышыркка чаа-ла чедип кәэп турда, ай үнүп келген... Ол бо хемчигеш биле ооң ындында ийи тейни уруглар кундустарга чедип кәэри билек, демдеглеп көрүп алганын сактыр боор силер. Эдмунд ээпкеш, хемчигешти дургаар базып чорупкан. Ынчалза-даа бо адышырк агып чыдар чоога ооң ам чаа-ла каапканы чоогадан оранчок кадыр өрү көдүрлүп, оон артык хая-даштыг болуп, чадаң үнүжу база аажок сырый үнген



болган. Ынчангаш караңыда ооң олап эртери чөгенчиг апарган. Оол өзээн өттүр өде берген, чуге дээрge адаа-били чүткүп эртип турганы чавыс астынчак будуктардан ожук-хар үргүлчү дүжүп-ле турган. Ынчанган санында-ла ол, бүтүгү чүве дээш чанғыс Питер буруулуг деп, оон дугайында улам-на өжээргеп бодап турган!

Ам-на дөүш элээн иемдик апарып, Эдмундуң мурнунга делгем шынаа ажыттына берген. Шак ынчан хемниң ындыы чарык эриинге, холду чедир сунупку дег көңгүс чанында, бичии оймак ортузунда ийи тей аразында ооң мурнунга шивээ көстүп келген. Ол-даа Ак Кадынның ордузу болбайн канчаар. Ук шивээ чүгле бедик сүүр баштыг каасталгаларлыг суургалардан бүткен ышкаш сагындырган. Суургалар илби-шидичилер кедер бедик сүүр баштыг бөрттерге дөмей болган. Айның чидиг чырында чайынналып көзүлген оларның узун хөлөгелери харда ужуру билдинмес каарып турган. Эдмундуга коргунчуг апарган.

Ынчалза-даа дедир ээптери орайтаан болган. Ол дона берген хемчигешти кешкеш, шивээже чоокшулат келген. Долгандыр шимчээшкин-даа, ыыт-даа чок. Ооң бодунун базымнары безин чаа чагган кылын харга дааш чокталып турган. Эдмунд шивээни долгандыр — азыгдан азыгже, суургадан суургаже — кирер чер дилеп чорупкан. Адак соонда эң-не артыкы ханада улуг дугаланчак хаалганы ол көрүп каан. Аажок улуг демир хаалганы ангайтыр ажыдып каан болган.

Эдмунд хаалгаже кедеп чеде бергеш, иштики шөлчө бакылаан, ынчан ооң чүрээ аксында келген — хаалга ындында дораан-на ай чырыы шыва алган дыка улуг арзылан, шураар дээн дег, черден иттинип алган турган. Эдмунд шуут аймай бергеш, турган черинден шимчээр харык чок, хаалга чанында хөлөгеде туруп берген. Ол дыка үр турган болгаш, kortканындан сирилевестей берген-даа болза, донганындан сирилеп эгелээр турган ийик. Эдмундуң чеже хире ынчаар турганын мен билбес мен, ынчалза-даа ооң бодунга медээжок үр үе эрткен ышкаш болган.

Ындыг-даа болза, чоорту арзылаңың туружуундан шимчевези оолга элдептиг ышкаш сагындырып эгелээн — Эдмунд ол бүгү үе дургузунда оон черле карак салбаан, а араатан чанғыс-даа шимчеш дивээн. Эдмунд дугаланчак хаалганың хөлөгезинге артышаан, олчэ эләэн чоокшулат диттиккен. Ынчан арзылаңың олчэ шуут көрбейн турарын оол билип каан. «А бир эвес ол бажын эргилдирип келзе чүл?» деп Эдмунд боданган.



Арзылаң көңгүс өске чүүлчө, а ылавылаарга, бодундан үш-дөрт базым черде хая көрнүп алган турар гномчугашче көрүп турган. «Ага — деп, Эдмунд шиитпирлээн, — ол гномче шурай бээр аразында, мен дезе бээр мен». Ынчалза-даа арзылаң биеә хеввээр шимчевээн, гном база. Чүгле ам Эдмунд кундуустун Ак Кадай кандыг-даа амытанны даш кылдыр хуулдуруп шыдаар дээн сөстерин сактып келген. А чүл, бо база чүгле даш арзылаң эвес бе? Ынча деп бодапкан дораан-на, оол демги арзыланың ооргазы биле бажында хар чыдарын эскерип каан. Дириг араатан аң харны ыял-ла кактанып каапкай. Эдмунд арзылаңче дыка аяар чоокшулат келген. Оон чүрээ тиккинейнди соп, хөрээнден ушта халыыр чыгыы турган. Ам безин ол араатанга холун дегзип дидинмээн. Адак соонда холун дүрген-не суна каапкан... хол соок дашка дегген. Кончуг мелегейни! Кандыг-ла-бир даш дүрзүден корга берген.

Эдмундуун сагыжы ам-на чиигеп оожургааш, соок-даа болза, оон бүгү боду чылый берген. Ол-ла өйде оон бажынга, аңаа сагындырганы дег, кайгамчык бодал кирген: «А бир эвес кундустарның чугаалап турганы өндүр улуг Аслан бо болза чүл? Кадын ону тудуп алгаш, даш кылдыр хуулдурупкан-дыр. Оларның улуг-

чаагай бодалдары мынчалдыр бүтпес дээн ышкаждыл! Ха-ха, ам ол Аслан кымга коргунчуг деп?!»

Эдмунд ынчалдыр арзылаңга таварышкан айыыл-халап дээш амырап турган, а оон дыка мелегей болгаш арын-нүүр чок үүлгедиг кылган: карманындан карандаш кезии ужуулгаш, даш хайга карак шили чуруп каан. «Че, мелегей кырган Аслан — деп, ол чугаалаан, — сеңээ даш боору тааржыр-дыр бе? Мон сонгаар мен кончуг мен деп бодавас сен». Ынчалза-даа, карак шилдигдаа болза, көрбес карактары-бile айже кайгап турар аажок улуг даш араатан аңының шырайы ындыг түрлүг, муңгаргай болгаш чоргаар боорга, Эдмунд бодунун үүлгедийнден кандыг-даа өөрү шкү албаан. Оол арзылаңдан хая көрнү бергеш, иштики шөлдү кезип чорупкан.

Ортузунга чеде бергеш, ону он-он даш көжээлер долганип турарын ол көрүп каан: олар ында-мында шыдыраа оюнуун үезинде хөлдө бодалар дег тургулаан. Ында даш кижи-хуналар, бөрүлөр, адыглар, дилгилер болгаш дыrbактыглар бар болган. Ында хөрээжнөр ышкаш аянныг-чарааш даш дүрзүлөр — ыяштар ээлери турган. Ында аажок улуг кижи-аскыр, чалгыныг айт болгаш чылан ышкаш бир-ле узун амытан көзүлгөн. Улу боор деп Эдмунд шиитпирлээн. Олар айның чидиг соок чырыында мырыңай дириг чүве дег, карак чивеш дээр аразында турган ояар шимчевестей берген дег тургулаан. Оларның көстүрү дыка элдептиг болуп, Эдмунд иштики шөлдү кежир кылаштап бар чыдырда, оон чүрээ kortканындан бо-ла сокпайн бар чазып турган. Шөлдүн дал ортузунда кижи ышкаш, бедик ыяш хире узун, аажок улуг көжээ турган; оон сал дүй үнген арнын килен хуулдурупкан, ол он холунда кедергей улуг монгут. Эдмунд бо даг-кижи база даштан бүткен деп билир-даа болза, оон чаныбile эртери аңаа анчыг болган.

Ам Эдмунд иштики шөлдүн ырак ужуунда имиргей чырыкты эскерип каан. Чоокшулат келгеш, чырыктың элээн каш даш тепкииш дамчыштыр чедип болур ажык эжиктен куттуулганнын көрүп каан. Оол тепкииштер дамчыштыр көдүрлү бээрge, эргинде улуг бөрү чыткан.

«Анаа-анаа, шуут-ла коргунчуг эвес — деп, Эдмунд бодун оожургаткан. — Бо дээрge чүгле даш дүрзү ышкаждыл. Ол мени канчап-даа шыдавас». Ынчангаш ол бөрүнү артай базар дээш будун көдүрүп кээрge, ол-ла дораан аажок улуг араатан

тура халаан. Ооргазында дүгү сирбее берген ол улуг кызыл аксын ажыткаш:

— Мында бо кымыл? Кым сен? Бурунгаар чаңгыс-даа базым кылба, танывазым амытан! Харыла: кым сен?! — деп ырланып чугаалаан.

— Чугаалаарын чөпшээреп көрүнегер, дээрги — деп, Эдмунд сириллэниден эриннери арай деп шимчеп шулуднаан. — Мээн адым — Эдмунд, Адамның оглу мен. Дээрги мындаагылар Кадын мээн-бile чоокку хүннerde аргага ужурашкан чүве. Мээн кыс угба-дуңмам биле акым база ам Нарнияда турарын аңаа дыңнадыр дээш чедип келдим... Олар моон көңгүс чоокта, кундустарда. Кадын... оларны ол көрүксээн чүве...

— Мен ону дээрги мындаагыларга дамчыдар мен — деп, бөрү чугаалаан. — А сен амдызызында маңаа, эргин чанынга, тур, бир эвес амы-тының сенээ үнелиг болза, турган черинде шимчеве.

Оон бөрү ордуже киргеш, чиде берген.

Эдмунд манап-ла турган, оон салаалары донгаш, көжүп калган, чүрээ хөрэнде тиккиледир соп-ла турган. А оон көк бөрү — ол болза Кадынның Чажыт айыыл чок чорук албанының даргазы Могрим болган — база катап оолдуң мурнунга көстүп келгеш:



— Кир-кир! Кадынның шилип алган кижизи, сенээ айлашкан-дыр азы айлашпаан-даа бооп чадавас — дээн.

Эдмунд Могримниң сонгу даваннарын баспазын оралдаҗып, оон соондан чорупкан.

Оол дыка хөй адагаш-колонналарлыг узун караңгы залда келген, ында, иштики шөлде ышкаш, даш көжээлер эндөрик болган. Эжиктиң мырыңай чанында бичии кижи-хунаның муңгаргайы аажок арынныг көжээзи турган. Эдмунд ала-чайгаар бодунга айтырыг салган: «Дүнмазы Лүүсинин өңнүү кижи-хуна, дээрги Тамнус, бо эвес бе?» Залда дың чаңгыс чырыткы хып турган, оон шуут чанында Ак Кадын олурган.

— Мен чедип келдим, дээрги мындаагылар — деп, Эдмунд олче халывышаан чугаалаан.

— Сен канчал чааскаан чедип кээрин диттикитиң?! — деп, Кадын коргунчуг үн-бile чугаалаан. — Мен сенээ арткан өөрүнүн эккээрин дужаавадым бе?!

— Кильенвейн көрүнегер, дээрги мындаагылар — деп, Эдмунд чулчураан. — Кылып шыдаар чувемни шуптузун кылдым. Мен оларны сilerнин ордунарга барык-ла чедирип келдим. Олар ам хемни өрү боогдал-чалда... кундустарның бажынында турлар.

Кадынның арнында кадыг-шириин хүлүмзүрүг көстүп келген.

— Сээн менээ дыңнадыр дээн чүвөн ол-ла бе? — деп, ол айтырган.

— Чок, дээрги мындаагылар — деп харылааш, Эдмунд Кадынга кундустарның бажыңчыгажынга, оон дезе бээр бетинде, дыңнаан бүгү чүvezин катап чугаалап берген.

— Чүүже?! Аслан?! — деп, Кадын алгырып үнген. — Аслан? Ол шын бе? Бир эвес менээ мегелепкениңни билип каар болзумза...

— Өршээнер ыңар... мен чүгле Кундустуң сөстерин катаптадым — деп, Эдмунд келдирлей аарак химиренген.

А Кадын ам олче кичээнгей салбайн барган. Ол адыш часкантарга, оон мурнунга Эдмундуң билири гном дораан көстүп келген.

— Шанакты белетке — деп, Кадын дужааган. — Чүгле конгурааштар чок дериг-херекселден ап ал.



X

КАРА ИЛБИ-ШИДИ КҮЖҮН ЧИДИРИП ЭГЕЛЭЭН

А АМ ЭР-КЫС КУНДУСТАРЖЕ БАЗА АРТКАН УШ уругже эглип көрээлинер. Эр Кундус: «Чанғыс-даа секунда чидирбейн, моон үнүп чоруур ужурлуг бис» — дээри билек, кыс Кундустан ёскелери тоннанып эгелээн. Демгизи шаладан каш шоодайны дүрген ап, столче салгаш:

— Чеве, ачазы, дээвийирде аскан борбак эътти дүжүр. А хапта шай, даш-чигир бо-дур, оттуг-ьяш бо-дур. Бирээнцер менээ элээн каш борбак хлеб ап берген болза аа, олар дуу азыгда чуве — дээн.

— Бо чүнү канчап тур силер, Кундус угбай? — деп, Сүүзен алгыра каапкан.

— Бистиң кайывыска-даа шоодай иштеп берип тур мен, чараашпай — деп, кыс Кундус таваар харылаан. — Йрак орунчье үнерде, айш-чем албайн барып болур деп бодап тур сен бе, кай?

— А бис далажыр ужурлуг ышкаш бис — деп, Сүүзен тонун өөктенмишаан чугаалаан. — Ак Кадай манаа ам дораан кээр боор.

— Мен база ынча деп тур мен — деп, эр Кундус Сүүзенни деткээн.

— Хей чүве чулчурбаңар! — деп, ооң кадайы чугаалаан.

— Экидир боданыңар, бажың ээзи. Ол боже он беш минутадан эрте чедип кээп шыдавас.

— А биске ону болдунар шаа-бile мурнары чугула эвес чүве бе? — деп, Питер айтырган. — Даши Ширээгэ ону мурнап чеде бээр деп турар болзуусса aan.

— Ол дугайында бодавааныңар ол-дур, Кундус угбай — деп, Сүүзен чугаалаан. — Ак Кадай бээр келгеш, бистиң мында чогувусту көрүп кагза, соовустан бар шаа-бile сүрүп халдыштар.

— Маргышпас мен — деп, кыс Кундус чугаалаан. — Ындыг-даа болза, чеже-даа кызар болзуусса, Даши Ширээгэ ону мурнап чедип шыдавас бис, чүгэ дээргэ ол шанактыг, а бис чадаг-дыр бис.

— Ынчаарга... хамык чүве хей ышкажыл? — деп, Сүүзен чугаалаан.

— Оожурга... Электен-не эшкедеп дүүрээн херээ чүл?.. — деп, кыс Кундус чугаалаан. — Комод хааржаан ажыдып, элээн каш арыг думчук аржылындан уштуулж... Хамык чүве хей эвес болбайн канчаар. Бис ынаар оон эрте чедип шыдавас бис, ынчалза-даа озалааш чөрөг чаштып алгаш, ооң билбези оруктар-бile ынаар чеде берип шыдаар бис. Ынчаар кылып шыдантары-высса идеэгээр-дир мен.

— Ынчанмай канчаар, авазы — деп, ооң ашаа чугаалаан.

— А ам орунчье үнер үевис келген-дир.

— А сен база дүүрээзин үндүрбэ, ашак — деп, кадайы чугаалаан. — Сокса сен... Че, ам-на хамык чүве аайлышкан-дыр. Бистиң кайывыска-даа кылдыр дөрт шоодай бо-дур, а эн-не бичиивис сенээ — шоодайжыгаш бо, чараашпай — деп, ол Лүүсиже көргеш, немеп каан.

— Менде чүү боор, колдуу белен мен — деп, кыс Кундус харылаап турда, эр Кундус ооң чөвшээрели-бile аңаа дузалап, кидис идиктерин кедирип турган. — Даараныр машина ап чоруурга, аар боор аа?

— Ынчанмай канчаар — деп, эр Кундус чугаалаан. — Көдүрөр аргажок аар эт-тир. Сен орунчье даараныр деп турарын ол бе?

— Ак Кадай ону ажылдадыр боор деп бодалдан-на хөннүм карара бээр-дир — деп, кыс Кундус чугаалаан. — Уреп кааптар азы оон-даа дора — оорлап аппаар ол.

— Ойт, дүргедеп көрүңер! — деп, уруглар чаңгыс угда кыйгырган.

Ам-на олар бажындан үнүп келген, эр Кундус эжинин хагаш: «Ол ону бичи-даа бол саададыр» — дээн. Дескеннер оон аьш-чемниг шоодайларын чүктеп алгаш, орууче үнүпкен.

Ол өйде хар чагбайн барып, дээрge ай үнүп келген. Олар шууштүр бар чыткан — баштай эр Кундус, ооң соондан Лүүси, Питер болгаш Сүүзен, кылаштааннарның соонга кыс Кундус чо-раан. Олар хемниң оң талакы эриинче боогдал чал кыры-бile кеже берген, а оон эр Кундус оларны сутнуң мырыңай кыдын-да өзүп үнгөн ыяштар аразында арай деп көстүр кокпа оруук-бile аппарган. Ийи талада, ай чырыынга кылаңайчып, кадыр эриктер бедип чыткан.

— Болдунар-ла болза, адаа-бile чорупсувусса эки — деп, эр Кундус чугаалаан. — Ак Кадай кыры-бile чоруур ужурга таваржыр, бээр шанактыг бадып кээп шыдавас.

Оларның мурнунга кайтамчык чарааш көстүр чер ажыт-тынып турган. Соңга чанынга эптиг креслога олурупкаш, ону чараашсынып магадаан болза аар. Лүүси ам безин таалап турган. Ынчалза-даа үр эвес. Олар базып бар-ла чыткан; Лүүсинин чүктеп чораан шоодайы аартап-ла олурган, чоорту уруг сактырга, ам бир базым кылза, ол оон ыңай шыдашпас ышкаш апарган. Ол чайыннаажы-бile чылчырыктадып турага хемче, доштуг шурал-гактарже, ыяштарның шыпшык баштарында селбегер улуг хар бөрттерже, чырык айже, сан-түн чок сылдыстарже көөрүн соксал каан. Ол ам чаңгыс-ла чүүлче — эр Кундустун ооң мурнунда, назынында кажан-даа доктаавас чүве дег, токкуладыр базып бар чыдар чолдак буттарынче көрүп чораан. А оон ай ажыт кире берген, хар катап база чаап эгелээн. Туруп-могаанындан Лүүси уйгу-дүште дег шимчеп чораан. Хенертен эр Кундус хемден оң талаже ээпкен; олар аажок кадыр ийни өрү дорт-ла шыргай чокпак үнүштерже халбактанып үнүпкен. Уруг чогум-на үезинде миннип келген: оларның орук баштакчызы, чадан үнүштер-бile кончуг таптыг чажырып каан болгаш, чүгле чыпшир чеде бер-геш, көрүп каап болур улуг эвес үтте келгенин ол эскерип чет-тигипкен. Ынчалза-даа ажыы-бile чугаалаар болза, Лүүси чүү

болуп турагын чүгле үнгүрден чолдак калбак кудурук уштуунуп келгенин көргеш, ылаптыы-бile билип каан.

Лүүси ол дораан ээkkеш, кундустуң соондан союп кире берген. Удавайн ол соонда бир-ле аяар шимээн дыннап каан, оон бир минута хире болгаш, бежелээ катап база кады турганнаар.

— Бо чүл? Кайда бис? — деп, Питер шагзыргай дунук үн-бile айтырган. (Үннү дунук дээш, чүнү чугалаар бодаанымны силерниң билип турагындаа идеээр-дир мен.)

— Бистиң шагдагы-ла камгаланыр черивис-тир. Аар-берге үелерде кундустар кезээде маңаа хоргадаар турган — деп, эр Кундус харыылаан. — Ону кым-даа билбес. Мында аажок эптиг деп шыдавас мен, ынчалза-даа бистиң шуптууска бичии када удуп аары эргежок чугула.

— Бир эвес бажындан чоруп тура, шуптунар ынчаар ба-чымнап дүвүревээн болзунарза, мен элээн каш сыртык ап аар турган мен — деп, кыс Кундус чугаалаан.

«Бо куй Тамнус акыйнындан дора-дыр — деп Лүүси бо-данган. — Анаа-ла черде үнгүр, чогум кургаг база дойлуг эвестен башка». Куй көңгүс бичии болгаш, дургуннаар черге тоннарын ужулбайн, чаңгыс тудуш дүргек кылдыр дүрлүп алгаш чыдып-кан, ооң кадында олар шупту орукка изиргени берген болгаш, кийда чылыг, таарымчалыг ышкаш сагындырган. «Чүгле маңаа мындыг кадыг болбаан болза» деп олар шупту боданган.

Кыс Кундус хойлаарак уштууп келген, олар шупту боос-тааларын чирти-чирти суксунну бир-бир пактан ижип алган. Уруглар чөдүлүн тудуп шыдаваан, ынчалза-даа оларга улам-на чылыг, таптыг апарып, олар ол дораан чаңгыс кижи дег удуп калган.

Лүүси карактарын ажыдып кээрge, олар удаандан бээр хөй шак эртсе-даа, ол борта бир минутадан ажыр удываан ышкаш сагындырган. Ол доңуп чыткан, эът-боду сооктан чымырап, ам изиг ваннага чунарындан улуг күзели чок болган. Оон уруг оон арнын узун сал кичигелеп турагын ожаап билип каан, ол куйже кырындан дээп келген кошкак хүн херелин көрүп каан. Ынчан Лүүси шуут оттууп келген, а өске уруглар база туруп эгелээн. Олар эзеп-херлип, карактарын хере көргүлөпкеш, дүүн орукка дыннаарындан сестип чорааны, а чамдыкта мырыңай дынналып турган ышкаш сагындырган ыйтты дыннап олурган. Шанактыг аyttарның конгургааштарының эдерин.

Эр Кундус күйдан доп-дораан үне халаан. Лұғасиниң баштай бодааны дег, ооң ынчанганы мелегей чорук деп бодаан чадавас силер. Чок, ындыг эвес, ол болза кончуг бодамчалыг чорук болган. Ийниң шыпшық бажынче ыяш-үнүш аразындан кым-даа эскербес кылдыр үне берип болурун кундус билген, а ана Ак Кадайның шанаа кайы талаже бар чыдарын тодаралып аары чугула турган. Кыс Кундус билеме уруглар куйга манап база даап бодаашыннар кылып артып калган. Олар бұдун беш минута дургузунда манаан. А ооң соонда үннер дыңнаап кааш, кортканындан оларның чүректери аксында келген. «Ой — деп, Лұғас боданган, — дайзын ону көрүп каан-дыры. Кара илбичи Кадын Кундус акыйны тудуп алган-дыры!» Удавайн мырыңай күй аксынга кундустун үнү дыңнаалып кәэрge, оларның кайгаптараанын канчаар.

— Шупту чүве эки! — деп, ол алғырып турган. — Авазы, үнүп келиңдер! Адам билеме Еваның оглу-кызы, үнүп кел! Эки чүведир шупту. Чогул Ак Кадай! Оону эвес-тириң конгурасштар!

Ооң домак тургузары арай-ла шын эвес болган, а кундустар бир-ле чүве ужун дұвүрээр болза, черле ынчаар чугаалап эгелээр; мен Нарнияны ынча дәэрим ол — бистин делегейде олар шуут чугаалап билир эвес.

А оон кыс Кундус, Питер, Сүүзен болгаш Лұғаси — хүн чырынга карактарын имирертип, довуракка боражып, савыйтыр удуп каапкан, баштары үвүргей, чунмаан чүвелер — бөлүү биле чуглуп үнүп келген.

— Дүрген бәэр келиңдер! — деп, эр Кундус өөрүшкүден самнаар чыгырып турган. — Ак Кадайның көңгүс манавааны эки чүүлдү кәэп көрүңдер! Ооң эрге-чагыргазы ам дүжер дәэн-дири.

— Чүнү чугаалаар дәэш ынча деп тур силер, Кундус акый? — деп, өру халбактанып үнүп орган болгаш, арай деп тыныш алып, Питер айттырган.

— Ак Кадайның уржуу-биле бистин оранда үргүлчү кыш тураар, а Чая чыл кажан-даа келбестээн дәэрзин силерге чугаала-жык мен бе? Чугаалаан болгай мен. А ам көрүңдер даан!

Ынчан олар ам-на ийниң кырынга үнүп келгеш, ылап-ла көрүп каан... Олар чүнү көрүп каан деп? Шанак бе?

Иие, шанактыг ивилерни. А ол ивилер Кара илбичи Кадайның ивилеринден оранчок улут боорда, ак эвес, доруг чүзүннүг болган. А шанакта... кым ында олурарын олар көрген

дораан-на даап бодап каан. Чидиг кызыл тоннуг, баш шывар алғы моюндуруктуг узун ирей; узун ак салы ооң хөрээнче көвүктелген шуралгак бооп ағып баткан. Олар ону дораан таңып каан. Шак ындыг ирэйлерни чүгле Нарнияга көрүп болур турган-даа болза, бистин делегейвиске — хеп шкавының болалазында безин оларның дугайында чугаалап, чуруктарга чуруп турар. Ындыг-даа болза, ону Нарнияга иийи караңаар-биле көрүп каарыңар — көңгүс өске херек-тири. Диқа хөй чуруктардан Соок-Ирэй анаа-бир хөглүг, харын-даа каттырынчыг ирей бооп көстүр. Ынчалза-даа ам олче көргеш, уруглар көңгүс ындыг эвес дәэрзин ожаап билип каан. Ол ындыг улуг, ындыг өөрүшкүлүг, ындыг ылаптыг уругларның мурнунда бо турар боорга, олар алачайгаар шыңгырай берген.

— Ам-на мында тур мен — деп, ол чугаалаан. — Ак Кадай мени үр-ле эрттирибеди, ынчанмыже мен мында чедип келдим. Аслан орукта чоруп ор. Кара илбичи Кадайның илби-шиди күжүн чидирип тур.

Лұғас ол сөстерни дыңнааш, ханы, тайбың өөрүшкүге алзыпкан.

— А ам — деп, Соок-Ирэй уламчылаан, — силерниң шуптуңарга белектер үлеп бәэр үем келген-дири. Силерге, ава Кундус, эки, чаа хеп даараар машина. Мен ону силерге орук ара чедирип бәэр мен.

— Буруулуг болдум, дәэрги — деп, кыс Кундус олурда дүшпүшаан чугаалаан. — Бистин эжиивис хааглыг.

— Шоочалар, дәэктөр мендээ моондак болбас — деп, Соок-Ирэй ону оожургаткан. — А силер, ада Кундус, — чана бергеш, боогдал чалыңарны төндүр тудуп, септеп каанын, дежиктерни дуглап, чаа суг деңнели таарыштырар хаалга тургусканын көрүп каар силер.

Эр Кундус аажок магадаанындан аксын ангайтыр ажыдып-каш, дылы көжүй берип, аңаа чагыртпайн турарын билип каан.

— Питер, Адамның оглу! — деп, Соок-Ирэй чугаалаан.

— Мен мен, дәэрги — деп, Питер харылаан.

— Сенээ белектерим бо-дур, чүгле ойнаактар эвес болтур ийин. Сээн оларны ажыглаар үең мырыңай чоок бооп чадавас.

Ынча дәэш, Соок-Ирэй Питерже дозуг-камгалал биле хылыш сунган. Дозуг-камгалал мөңгүннелип көзүлген, ында иийи буттап турар бышкан честек-кат дег кызыл арзылаң дүрзүзү бар

болган. Алдын тудалыг, баг-бile эгинге азынгаш, хыннап алыр хылыш Питерге дыка тааржыр хемчээлдиг база деңзилиг болган. Соок-Ирейниң белээн ыыт чок ёзулап хүлээп алган: бе-лектер улуг ужур-уткалыг дээрзин ол билип турган.

— Сүүзен, Еваның кызы! — деп, Соок-Ирей чугаалаан.
— А бо сээциий-дир. — Оон ол уругга ча-согуннуг саадак болгаш чаан сөөгүндөн кылган эдиски тутсуп берген. — Бо ча-бile чүгле эргежок чугула апарганды, адып болур сен. Дайын-чаага киржирицини күзевейн тур мен. Бо ча-бile аткан кижи кажан-даа часпас. А бир эвес сен бо эдискини эриннериңгэ дээскеш, ойнай бээр болзуңза, каяя-даа турунда, дуза кээр деп бил.

Адак сөөлүнде Лүүсинин өэлчээ чедип келген.

— Лүүси, Еваның кызы! — деп, Соок-Ирей чугаалаан.

Уруг улус мурнунчे үнүп келген. Соок-Ирей аңаа саважыгаш (көөргө, ол анаа шил сава ышкаш болза-даа, соонда улус ону арыг алмазтан кылган-дыр дишкен) болгаш бижек тутсуп берген.

— Шилде Хүннүн дагларында өзүп үнгөн оттүг чечектөр чулуундан кылган эм ханды бар — деп, ол чугаалаан. — Сен азы сээн өш-өөрүңүң кайы-бирээзи балыгладыптар болзуңарза, экиртири дизайн, каш дамды-ла четчир. А бижекти чүгле бодуңну камгалаар дээш, аажок херек апарганды, ажыглап боор сен. Оон ыңай дайын-чаага черле киришпес ужурлуг сен.

— Чүгэ, дээрги?! — деп, Лүүси айтырган. — Мен бодаарымга... билбес мен, ынчалза-даа кортпас ышкаш мен.

— Хамык ужур коргар-кортпазында эвес — деп, Соок-Ирей чугаалаан. — Херээжен улус киришкен тулчуушкуннаар коргунчуг-ла. А ам — дээш, ооң арны хөглүг апарган, — силерниң шуптуңарга ам дораан херек апаар чүү-хөө бо-дур.

Ынча дээш, ол дийзелиг беш аяк, чигирлиг вазажыгаш, өрөмелиг сава болгаш хайннып турар изиг суглуг улуг хөнек салган калбак тавак сунуп берген: хөнек шиилеп, бузун чүк башка бургудып турган. Соок-Ирей ол бүгүнү чүктеп алганы шоодайындан уштуп келген, а кажан дээрзин кым-даа эскербээн.

— Чaa чыл-бile! Ёзулуг Хaan делгерезин! — деп, ол алтыргаш, кымчызын чайгылаан.

Уруглар оңгарлып четтикпээнде, ивилер-даа, шанак-даа, Соок-Ирей-даа чиде берген.

Питер эр Кундуска көргүзөр дээш хылыжын хындан уштуп кээри билек, кыс Кундус:

— Болзун-болзун... Шай соой бергижеге чедир аңаа шуугап туруп бээр силер. Эх, эрлер силерни-даа! Калбак тавакты куду бадыржып бериңер, эртентги чөм чиир-дир. Улуг бижек ап алганым кончуг эки болду — дээн.

Оон олар катап база куйже кире бээргэ, эр Кундус хлеб, борбак эът кезип каан, а кыс Кундус бутербродтар кылгаш, аяктарга шай кудуп каарга, шуптузу күзел хандыр чөмненин эгелеээн. Ынчалза-даа күзел ханышкыны үр болбаан, чүгэ дээргэ эр Кундус доп-дораан:

— А ам оон ыңай чоруур үевис келди — дээн.



XI

АСЛАН ЧООКШУЛАП КЕЛ-ЛЕ ЧЫДАР

ОЛ АРАЗЫНДА ЭДМУНД ААР ХӨӨН КАЛЫШКЫНГА таварышкан. Оол, гном ивилерни шанактап чоруй баарга, бирги ужуражылга үезинде дег, Кадын ооң-бile эптиг-ээлдек апаар боор деп манап турган чүве-дир. Ынчалза-даа Кадын чанғыс-даа сөс чугаалаваан. Дидимненип алгаш, оол:

— Дээрги мындаагылар, меңээ бичии рахат-лукумдан бе-рип көөр сiler бе?.. Сiler... аазаан болгай сiler — деп дилээн.

Харызынга ол:

— Ыыттава, мелегей — деп сөстер дыңнаан.

Ындыг-даа болза, боданып көргеш, Кадын иштинде-даа дег чугааланган:

— Чок-чок, ынчап хоржок, бо чүве орук ара меделин ышкыныптар чадавас — оон ол катап база холу-бile медээ бээрge, өске гном көстүп келген. — Бо кижи амытанга аыш-чем, суксундан эккеп бер — деп, ол ацаа дужааган.

Гном үне бергеш, дораан кирип келген. Ол холунда суглуг демир аяк биле кадыг кескинді хлеб салган демир тавак тудуп

алган болган. Кочулап багайтыр хұлұмзұрбұшаан, ол саваларны Эдмундуң чанынга шалага салып каан.

— Бичии тажыга рахат-лукум! Ха-ха-ха!

— Bo чүвең аппар! — деп, Эдмунд хөлүйүп химиренген.

— Мен кадыг хлеб чивес кижи мен.

А Кадын оолче әргилип келген, ооң арын-шырайының коргунчуу аажок боорга, Эдмунд ол дораан буруузун билингеш, хлеб аргажок кадып калган-даа болза, ону дайнап, арай деп ажырып чип эгеләэн. Кадын ынчан:

— Bo кескинді дәэш сеткилиң ханзын, ам үр үе дургuzzunda чем шуут чивейн барып болур сен — дәэн.

Эдмунд чемин төндүрбәэнде-ле, бирги гном кирип келгеш, шанак белен дәэрзин илеткәэн. Ак Кадын туруп келгеш, Эдмундуң ону эдерерин дужаагаш, ордудан үне берген. Даشتын ам база хар чаап турган, а ол ынаар кандыг-даа кичәэнгей салбайн, шанакка ооң чанынче олуруп аарын Эдмундуң айыткан. Олар туружундан шимчеп үнер бетинде, Кадын Могримни кый деп алган. Бөрү улуг ыт ышкаш ырадыр шурай аарап халып келгеш, шанак чанынга туруп алган.

— Сәэң чагыргаң адаанда эң дурген бөрүлерни эдертип алгаш, доп-дораан кундустар бажынынче чоруптуңар — деп, Кадын айыткан. — Аңаа кымны-даа көрзүңерзе, дириг арттырбас сiler. Олар дезе берген болза, Даши Ширәэже далажыптыңар, чүгле сiler эскербезин шиңме. Чаштынып алгаш, мени аңаа манаңар. Хемни кеже берип шыдаарым чер тып алгыжемге чедир барыын чүкче ырадыр чоруур апаар мен. Дургуннар Даши Ширәэгэ четпәэнде, сүрүп чеде бээринер чадавас. Ындыг таварылгада чүнүү

кылышыңарны бодуң эки билир сен.

— Даңнааш, чагыртып тур мен, о, Кадыным! — деп, бөрү ырлангаң, ол-ла дораан харлыг дүмбейже чиде берген; даалыктаан айт безин ону эртип шыдавас ийик. Каш минута-даа эртпәэнде, ол өске бөрү-бile кады кундустарның бажын чыгажының чанында боогдал



чалда чеде берген турган. Олар оон кымны-даа тыппаан болбайн канчаар. Улуг хар чагбаан болза, кундустар биле уругларның байдалы баксыраар турган боор, чүгө дээрge бөрүлөр оларны истеп чорупкаш, куйга чаштынып четтикпээнде-ле, ыяап-ла тудуп аар ийик. Ынчалза-даа катап база хар чаап турган болгаш, Могрим оларны чыт тыртып-даа, истеп-даа шыдавайн барган.

Ол аразында гном ивилерни кымчылаптарга, шанак дашкаар үнгеш, соок болгаш дүмбейже халдып ыңай болган. Ол чорук Эдмундуга кедергей аар-берге ышкаш сагындырган — ооң тону безин чок турган болгай. Он беш минута безин эртиэнде, ооң хөрөэн, иштин болгаш арнын хар дүй чаапкан; арай деп аштап аарга-ла, катап база дүй чагташ турага, ынчангаш ол шыгырт туруптуу, кактандырын соксап каан. Удавайн Эдмунд өзээн өттүр доца берген. Ах, ол бодун ынчан дыка-ла аас-кејжик чок амытан кылдыр бодап турган. Ак Кадай ону хаан кылдыр олуртуп каардаа хире эвес. Ак Кадай дээргэ эки, буюнныг кижи-дир, эрге ооң талазында-дыр деп бодун чеже-даа бүзүртсө, ол бүгүн частырыгдыр дээрзин оол ам билип каан. Эдмунд ам бодунун улузу-бile, Питер-бile безин, ужуражыр дээш чырык черде бар бүгүн чувени бериптер ийик. «Болуп турага бүгүн чүүлдү дүжеп турагым чадавас, бо дораан оттуп кээр боор мен» деп бодал харын ацаа дың чангыс аргалал бооп турган. Шак-үе эртип-ле турган, болуп турага бүгүн чүүл ацаа шынап-ла багай дүш ышкаш сагындырып эгелээн.

Олар чеже хире үеде чоруп келгенин, чус-чус арынны долдур бижээш-даа, сilerge чугаалап шыдавас боор мен. Ынчангаш хар чагбастаан, эртенги хүн чырып келген, оларның хем эрии-бile халдып бар чорууру үеже дораан-на шилчиp көрейн. Бурунгаар-ла, чүгле бурунгаар, шип-ле-шимээн; Эдмунд чүгле

шанак өзээниң харга кыйыраарын, дериг-херекселдиң шыгыраарын дыңнат чораан. Хенертен Ак Кадай алгырыпкан:


— Бо чүү деп чүвэл?! Тур!

Эдмунд Ак Кадай эртенги чем дугайында сактып келген боор деп идегээн. Хупурай бер! Демгизи шанакты көңгүс өске чылдагаан-бile доктаадырын дужааган болган. Оруктан ырак эвесте ыаш чанында төгерик столду долганган борбак сандай-жыгаштарда кезек бөлүк хөглөп турган: кыс дииң ашаа болгаш уруглары-бile, ийи кижи-хуна, гном болгаш кырган дилги. Эдмунд оларның чип турган чемин эки көрүп шыдаваан, ынчалза-даа чаагайы кончуг чыт кээп, кайда-даа шиви каасталгаларын азып каан турган, харын-даа, оолга столда чигирзиг боовалар салып каан ышкаш сагындырган. Ол өйде шанак доктаай берген, а дилги, ында эң улуу болган хире, холунда дашкалый, йөрээл чугаалаар дээн дег, көдүрлүп келген. Ынчалза-даа кады чемненип олурганинар шанак биле ында олурган Ак Кадайны көрүп каары билек, оларның бугу хөглээшикини өже берген. Ада дииң серээзин аксынга чедирбейн көжүп калган; кижи-хуналарның бирээзи серээзин аксынче супкаш, уштурун уттупкан; диинчи-гештер кортканындан сыйтыцайнып эгелээн.

— Бо бүгүн чүү деп чүвэл?! — деп, Кара илбичи Кадай айтырган.

Кым-даа харыы бербээн.

— Харыылаңаr, кулугурлар! — деп, ол катаптаан. — Азы мээн улаачым сilerни кымчызы-бile чугааладыпсын бе? Бо бүгүн чазый, чашканнакчы чорук, туразында аажылаашкын чүнү көргүзүп турагы ол? Хамык аьш-чемни кайыын ап алдыңар?



— Силерниң чөпшәэреңиң-бile харылап көрейн, дәэрги мындаагылар — деп, дилги чугаалаан. — Бис алыр диведивис, биске бергени ол-дур. Бир эвес чөпшәэрәэр болзуңарза, бо дашканы силерниң амыр-кадының дәеш көдүрерин диттигип көрейн...

— Кым берди? — деп, Ак Кадай айтырган.

— Со-ок-Ир-рей — деп, дилги келдирлеп харылаан.

— Чүү-же?! — деп, Ак Кадай шанактан дүже халывышаан алгырыпкаш, медәжек корткан аңнарже углай канчаар-даа аажок улуг каш базым кылган. — Ол маңаа кәэп чорду бе? Чок, ол дәэрge болдунмас чүүл-дүр! Канчап диттигиптиңер... ындыг эвес... Мегелепкениңерни чугаалаңар, ындыг болзун харын, силерни өршәэп каар мен.

Ынчан дииңчиғештерниң бирәэзи шуут аймай берген.

— Кәэп чорду, кәэп чорду! — деп, ол омаажы-бile столду соктавышаан сыйылап турган.

Эдмунд көөрге, Ак Кадай эрниң ханзырадыр ызырныпкан, ооң сегелин куду дамды хан чуглуп бадып чыткан. Ол илбилиг мергезин көдүрүп келген.

— О, чок, чок, ынчанмайң көрүңер! — деп, Эдмунд алгырып эгеләэн, ынчалза-даа ол диләэн төндүрбәэнде-ле, Ак Кадай мергелиг холун чаңгыпкан, ол-ла дораан хөгләэн кезек бөлүк орнунга даш тавактар биле даш чигирзиг боова салган даш борбак столду долгандыр даш борбак сандайжыгаштарда даш көҗәэлөр (оларның бирәэзи даш аксынче чедир сунмаан даш серәэлиг) олургулаан.

— А бо согуг өскерликчилер болгаш шивишкіннеге болчуру деп чул дәэрзинге сени өөредип кагзын! — дәеш, Ак Кадай оолдун чаагынче дажыпкаш, шанаанче олуруп алган. — Халдып оп!

Бо төөгүнүң эгезинден бәэр Эдмунд бир-ле дугаар бодунун дугайында уттупкаш, өскениң ажыг-шүжүүн билип кәэргей берген. Шак бо даш көҗәэлөр ыржым хүндүс-даа, дүмбей дүнедаа чылдан чылче, чиңгис-бile шыптына бергизжеге чедир, даш боду үези кәэрge, үүрмектелип калгыжеге чедир, олуруп кәэрин кәэргел-бile бодавыткан.

Олар катап база бурунгаар халдып чорупкан. Ындыг-даа болза, Эдмунд удавайн оларның арнынче улдан турган хар дүнекизинден оранчок өл апарган дәэрзин өскерип каан. Оранчок чылый бергенин база. Долгандыр туман көдүрлүп эгеләэн.

Минута эртерге-ле, туман дыгый апарып, а агаар чылып турган. Шанак биеэги дег чылбас апарган. Эдмунд баштай ивилер турupкан деп бодаан, ынчалза-даа эләэн болгаш, ёзулуг чылдагаан ында эвес дәэрзин көрүп каан. Шанак, даштарга үскең чүве дег, удаа-дараа тыртыжаңнап, ызыртынып чыдыптып, өрү шурап турup берген. Күжүр ивилерни гном чеже-даа кымчылаарга, шанак улам-на оожум шимчеп бар чыткан. Долгандыр бир-ле билдин-мес шимәэн дыңналган, ындыг-даа болза, шанактың шыгыраары биле гномнүң алгы-кышкызы Эдмундуга шимәнниң кайының үнүп турарын тодарадырынга шаптык каткан. А оон шанак до-ктаап, бурунгаар-даа, соңгаар-даа чылбастаан!

Бичиң када ыржым апарган. Ол чүү ындыг шимәнил дәэрзин оол ам билип аптар. Элдептиг тааланчыг шылырааш, шииләэн дааш — билбези, ооң-бile кады билири ыыттар, чугаажок, Эдмунд оларны кажан-бир шагда дыңнаан хире, чүгле каяя дыңнааның сактып чадап каан. Оон хенертен сактып келген. Ол дәэрge суг ышкаждыл. Чер болганда каракка көзүлбес дамырактар агып, оларның мойтулаан, химиренген, шылыраан, чазылаан дааш-шымәни долгандыр дыңналып турган болган. Эдмунд сооктуң төңчүзү келген деп билип каанда, ооң чүрээ кыймыш кылынган — чүгө ындыг болганын ол боду бөзин билбәэн. Көңгүс чанында дамдылаан ыыт дыңналган — ыяштар будуктарында ожук-харның эрип турары ол ышкаждыл. Шиви будуундан улуг борбак хар кәэп дүжерге, Эдмунд Нарнияга келгендөн бәэр бир дугаар шивиниң кара-ногаан ине бүрүлөрин көрүп каан. Ынчалза-даа ооң кайганыр-даа, дыңнаалаар-даа үези оон ыңай артпаан, чүгө дәэрge Ак Кадай ол дораан:

— Аксың аазадып алгаш олурба, мелегей. Дүш, дузалаш!
— дәэн.

Эдмундуга чүгле чагыртыры арткан болбааже. Ол харже — ылавылаарга, шилдең хар кадыкче — дүже халааш, гномга шанакты тыртыжып дузалажып эгеләэн. Адак соонда олар шанакты шимчедипкен, гном ивилерни хайыра чок кымчылап-кымчылап, турган чөринден бурунгаар каш базым кылырынче албадапкан. А хар олар көрүп турда-ла, эрип, ында-мында ногаан ойт-сигенниң ортулукчугаштары көстүп келген. Бир эвес силер, Эдмунд ышкаждыл, долгандыр чүгле ак хар көрүп турган болзуңарза, ол ногаан үнүштүң ону кайы хире өөрткенин билип каар ийик силер. Ынчан шанак шуут кадалы берген.

- Ам хей-дир, дээрги мындаагылар — деп, гном чугаалаан.
- Мындыг чылыг турда, шанактыг чоруп шыдавас бис.
- Ындыг болза, чадаг чоруптар бис — деп, Ак Кадай чугаалаан.
- Бис оларны кажан-даа сүрүп четпес бис — деп, гном химиренген. — Олар бисти хөлүн эрттир мурнай берген-дир.
- Сен мээн чөвүлекчим сен бе азы кулум сен бе? — деп, Ак Кадай айтырган. — Дужаалды күүсет. Кижи амытанның холун ооргазынга хүлүп каг, хендир-бите чедип аппаар бис. Кымчың ап ал. Можаларны үзе кезивит: ивилер чанар оруун боттары тып аар.

Гном дээргизинин дужаалын күүсеткен. Элээн каш минута эрткенде, Эдмунд барык-ла маңын бар чыткан. Оон холдары хулуглуг, буттары чылчырыкка, малгашка, өл сижен-ге чылып чораан, ол тая бээрge-ле, гном олче алгыра кааптар, харын-даа кымчы-бите орааштыр шааптар болган. Ак Кадай гномнуң соондан кылаштавышаан:

— Дүрген! Дүрген! — деп чораан.

Каш базарга-ла, ногаан ортулукчугаштар улгадып, ак чер-лер бичелеп турган. Бичии болгаш-ла, база бир ыяш хар шывыны дүжүр октантар. Удавайн кайнаар-даа көөр болза, ак сома-дүрзү-лер орнунга шивилерниң кара-ногаан холдарын азы чойган, пөш, хады ыяштарнын каразымаар инелерин көрүп каар турган сiler. А удаваанда туман аккыр эвес, алдынналчак апаргаш, бичии болгаш, шуут чиде берген. Хүн херелдери арганы өттүр дээп турган, ыяштар баштарының аразында ак-көк дээр чырып кел-ген. Үр болбаанда, оон-даа кайгамчык чүүлдер болуп эгелэн. Мөңгүннелчек хадың үнген оймакче ээпкеш, Эдмунд ында чер кырын сарыг чечектер бүрүнү-бите шыва апканын көрүп каан. Сугнуң шылыраары дыңзыг апарган. Элээн каш базым кылгаш, олар дамыракты кежер ужурга таварышкан. Оон ырак эриинде хек-даваннаар үнген болган.

Кажан Эдмунд чечектерни чараşсынып магадаар дээш бажын эргилдирип кээрge: «Кылашта, кылашта, хая көрүнме» — деп, гном хыйлангаш, хендирни өш харал шеле тыртыпкан.

Ынчалза-даа, билдингир херек, шак ол чагырган кыйги Эдмундуга долгандыр болуп турар бүгү чүвени көөрүнгө шаптык-таваан. Беш минута болгаш, ол кулчаларны көрүп каан — алдын-налчак, кызыл-хүрөң, ак өңнүг олар кырган ыяшты долгандыр

өзүп үнүп турган. А оон сугнуң шылыраарындан-даа магадан-чыг ыыт дыңналган — хенертен оларның бар чытканы кокпа-ның мырыңай чанында ыяш будуунда күшкүш мыжыраан. Аңа харыылап, элээн ыракта ыяштан өскези эде берген. Ол дораан, демги үннер медээ болган дег, бүгү таладан мыжыраан, сыйыр-ган үннер болгаш хензиг када кыска тырылааш үн дыңналып эгелэн. Каш минута эрткенде, бүгү арга күштар ырларындан кыңгырткайны берген. Эдмунд кайнаар-даа көргеш, күштарны-ла эскерип турган; олар будуктарже хонуп, оон бажынга дээр чыгыы чавыс ужуп, бот-боттарын сүржүп, алгыжып-кыржып, эптеҗип, думчуу-бите чүглерин эдип-чазап турган.

— Дүрген! Дүрген! — деп, Ак Кадай алгырган.

Туманның изи безин артпаан. Дээр улам-на көгерип, ак-көк апар-ла чыткан, кезек болгаш-ла, аккыр буултучугаштар олап дүрген көжүп эртип турган. Делгем оймактарда баштай частып келген чечектер саргарарган. Салғын-сырын эзиннелип, ыяштар-ның будуктарын аяар чайгаарга, олардан дамды-суглар чуглуп бадып турган; чорумалдарга кайгамчык чаагай чыт кээп турган. Дыттар болгаш хадыңнар ногаан чөөк-бите, а сарыг хараган ал-дын чөөк-бите шыптыныпкан. Хадыңнарда ам хоюг, өттүр көстүр чуга бүрүлөр частып келген. Чорумалдар ыяштар адаа-бите бар чыдырда, хүн чырыы безин ногаан ышкаш сагындырган. Олар-ның кыры-бите ары ужуп эрте берген.

— Бо дээрge анаа чылыг дүшкени эвес-тир — деп, тура дүшкеш, гном чугаалаан. — Бо — Час-тыр! Бис ам канчаар бис? Силерниң кыжыңарның төнчүзү келген-дир! Ол болза Аслан-ның ажылы-дыр!

— Бир эвес кайы-бирээнэр ам бир катап-даа оон адын адап диттигер болза — деп, Ак Кадай чугаалаан, — доп-дораан өлүртүп каар!



XII

ПИТЕРНИҢ БИРГИ ТУЛЧУУШКУНУ

А ШАК-ЛА ОЛ ҮДЕ КУНДУСТАР БИЛЕ УРУГЛАР оон ыракта хөй шак дургузунда чоруп келген. Долгандыр турар бойдус кайгамчык чараш дүште ышкаш апар чыткан. Олар тоннарын шагда-ла уштуп октапкан, ам бот-боттарынга: «Көркөр! Чараш күшкашты! — Азы: — Ой, конгурактарны! — Азы: — Бо чүү деп чүве ындыг магалыг чаагай чытталып тур? — Азы: — Чүгле дыннап көрүңдер, ыраажы хек эдип тур!» — дижирин безин соксап каан. Олар ам шак ол эки-чаагай элбекшилге таалап ханып, бирде хүннээректээн чылыг оймактар-бile, бирде ногаан шырыштарның сериин хөлгезин таварты, бирде катап база күчүлүг хадылар чокпак будук-бүрүзүн баш кырында бедидир хере сунган чингистиг аяңар-бile, бирде аажок чаагай чыды оларны ужур шаапкы дег чечектелген инек-караа биле долаананың тудуш шырыжын таварты ыыт чок бар чыткан.

Кыш олар көрүп турда-ла, аткаарлап, эләэн каш шак дургузунда үе январьдан май чедир чыла бергенин көргеш, уруглар Эдмунд ышкаш кайгаан. Нарнияже Аслан эглип кәэрge,

ындыг болур ужурлуг-даа дээрzin олар билбес турган. Ынчалза-даа олар шупту билип турган: Нарнияда төнчү чок кыш — Ак Кадайның, ооң кара сагыштыг илби-шидизиниң үүлгеткен херээ-дир, а час дүжүп келген болганды, ооң хамык херектери баксырап эгелээн-дир. Хар чокта, Ак Кадай шанактыг чоруп шыдавас дээрzin база олар билип каан. Ынчангаш далажырын соксадып, удаа-дораа доктаап, эләэн үр дыштанып ап турганнар. Ол үеге чедир олар турупкан болбайн канчаар, ынчалза-даа чилчии шуут үзүлбейн, уйгу-дүште дег, оожум шимчеп бар чытканнар. Оларның сагыш-сеткили, агаарга эрттирген узун хүннүң төнчүзүндө дег, тайбын дыштыг апарган. Сүүзен ээжээн бичии ўйдуруп алган.

Улуг хем оларның солагай талазында чыдып калган. Дашибирээгэ чедер дизе, мурнуу чүкче азы оң талаже ээптер ужурлуг турган. Эгбес-даа турган болза, олар биеэги оруу-бile чоруп шыдавас апарган: хем үерлей берип, оларның кокпазы таварып эрткен черде ам шапкын сарыг суг дааш-шимээнниг мөөрөп ағып чыткан.

А оон хүн ажып эгелээн, ооң чырыы кызып, хөлгөлөр узай берген, чечектер халбыңнарын хаап алыр үе келген бе бодалга алзыпкан.

— Ам-на мыя мында — деп, эр Кундус чугаалааш, аңы турага бедик ыяштар үнген, кылын эглиң-нээш чингис-бile — ону кызыл-даван кырлаары дыка-ла тааланчыг болган — шыптынган тейже үнүп эгелээн. Хүннү бадыр чоруп келген соонда, тейже үнери берге болуп, олар шупту эгиштей берген. Лүүси «Экидир дыштанып албас болзумза, тей бажынга чедип шыдаар мен бе?» деп чигзинип эгелеп турда, олар хенертен ында турар болган. А оларның көрүжүнгө ажыттынган чүүлдер бо-дур.

Чорумалдар ногаан аяңда турган. Оларның буттарының адаанда, дөвүн куду арга-арыг каарып, карак чедер чөр бүрүзүндө көстүп чыткан, чүгле чөөн чүктө ыракта, оларның чиге мурнунда, бир-ле чүве кыланнап, янзы-бүрү өңүнг көзүлген.

— Кайгамчык-тыр оо! — деп, Питер Сүүзенче хая көрүнгеш, үндүр тынган. — Далай!



А аяңың ортузунда Даши Ширәэ — кырында дөрт даш салган улуг кара-куу калбак даш — бедип турган. Ширәэ аажок эрги кылдыр көзүлген. Ында ужуру билдинмес демдектер — биске билдинмес дылдың үжүктери чадапчок — оюп каан болган. Олар же көргөн кижи элдептиг, тайылбырлаттынмас минниишкин-сеткиишкинге алзыптар. А оон уруглар кыдынында тургузуп каан майғынны көрүп каан. Ах, кандыг кончуг кайгамчык чүүл көстүп турар дээр сiler, ылангыя ам, кажан олче ашкан хүннүң шавышкак херелдери дээп турда аан: сарыг торгу шывыг-пөстер, кызыл-хүрөц хендир-баглар, чаан сөөгү өргөннөр, а майғын кырында, оларның арнынчы ырак далайдан хадаан салғын-хатка чайганып, сонгу даваннарында турупкан кызыл арзылаң дүрзүү сиилбээн тук сыйта кийискип турган.

Хенертен оларның он талазында хөгжүм үнү дыңналган, эргилип келгеш, олар манап турган чүүлүн көрүп каан.

Аслан ону чартык дээрбек кылдыр долганып алган амытанин төвүндө турган. Ында холдарында чадаганнар тудуп алган ыяш, суг ээлери кыстар — бистин делегейде адаары дег, дриадалар биле найдалал бар болган, хөгжүм үнү оон дыңналып кээп турган чүве-дир. Ында дөрт улуг кижи-аскыр турган. Оларны үстүндөн көөргө, шыңгы-даа болза, чараш даг-кижилер дег, а адаандан көөргө, күчүлүг аскырлар дег болган. Ында оон ыңай чангыс-мыйыс деп амытан, кижи баштыг буга, пеликан күш, эзир болгаш аажок улуг ыт бар болган. Асланның чанында ийи леопард турган. Оларның бирээзи Оон дүжүлгө бөргүн, өскези Оон тугун тудуп алган турган.

А Асланның Бодун сilerге канчаар тодарадып бижирил? Ону уруглар-даа, кундустар-даа кылып шыдавас ийик. Оон-бile боттарын канчаар алдынарын, чүнү чугаалаарын база олар билбес болган. Нарнияга кээп чорбаан улус бир-ле чүүлдүң чаңгыс угда буюнныг болгаш түрлүг болуру болдунмас деп бодаар. Питер, Сүүзен болгаш Лүүси бир шагда ынчаар бодап чораан-даа болза, ам чазып чораанын билип кааннар. Чүгэ дээргэ олар Арзылаңчэ көөр деп шенээш, көрүп шыдавайн турарын билип кааннар, олар чүгле алдын чөл биле улуг, шыңгы, шуут-ла кижиини өттүр көрүптер карактарны эскерип четтиккен.

— Олче чоокшулай бер — деп, эр Кундус сымыранган.

— Чок — деп, Питер сымыранган, — баштай сiler.

— Баштай Адамның үк-салгалы, а оон — дириг амытанин — деп, аңаа эр Кундус сымыранып харылаан.

— Сүүзен — деп, Питер сымыранган, — сен барзыңза чүл? Кыс улусту көзээде мурнунче эрттирер ийик.

— Улуувус сен-не болгай сен — деп, Сүүзен сымыранган.

Ынчалдыр ур сымырашкан тудум, оларга улам-на эпчок апар чыткан болбайн канчаар. Адак соонда Питер баштай ол хөделир ужурга таваржырын билип каан. Ол хынындан хылыжын ужулгаш, Асланга ёзулаан. Арткан уругларга: «Мени эдерер сiler. Боттарыңарны туттунуңар» — дээш, ол Арзылаңга чоокшулап келгеш:

— Бис чедип келдивис... Аслан — дээн.

— Эртип моорланар, Питер, Адамның оглу — деп, Аслан чугаалаан. — Эртип моорланар, Сүүзен, Лүүси, Еваның кыстары. Эртип моорланар, Кундустар.

Арзылаңың үнү чоон болгаш өткүт болган, уруглар, та чүгэ ийик, ол дораан хөлзөвейн барган. Ам оларның сеткил-чүрээ өөрүшкүлүг, амыр-тайбың апарып, Асланның мурнунга ыйт чок турары оларга көңгүс эпчок эвес ышкаш сагындырган.

— А дөрткүңцөр кайыл? — деп, Аслан айтырган.

— Ол артканнарын садыптар бодааш, Ак Кадайның талазынчы шилтчий берди, о, Аслан — деп, эр Кундус харылаан.

Ынчан бир-ле чүве Питерни мынча дээринчэ албадапкан:

— Ол дээш мен база буруулуг мен, Аслан. Мен аңаа хорадап турдум, бодаарымга, мээн оом ону меге орукче чыгапкан-дыр.

Аслан ол сөөстерге чүү деп-даа харылааваан, анаа-ла турup алгаш, оолче топтап көрүп турган. Бүгү улус, амытанин бо таварылгада, шынап-ла, оон ыңай чүнү-даа чугаалаан хөрөэ чок дээрзин билип каан.

— Аслан, Эдмундуңу кандыг-бир арга-бile камгалап ап болур бе? — деп, Лүүси дилээн.

— Ону камгалаар дээш бүгү-ле аргаларны ажыглаар бис — деп, Аслан харылаан. — Ынчалза-даа ол хөрөг бодап турарыңардан бергэ болур чадавас.

Арзылаң катап база ыйт чок барган. Баштайы минутаданна Лүүси Оон көрүжүнүң кайы хире хааннарынын, күчү-күштүүн база оон-бile чергелештир амыр-тайбыңын магадап турган, а ам Оон көрүжү мунгаргай база дээрзин хенертен эскерип каан. Ынчалза-даа ол аян-шинчи дораан өскерли берген. Аслан челин

силгипкеш, бир аспаан өскези-бile часкапкан. «Коргунчуг-ла аспактар-дыр — деп, Лүүси боданган. — Дыргактарын Ооң киир тыртып билири-ле эки-дир».

— Че, ам дээрэзинде дойдан белеткезиннер — деп, Аслан ыяш ээлери кыстарга чугалаан. — Еваның кыстарын майтынче аппаргаш, оларже сагыш салып көрүнөр.

Угбашкылар чоруй баарга, Аслан аспаан Питерниң эктинге салгаш — ох, аар-ла аспак болган! — мынча дээн:

— Адамның оглу, бараалы, сээн хааннаарың ордуну сенээ барып көргүзейн.

Питер холунда хыльшты ам-даа тутпушаан, Арзыланың әдерип, аяңның чөөн талазынче чорукан. Оларның көрүжүнге каас-чараш чер ажыттынып келген. Оларның артында хүн ажып турган, куду чыдар бүгү узун чооганы — арга-арыг, тейлер, шынаашык, мөнгүн чылан дег дыйланып баткан хемни — кежээки хаяа чырыы-бile шыва апкан болган. А талыгыр ыракта бурунгаар далай көгерип, ашкан хүнден кыза берген булуттар дээрде салдал чораан. Чер биле далайның ужурашканы хем аксында чавыс тей көдүрлүп, ында бир-ле чүве кыланнаан. Ол болза орду болган. Ооң барыны талаже көрүнген бүгү соңгаларында кызыл хүн кыланып турганы ол чүве-дир, а Питер сактырга, далай эриинде дыштанып чыдар аажок улуг сылдыс көрген ышкаш болган.

— Бо дээрge, о, Кижи амытан — деп, Аслан чугаалаан, — дөрт дүжүлгелиг Кэр-Паравел-дир, сен ол дүжүлгелерниң бирээзинге саадаар сен. Мен ону сенээ көргүзүп тур мен, чүгэ дээрge сilerниң эн улуунар болгаш, Дээди Хаан болур сен.

Питер катап база чүнү-даа чугаалааван — таптыг-ла ол өйде ыржымны элдептиг үн үрепкен. Үн труба эдери дег, чүгле оон чоон болган.

— Ол дээрge сээн дунмаң уругнуң эдискизи-дир — деп, Аслан Питергэ аяар, бир эвес арзылан дугайында ынча деп болур чүве болза, моортайлаштыр киргирээн дег сагындырар кылдыр чугаалаан.

Питер ону дораан билип шыдаваан. Ынчалза-даа ол арткан кижилер, амыттаннар бурунгаар чүткүп турарын көргеш база Аслан аспаан карбаш кылгаш: «Дедир! Тажы дайынчы алдар-хүндүнү боду чаалап алзын!» — деп алгырыптарга, чүү болганын ам-на билип кааш, майтынче бар шаа-бile маңнап ыңай болган. Ол аңа коргунчуг чүве көрген.

Суг, ыяш ээлери кыстар чүк башка дезип чоруп турган. Питерге уткуштур Лүүси бодунуң бичии бутчугаштарының дүргедеп шыдаар шаа-бile маңнап кел чыткан. Ооң арны ак тос болган. Чүгле ынчан Питер Сүүзенни эскерип каан. Үяшче согунналдыр ужугул келгеш, уруг будуктан халбактаны каапкан, а оон сыр соондан улуг куу араатан аң кончуг дүрген маңнап орган. Питер баштай ону адыг деп бодаан, а оон ытка дөмейлээн, чүгле ол ыттан элээн улуг болган. Хенертен ооң сагыжынга «бөрү ышкаждыл» деп бодал кирип келген. Соңгу даваннарынга туруп алгаш, бөрү мурнуу даваннары-бile ыяш унундан даянып алган. Ол ырланып, диштерин шаккыладып турган, оон ооргазының дүгү сирбее берген. Сүүзен чүгле черден өрү ийиги будукче үнүп шыдаан. Ооң бир буду куду халаңнап, араатанның аксынга бичи-ле четпейн турган. Питер чүге ол бедидир үне бербезил азы оода-ла быжыдыр халбактанып албазыл деп кайгай берген, а оон дунмазы ам дораан меделин оскунгаш, кээп дүжер-дир деп билип каан.

Питер ындыг-ла кончуг дидим кижи болуп чорбаан, харындаа, ол сактырга, кортканындан харыксырап баксырап калган ышкаш болган. Ынчалза-даа коргуушкун чүнү өскеерип шыдаар деп: хүлээлгэ аңа кандыг дужаал берип турарын ол билбейн канчаар. Оол хылыжын көдүргеш, маңгысче, ону херлип-херлип согар дээш, аттыктыр шурай берген. Бөрү согугну частырыпкан. Ол Питерже чаңнык дег дүрген эглип келген. Ооң карактары киленциэнинден кыптыгып, өжээннег ырланыы аксындан үне халып турган. Араатанның өжүүккени кедереп, ырланыын тудуп шыдаваан. Питерни ол-ла камгалаан — оон башка бөрү допдораан оон боскундан сегирип алыр ийик.

Оон соондагы бүгү чүве дыка дүрген болуп эртип, Питер чүнү-даа медереп билип четтикпээн: ол бөрүнүң аксындан чайлай бергеш, хылыжын оон мурнуку даваннарының аразындан дортла чүрээнчे бар шаа-бile кадалдыр шанчыпкан. Кааш секунда коргунчуг дүште дег карацайнып эрткен. Бөрү өлүм-бile демисежип чыткан, оон арзайган диштери Питерниң хаваанга дегген. Оолга долгандыр хандан база бөрү дүгүндөн өске чүү-даа чок ышкаш сагындырган. А оон бир карак чивеш дээр аразы болгаш, маңгыс оон буттарының баарында өлүг чыткан. Питер оон хөрээнден хылыжын арай деп ушта тыртып алгаш, хөндүрлүп, караанче киир аккан дерин чодуп алган. Ооң мага-боду бүрүнү-бile ыстап-шылап турган.

Бичии болгаш, Сүүзен ыяштан дүжүп келген. Көрүп эрткени хөлзээшкىнден олар ийилээн бут кырынга арай деп турганнар база чажырып канчаар мен — ийилээн карак чажы биле ошкаашкыннаардан туттунуп шыдаааннар. А Нарнияга ол дээш кымны-даа чемелевес.

— Дүрген! Дүрген! — деп, Асланның үнү дыңналган. — Кижи-аскырлар! Эзирлер! Шыргайда өске бөрүнү көрүп тур мен. Дуу ында, артындарда. Ол мырынай чаа дезип маңнаты. Сүрүчөр! Ол бодунуң ээзинче маңнаар эвес бе. Ооң ачызында Ак Кадайны тып алыр бис, Адамның төлдеринин дөрткүзүн база тып алыр бис.

Ол дораан даваннарын дагжадып база чалгыннарын шилиредип, амытанинарын эң дүргеннери карангы дүмбейже шымны берген.

Питер, ам-даа тыныш алыр харык чок, Асланның үнүнчө эргилип келгеш, ооң бодунуң чанында турарын көрүп каан.

— Хылыжың чодуп аарын уткан-дыр сен — деп, Аслан чугаалаан.

Ындыг болган-даа. Питерниң арны кызып, кыланнааш бисчे көөргө, бөрү ханы бар болган. Ол ээkkеш, хылыжын сиғенге, а оон тонунуң эдээнгө кургадыр чодуп каапкан.

— Хылышты менээ бергеш, дис кырынга олуруп ал, Адамның оглу — деп, Аслан чугаалаан.

Питер ооң дужаалын күүсөткөн.

Калбартыр туткан бис-бile ооң эктинге деггеш, Аслан:

— Туруп кел, Питер хайырааты, Бөрү Хыдыкчызы. Сен-бile чүү-даа болур болза, хылыжың чодуп аарын черле утна — дээн.



XIII

YE-ДҮПТҮН ЧАЖЫТ БИЛДИ-БИЛИИ

А АМ ЭДМУНДУЖЕ ЭГЛИР YE КЕЛГЕН-ДИР. ОЛАР тура дүшпейн бар-ла чыткан. Мурнуnda ол черле ындыг үр чадаг чоруп болур дээрзинге канчап-даа бүзүрревес турган ийик. Оон адак соонда, кажан олар улуг-чаагай пөш болгаш шиви ыяштар хөлгезинде чыдар дүмбей чоогага чедип келгенде, Ак Кадай доктаап дыштанырын чарлаан. Эдмунд ол дораан черже доңгая кээп дүшкен. Оон-бile ам чүү боору аңаа дөмей-ле турган, чүгле дыш алыр арга берген болза ол-ла. Ак Кадай биле гном чоогунда бир-ле черде аяар чугаалажып турган.

— Чок — деп, гном чугаалаан, — ам ооң ажыы чок, о, Ак Кадын! Олар ам Даш Ширээдэ чеде берген болбааже.

— Могрим бөрү бисти тып чедип келгеш, бүгү медээлерни дамчыдарынга бүзүррэли — деп, Ак Кадай чугаалаан.

— Тып чедип-даа келзе, ооң эки медээлер эккээри кандыг-ла болду — деп, гном чигзинген.

— Кэр-Паравелде дөрт дүжүлгө бар — деп, Ак Кадай чугаалаан. — А бир эвес оларның чүгле үжү ээллеттинер болза чүл? Ынчан демги бурунгу чугаа боттанмайын баар.

— Ылгал бар бе? Кол-ла чүве — Ол мында-дыр — деп, гном чугаалаан. Бодунун чагырыкчызы-бile чугаалажып турған, гном Асланның адын ам-даа адап диттикпейн турған.

— Оон маңаа үр артып каары албан эвес-ле болгай. А ол чоруй баарга, Кэр-Паравелде демги үш кижиже халдаар бис.

— Ынчалза-даа бо чүвени салбас болза эки — гном ынча дээш, Эдмундуң тепкен. — Туттурган кижи барда, чугаала-жыышкын кылышы белен-не болгай.

— Ындыг харын! Ону хостап аарын манаар де! — деп, Ак Кадай кыжыраан аянның чугаалаан.

— Ындыг болза — деп, гном чугаалаан, — кылыш ужурлуг чүвени ам дораан күүсется эки.

— А мен ону Даш Ширээгे кылыш болза эки деп санаар мен — деп, Ак Кадай чугаалаан. — Кылыш ужурлуг черге. Эрте шағдан бээр ону кылып келген черге.

— Че, Даш Ширээн болур-чогууру-бile ажыглаар үе ам дораан келбес боор — деп, гном удурланган.

— Ол шын — деп, Ак Кадай чугаалаан. — Ам канчаар, мен эгелей берейн.

Хенертен аргадан бөрү хүүледир улуп үне халып келгеш, оларже уткүй маннаңкан.

— Мен оларны көрдүм. Үжелээ Даш Ширээде Оон-бile кады турлар. Олар Могримни, мээн даргамны, өлүрүп кагды. Адамның оолдарының бирээзи ону чок кылып кагды. Мен шыргайже чаштына бергеш, бүгү чүүлдү көрүп турдум. Тын менди үнүнцер, амы-тынның артыңар!

— Чүгэ? — деп, Ак Кадай чугаалаан. — Ынчанган хөрээ чүл? Бистин бүгү улузувусту барып чылып эккел. Олар бээр аргалыг-ла болза дүрген чедип келзин. Даг-кижилерни, четкерлерни, мээн таламда ыяштар ээлерин кыйгыр. Амылыгларже халдап чоруур өлүглерни, магачыннар болгаш буга баштыг моостарны кыйгыр. Хоранның мөөгүлөр ээлерин, бөрү кылдыр хуулуп шыдаар кижилерни кыйгыр. Тулчур бис! Мээн илбилиг мергем чок эвес! Олар бисче халдап кээрge, шуптузун даш кылдыр хуулдуруп шыдавас мен бе?! Дүрген халып чорувут. Мен борта бир улуг эвес херекти эчизинге чедирер ужурлуг мен.

Аажок улуг араатан бажын согайткаш, хая көрүнгеш, халып ыңай болган.

— Ындыг-ла-дыр — деп, Ак Кадай чугаалаан, — бисте мында ширээ чок-тур... Боданып аайн, шаптык катпа сен... Оон ооргазын ыяшка чышиш тургузуп кагза эки.

Эдмундуң тургузур тепкилеккеннер. Гном ону ыяшче эккелгеш, аажок дыңзыдыр баглап каан. Эдмунд көөргө, Ак Кадай тонун уштуп октап турған, оон хар дег ак чанагаш холдары көзүлгөн. Холдар ак боорга-ла, оол оларны көрүп каан — дүмбей чоогода кара ыяштар адаанды аажок караңгы болгаш, ол өске чүнү-даа көрүп чадап каан.

— Өргүлдү белетке — деп, Ак Кадай чугаалаан.

Гном Эдмундуң хөйлөниниң моюндуруун чешкеш, андара каапкан. Оон оолдуң бажының дүгүндөн сегирип алгаш, бажын аткаар тыртыптарга, оон сегели өрү көдүрлү берген. Эдмундуң элдептиг хылыраан дааш дыңналган: ол чүү дээр сен? Хенертен ол билип каан: бижек чидидип тураг-дыр!

Хенертен өске ыыт — дыңзыг алгы-кышкы, даван даажы, чалгыннар хаккылаажы болгаш Ак Кадайның килемнээн алгызы дыңналган. Дааш-шимээн чанғыланып, хөлзээзин көдүрлүп үнген. А оон оол бир-ле күштүг холдар ону чежип хостап, көдүрүп турарын билип каан, чымчак чоон үннөр дыңналган:

— Чытсын че... аңаа кызыл-арагадан кудуп берицер... Бичииден иживит че... сенээ оон эки апаар.

А оон соонда үннөр аразында чугаалажып эгелээн:

— Кара илбичи Кадайны кым тудуп алды?

— Сени деп бодадым чоп.


— Оон холунда бижекти ушта шаапканым олчаан ону көрбэдим.

— Мен гномну сүрүп турдум... Таанда-ла, Ак Кадай дезе бергени ол бе?

— Бүгү чүвени хары угда сактып кээр харыым кайда боор... А бо чүл?

— Чүү-даа эвес, анаа кырган төжек-тир.

Эдмунд ынчан меделин шуут оскунупкан.



Удавайн кижи-аскырлар, чанғыс-мыйыстар, ивилер болгаш күштәр (мурнундагы эгеде Асланның Эдмундуң камгалазын дәэш чорудупканы дириг амьтанаң) оолду көдүрүп алгаш, Даң Ширәэже дедир чорупкан. Олар чоруй барган соонда, чоогага чүү болганын билип кааннар болза, кайгап шаг боор турганнар ийик.

Мырыңай ыржым турган. Удавайн дәэрге ай үнүп келген, оон чырыы чидии кончуг апар чыткан. Силер аңаа турган болзуңарза, айның чидиг чырыында қырган тәжек биле шору улуг инек-дашты эскерип каар ийик сiler. А оларны чоогундан топтап көрген болзуңарза, сilerге бир-ле чүүл әлдептиг қылдыр сагындырап ийик — чижәэләэрge, тәжек черде дыгдыныпкан чыдар бичии чоон амьтана га аажок дәмей деп. А бир эвес шыдамык чоруунар четчири болза, тәжектиң инек-дашка чеде бергенин, а инек-даштың туруп келгеш, аңаа бир-ле чүве чугаалай бергенин көрүп каар ийик сiler. Херек қырында тәжек биле инек-даш дәэрге гном биле Ак Кадай болган де! Ак Кадайның бир илбishiizi болза кымны-даа, оон иштинде бодун-даа, таныттынmas қылдыр хуулдуруптары турган. Ыңчангаш қажан оон холунда бижәэн ушта шаалтарга, ол аңгадай бербейн, бодун база гномнү инек-даш болгаш тәжек қылдыр хуулдурупкан. Илбилиг мергежигеш аңаа артып каап, база камгалаттына берген.

Қажан Питер, Сүүзен болгаш Лүүси дараазында әртен оттуп кәэрge, — а олар дүнүн өттүр майғынга овалап каан сыртыктарга удуп чыткан — агай Кундус оларга хамыктың мурнунда дүүн кежәэ Эдмундуң Ак Кадайның холундан камгалап каанын, ам ол мында, турлагда, Аслан-бile хөөрежип турарын чугаалаан.

Уруглар майғындан үнүп келгеш, Аслан биле Эдмундуң өске бүгү амьтанаңың хажызында шалың дүшкен ойтсигенде кожа агаарлап қылаштажып турарын көрүп кааннар. Сilerге ол чугааны катаптаары шуут-ла албан эвес — артында Асланның чогум чүнү чугаалаанын кым-даа дыңнаваан, чүгле Эдмунд оон сөстерин бүгү назынында утпас қылдыр сактып алган. Уруглар чоокшулат кәэрge, Аслан оларже уткүй хая көрнүп келген.

— Дунмаңар, ақынар бо-дур. Соонарда артып калган чүве дугайында оон-бile чугаалашкан ажыы шуут чок.

Эдмунд шуптузунуң холун ээлчештир туткаш, кижи бүрүзүнгө: «Мени өршәэп көр» — дәэн, оларның кайызы-даа: «Ажырбас, ону чугаалааш чоорул» — деп харылаан.

А оон олар эң-не бөдүүн, хүннүң-не чугаалаар бир-ле чүве чугаалаксап, катап база өнүктөжип алганын көргүзүксәэн, ынчалза-даа оларның кайызы-даа — канчап-даа каар бооп қыжанза — чүнү-даа бодап тып чадап каан. Оларга арай эпчок апар чыткан, а ынчан леопардтарның бирәэзи чедип келгеш, Асланга мынча дәэн:

— Дәэрги мындаагылар, дайзынның төләэлекчизи Силерден ону хүләэп алрын дилеп тур.

— Бәэр чедип келзин — деп, Аслан чугаалаан.

Леопард чоруй баргаш, удавайн гном-бile кады ээп келген.

— Чер иштиниң оглу, Менәэ чүнү дыңнадыр дәэш келдин? — деп, Аслан айтырган.

— Нарнияның Кадыны, Озалааш Ортулуктарның Чагырыкчызы оон амы-тынынга айыыл чок байдалга бәэр чедип келгеш, сilerниң оон дудак чок сонуургалдыынар херек дугайында сiler-бile чугаалажып болур деп даанырынарны дилеп тур.

— «Нарнияның Кадыны», ынчадеп де! — деп, эр Кундус химиренген. — Ындыг ыят чок чорукту мен ам-даа...

— Оожум, Кундус — деп, Аслан үзе кирген. — Удавайн бүгү ат-дужаалдарны ёзулут ээлеринге эгидип бәэр. А амдызында маргыжып канчаар бис. Чер иштиниң оглу, бодуңнүң чагырыкчынга, бир эвес ол бәэр кәэр бетинде илбилиг мергезин дөө ол улуг дуб адаанга кааптар болза, оон айыыл чок чоруу дәэш Мәэн дагдынып турарымны дамчыт.

Гном ол негелде-бile чөпшәэрешкен. Леопардтар оон күүсөлдөзин хынаар дәэш гном-бile кады чорупкан.

— А ол хенертен леопардтарны даш қылдыр хуулдуруп-тас бе? — деп, Лүүси Питерге сымыранган.

Ол-ла бодал леопардтарның бажынга база кирген деп бодаар мен; чүү-даа болза, оларның ооргазында дүгү сирбее берген, кудуруу, ыт көрүп каан моортайны дег, хоолайландыр көдүрлү берген.

— Шупту чүве эки болур — деп, Питер аңаа харыылап сымыранган. — Аслан оларның айыыл чогунга бүзүревәэн болза, оларны чорутпас ийик.

Эләэн каш минута болгаш, Ак Кадай боду тей бажынга көстүп келгеш, оймакты кежип, Асланның мурнунга турup алган. Олче көргеш, Питер, Сүүзен болгаш Лүүсиниң — олар ону мурнунда көрбәэн-не болгай — эът-боду чымырай берген; аң-мен аразында оожум ырланган үн дыңналган. Дәэрде хүн чайынналдыр

чырып турза-даа, шупту доңуп эгелээн. Чүгле Аслан биле Ак Кадай боттарын хөлзээзин чок алдынып турган хире. Ол ийи — алдынналчак болгаш өлүмзек ак тос — арын-шырайны ботбуундан ындыг чоок көрүү өлдөп болган. А Ак Кадай Асланче чиге көрүп шыдавааны-ла шын; кыс Кундус ону өжегээр харгалзап турган.

— Силерниң араңарда өскерликчи бар-дыр, Аслан — деп, Ак Кадай чугаалаан.

Анаа турган улус дөгере ооң Эдмунд дугайында чугаалаанын билип каан. Ынчалза-даа Эдмунд ооң-бile болган бүгү чүвениң соонда база Аслан-бile эртөнгү чугаа соонда бодунуң дугайында барык-ла бодавайн турган. Ол биеэги хевээр көрүжүн Асландан черле чайлатаан; Ак Кадайның чүнү чугаалап турары аңаа ужур-утка чок ышкаш сагындырган.

— Чүл ынчаш — деп, Аслан харыылаан. — Ооң өскерликчи чоруу сенээ эвес, а өске улуска хамаарыштыр болган-дыр.

— Чажыт Билди-билигни уттултуң бе? — деп, Ак Кадай айттырган.

— Уттулкан дижик мен — деп, Аслан мунгаргай харыылаан. — Чажыт Билди-билиг дугайында биске чугаалап бер че.

— Сенээ чугаалап бээр че? — деп, Ак Кадай катаптаан, ооң унү хенертэн улам чидий берген. — Чанында турарывыс бо Дашибирээде чүнү бижээнин чугаалаар бе? Ыдыктыг тейниң өргүл салыр дажында, чыданың согуллары-бile дег, чүнү оюп каанын чугаалаар бе? Сээн Ачаң, далай ындының Дээди Чагырыкчызы Боду чүнү бижип каанын чугаалаар бе? Шаг шаандан бээр Ооң Нарнияга сицирип кааны Билди-билигни сен менден дора эвес билир сен. Ол ёзугаар өскерликчи бүрүзү мээн эргемде турарын билир сен. Ол — мээн хойилу ёзугаар олчам-дыр, өскерликчи чорук бүрүзү дээш өлүрер эргем бар.

— А-а — деп, эр Кундус узун-суук чугаалаан, — силер ынчангаш бодунарны кадын мен деп турар ышкаждыл силер: чүгэ дээрge Дээди Чагырыкчы силерни шаажылакчы кылдыр томуйлаан де!

— Оожум, Кундус — деп чугаалааш, Аслан аяар ырланы берген.

— Ынчангаш бо кижи амытан — мээзии — деп, Ак Кадай уламчылаан. — Ооң амы-тыны мээн эргемде, ооң ханы — мээн өнчүм.

— Ындыг болза, ону ап ал! — деп, кижи баштыг буга мөөрээн.

— Мелегей — деп, Ак Кадай чугаалаарга, ооң эрниң каржы хүлүмзүрүг эмчийтилкен. — Таанда-ла, сээн хайыраатың мээн хойилу ёзугаар эргемни күш-бile казып кааптар деп бодадын бе? Чажыт Билди-билиг деп чүл ол дээрзин Аслан кончуг эки билир. Эрте-бурунгу хойилуда чугаалап турары дег, мен өскерликчиниң ханын төкпес болзумза, Нарния от биле сугдан узуткattyнар дээрзин ол билир-ле болгай.

— Ылап-ла шын — деп, Аслан чугаалаан. — Мен ол ындыг эвес дивейн тур мен.

— О, Аслан — деп, Сүүзен Ооң кулаанга сымыранган. — Бис ынчап шыдавас бис... мынча диксеп тур мен: силер ону тудуп бербес боор силер аа? Таанда-ла, Чажыт Билди-билигте удур чүнү-даа кылып болбас бе? Аңаа салдар халдадыр кандыг-бир арга туруп болур бе?

— Дээди Чагырыкчының Чажыт Билди-билингэ салдар халдадыр че? — деп, Аслан катап айттыргаш, уругже эргилип кээп, дүндүе берген. Оон ыңай кым-даа ындыг сөстер катаптап дидинмээн.

Ол бүгү үе иштинде Эдмунд Асланның бир талазынга туруп алгаш, Олче салдыкпайн көрүп турган. Эдмундуун ынныжы тырттына берген, оол «бир-ле чүве чугаалаар ужурлуг эвес мен бе» деп боданган, ынчалза-даа доп-дораан оон чүгле чаңгыс чүүл манап турарын билип каан: чүгле аңаа чугаалаан чүвени кылдырын.

— Аткаарлай беринер — деп, Аслан чугаалаан. — Мен Ак Кадай-бile дың ийилээн чугаалажыйн дээш.

Шупту Аңаа чагырткан. Ах, чүү дээр боор, Арзылан биле Ак Кадайның чүнүн дугайында ындыг шыңгыы чугаалажып турарын билип алыксааш, баш ыжып манаары дыка-ла бергэ болган.

— Эх, Эдмунд — дээш, Лүүси ыглап бадырыпкан.

Питер арткан бүгү улус, амыттаннардан хая көрнүп алгаш, ырак далайже көрүп турган. Эжеш кундуустар бот-боттарын даваннарындан тудуп алгаш, баштарын халайтыпкан. А сөөлзүредир кым-даа шимчевейн барган. Эң-не аяар ыыттар: дүктүг-арының өөлээри, аргада ыракта күштар ырлаары болгаш хатка бүрүлерниң шылыраары безин дыңналып турган. А Аслан биле Ак Кадайның чугаазы төнмөстээш туруп берген.

Ам-на Асланның үнү үнген.

— Чоокшулап кээп болур силер — деп, Ол чугаалаан. — Мен шупту чувени таарыштырып кагдым. Ол силерниң дун-маңарның амы-тынын негээринден ойталаап тур.

Оймак кырынга, ол бүгү үеде олар тыныжын тыртыштырып, ам чаа хөрек долдур улут тынган дег, улуг тынышкының эзини тарай берген. Оон шупту улус, амытаннар чугаалаажып эгелээн.

Ак Кадайның арнында өјү ханган өөрүшкү чайнаап турган. Ол чоруп бар чыткаш, база бир катап доктаагаш:

— Аазашкын сагыттынарын мен канчап билип аар мен?
— деп айтырган.

— Хр-р-р! — деп, Аслан, артыкы даваннарынче турбушаан, ырланы берген. Ооң аксы алгыдыр ажыттынып, ырланыры дың-зып кел-ле чыткан, а Ак Кадай карактарын аңгайтып, аксын аазадыпкаш, хевиниң эдээн эде тырткаш, дезип ыңай болган.



XIV

АК КАДАЙНЫҢ ТИИЛЕЛГЕЗИ

АК КАДАЙ КӨЗҮЛБЕЙН БААРЫ БИЛЕК, АСЛАН
мынча дээн:

— Бис моон көжүп чоруур ужурлуг бис, бо чер өске со-
рулгалар дээш херек апаар. Бо кежээ Беруна хемниң кежийиниң
чанынга турлагланып аар бис.

Арзылаңның Ак Кадай-бile канчап дугуржуп апканын
билип алышсааш, бүгүде канчаар-даа аажок бергедеп турган
болбайн канчаар, ынчалза-даа Ооң арын-шырайы биеэ хөвээр
дошкуургай болган, шуптузунуң кулактарында Ооң коргунчуг
ырланганы ам-даа дыңналып турган, ынчангаш кым-даа Оон
чүве айтырып дидинмээн.

Хүн ойт-сигенни кургадып четтигипкен, олар ажык дээр
адаанга шуут-ла аянга дүштеки чемин чип алган. Оон шупту
ажыл-хөрээн кылып кирипкен: чамдыктары майгынны бузуп,
дүрген, өскелери эт-сеп чыып турган. Удавайн дүүш соонда олар
турлагдан көжүп үнгеш, соңгу-чөөн талаже чорупкан. Чедер чер
ырак эвес боорга, далашпааннар. Орук ара Аслан Питерге Bodу-
нуң дайын чорудар планын тайылбырлап чораан.

— Ак Кадай бо черлергэ бодунуң ажыл-хөрээн төндүр
кылыптары билек, ол шаарланчак бөлүү-бile кады шивээзинче

аткаарлааш, камгалалга белеткенири ылап боор — деп, Ол чугаалаан. — Ону орук ара тудуп алыр чадавас сен, ынчалза-даа ол дээш дагдынары болдунмас-тыр.

Аслан оон тулчуушкуннуң ийи планын нийтизи-бile чуруп көргүзүп берген: бирээзи — бир эвес Ак Кадай болгаш ооң талалакчылары-бile арга иштинге тулчур апарза, өскези — бир эвес ооң шивээзинче халдаар апарза. Арзылан Питерге дайын чорудулгалары кылышынга хамаарыштыр хөй-ле сүме берген, чижээлээрge: «Кижи-аскырларны маңаа азы дуу аңаа тургузуп аар ужурлуг сен» азы: «Ак Кадай ындыг азы мындыг чүүл кылбайн тураг деп шынзыгары-бile хайтылчылар чорудар ужурлуг сен». Адак соонда Питер:

— А Силер бистин-бile кады тураг-ла болгай сiler, Аслан — дээн.

— Ону Мен сенээ аазап шыдавас мен — деп харылааш, Аслан Питерге айтышкын, сүме бээрин уламчылаан.

Оруктуң ийиги чартыында Аслан Сүүзен биле Лүүсиден ыраваан. Ынчалза-даа Ол уруглар-бile барык чугаалашпаан база оларга мунгаргай кылдыр көзүлген.

Кежээ дүшпээнде-ле, олар шынааның ийи талаже чарлы бергени, а хемниң сыйгап калганы черде калбак салдамче үнүп келген. Ол болза Беруна кежиг болган. Аслан чоок эрикке доктаар деп дужаал бээрge, Питер:

— А ол чарык эрикке турлаг кылыш алза эки эвес бе? Бир эвес Ак Кадай дүне бисчे халдап келзе канчаарыл? — дээн.

Аслан, бир-ле чuve дугайында бодап турган боду, сырбаш дээш, челин силгээш:

— Чүү дидин? — деп айтырган.

Питер бодунуң сөстерин катаалтаан.

— Чок — деп, Аслан тоомча болгаш киржилге чок харылаан. — Чок, бо дүне ол бисче халдавас — дээш, Ол хандыр улуг тынган. Ынчалза-даа дораан немеп каан: — Ол дугайында бодакының дөмей-ле эки-дир. Дайынчы кижи ындыг болур ужурлугдаа. Чугле бөгүн ол чугула эвес.

Оон олар Ооң айыткан черинге турлаг тип эгелээн. Асланың хөөнү арткан бүгү улусчесе шилчий берген. Ооң кадында харысалганы бодумга бүрүн хүлээнип албышаан, Ак Кадай-бile тулчур апаар мен деп бодалдан Питер аажок дүвүреп турган. Аслан оларны каапкаш баар деп оол манаваан, ындыг медээ ону күштүү-бile хөлзедипкен. Кежээки чөм ыыт чок эрткен. Бо кежээ

дүүнгү кежээден, оон туржук бөгүнгү эртенден безин улуг ылгалдыын шупту медереп билип турган. Эки чаагай үелер эгелеп четтикпейн төнер деп-даа барган дег.

Ындыг медереп билишишкин Сүүзенни аажок хаара тудуп алганындан ол, удуп чыдып алгаш-даа, уйгузу келбейн турup берген. Ол-бо талаже андарлып-дундерлип, иштинде: «Бирээ, ийи, үш...» — деп санап-ла чыткан, а уйгу келбес-ле, келбес. Ынчан ол Лүүсиниң хандыр улуг тынгаш, ооң чанында караңгыда андарлып-дундерилгенин дыңнап каан.

— Сээн база уйгун келбейн-дир бе? — деп, Сүүзен айтырган.

— Ийе — деп, Лүүси харылаан. — Сени удуп калган деп бодадым. Сүү, дыңнам!

— Чүү дидир сен?

— Мен бир-ле багай чuve ожаап билип тур мен... бистин кырываысче айыыл диргелип келген-даа ышкаш.

— Шынап бе? Шынын чугаалаарга, мен база.

— Ол чuve Аслан-бile холбаалыг — деп, Лүүси чугаалаан. — Чок-ла болза Ооң-бile бир-ле айыыл-халап болур, чок-ла болза Ол боду бир-ле халаптыг чuve кылыш боор.

— Ийе, Ол хүннү бадыр анаа эвес чоруп турду — деп, Сүүзен чөвшээрешкен. — Лүүси, тулчуушкун үезинде Ол бистин-бile кады турбас мен деп чүзүл? Чүү деп бодаар сен, Ол бо дүне бүдүү чорой баргаш, бисти чааскаандырываысты кааптар дивээн бе?

— А Ол ам кайдал? — деп, Лүүси айтырган. — Мында, майгында бе?

— Мен бодаарымга, чок.

— Үнүп барып көрээлем. Ону көрүп каар чадавас бис.

— Бараалы че — деп, Сүүзен чөвшээрешкен, — дөмей-ле удуп шыдавас-тыр бис.

Уруглар удааннар аразы-бile аяар эрткеш, майгындан чылбыртып үнэ бергеннер. Айдыңнап турган, даштар дамчып агып баткан хемниң шылыраарындан өске, чаңгыс-даа ыыт дыңналбаан. Хенертең Сүүзен Лүүсиниң холундан сегирип алгаш:

— Көр! — деп сымыранган.

Оймактың ыяштар үнүп эгелээн эң кыдыында Арзыланы олар көрүп каан — Ол аргаже оожум кирип бар чыткан. Уруглар аразында чугаалашпайн-даа, Ооң соондан чорупкан.

Арзылан тейниң кадыр ийин өрү үнгеш, он талаже ээпкен. Бөгүн хүндүс оларны бээр эккелгени орук-бile Ооң бар чыдары бүгү чувениң аянындан илдең болган. Ол бирде дыгый

хөлөгеже чаштынып, бирде айның бүлүргэй чырыынга көстүп кээп, ырап бар-ла, ырап бар-ла чыткан. Уругларның буттары удавайн шалындан өде берген. А Аслан-бile чүү болуп турар чоор? Олар Ону ындыг қылдыр чөрле көрбээн. Оон бажы донгайып, кудуруу халая берген, Ол хөлүн эрттири турупкан дег, аажок оожум бар чыткан. Кажан олар хөлөгө чок, чаштына бээри болдунмас ажык чөрни эртип чыдырда, Арзылаң хенертен доктайдай дүшкеш, хая көрнүп келген. Дезери утка чок боорга, уруглар олче чеде берген.

Олар чоокшуулап кээрге, Ол мынча дээн:

— Ах, төлдер, төлчүгештер, чүгэ мени эдердинер?

— Бис удуп чададывыс — деп, Лүүси чугаалааш, оон ыңай чүнү-даа чугаалаан хөрээ чогун, Аслан оларның бодалдарын ол чокка-ла билирин ожаап билип каан.

— Бис Силер-бile кады барып көрээли... дилеп тур бис... кайнаар-даа баар болзунарза — деп, Сүүзен дилээн.

— Кады... — дээш, Аслан боданы берген. Оон мынча дээн:

— Ийе, силер Мээн-бile кады барып болур силер, бо дүне өңнүктөрим-бile турарым дээш өөрүүр-дүр мен. Чүгле Мээн айыткан чөримгэ доктаарынары, Мээн оон ыңай чааскаан чоруурумга шаптык катпазынارны аазаңар.

— О, өөрүп чөттирдивис! Бүгү чүвени Силерниң дужаарынار ёзугаар қылыр бис! — деп, уруглар хөлзеп алгырган.

Оон олар катал база орукче үнүпкен. Арзылаң ортузунда, уруглар ийи қыдыында бар чыткан. Ынчалза-даа Оон қылажының оожумун! Оон өндүр-бединдик улут бажы аажок чавыс донгайып, думчуу ойт-сигенге дээр чыгыы чораан. Оон Ол тептиккеш, аяар човууртай каапкан.

— Аслан! Хайыралыг Аслан! — деп, Лүүси сымыранган.

— Канчап бардыңар? Биске чугаалап берип көрүңцерем.

— Силер аарый бербээн силер бе, хайыралыг Аслан? — деп, Сүүзен айтырган.

— Чок — деп, Аслан харылаан. — Менээ мунгаранчыг, чааскаанзыргай-дыр. Силерни мээн чанымда деп билип чоруурмуда, холуңарны челимчө салып көрүңцерем.

Угбашкылар Арзыланың көрүп каан ояар-ла аажок қылышаары, ынчалза-даа Оон чөпшээрели чокка кажан-даа қылып диттикпези чүвени қылганнар — доңа берген холдарын Оон кайгамчык чарааш челинчө супкаш, ону суйбап эгелээннер. Оруктуң артын олар ынчалдыр чоруп келген. Удавайн уруглар Да-

Ширээ турар тейни өрү көдүрлүп олуарын билип каан. Оларның оруу ийниң ыяштар мырынай бажынга чедир үнген талазы-бile шөйүлгөн турган. Кажан олар сөөлтү ыяш-бile дужаажып келгенде, Аслан доктаагаш, мынча дээн:

— Уруглар, силер маңаа артып каар ужурлуг силер. Чүудаа болуп турза, силерни кым-даа эскербезин дээш кызыдыңар. Байырлыг.

Кызыжактар чүгэ ынчап турарын боттары тайылбырлап шыдавас-даа болза, ажыг-шүжүглүг ыглажы берген, оон Арзылан-га чыпшыр чөлөнгөш, Оон челин, думчуун, даваннарын болгаш улуг мунгаргай карактарын ошкап эгелээн. Адак соонда Ол хая көрүнгөш, тейниң шуут-ла бажынчө шиглей олардан ырап чорупкан. Лүүси биле Сүүзен чокпак үнүштер аразынга чаштыныш алгаш, Оон соондан көрүп чыдып калган. Оларның көргөн чүвези бо-дур.

Даш Ширээни долгандыр мөөң амытаннар чыглып келген. Ай биеэги хөвээр чидиг чырыдып турза-даа, кызыл чалбыштыг, бүгүдени кара ыш-бile бүргепкен чырыткылар тутканнары хөй болган. Ында кымны чок дээр! Аажок улуг азыг-диштерлиг ма-гачыннар, бөрүлөр, буга баштыг кижилер, дүрзүзү багай шулбус кадайлар, хоралыг ыяштар биле хоранныг үнүштер ээлери болгаш мээн тодарадып бижип шыдавазым (оон башка улуг улус силерге бо номну номчуурун хоруп кааптар) өске коргунчуг амытаннар —четкерлер, шулбустар, албыстар, аза-буктар, куудайлар, маңгыстар болгаш оон ангы-даа кара күштер. Чаңгыс сөс-бile чугаалаарга, Ак Кадайның талазында турган база оон дужаалын ёзугаар бөрүнүң борта чыгтаны бүгү амытаннар. А тейниң дал ортузунда Да-ш Ширээ чанында Ак Кадай боду турган.

Чоокшуулап орар Арзыланың көрүп кааш, маңгыстар кортканындан улуп эгелээн, Ак Кадай боду-даа хензиг өйде коргуушкунга алзыпкан ышкаш сагындырган. Ынчалза-даа ол доп-дораан орталанып келгеш, киленни-бile кыпсынчыдыр каттыргаш туруп берген.

— Мелегей чүве! — деп, ол алгырган. — Мелегей чүве чедип келген-дир! Ону дүрген хүлүнөр!

Лүүси биле Сүүзен тынар-тынмас апаргаш, Аслан дайзыннарже ырланмышаан шурай бээр боор деп манап турган. Ынчалза-даа ынчаар болбайн барган. Дөрт шулбус кадай кочулап хүлүмзүрүп, шоода аарак, ындыг-даа болза, Олче чоокшурай бергеш, дужаалды күүседирииндөн эгезинде диттип чадап, Асланчө чагдап эгелээн.



— Хүлүңер дидир мен! — деп, Ак Кадай катааптаан.

Шулбустар Асланче шурай бергеш, Ооң удурланаң деп бодавайн-даа туураын көргеш, чидиг үн-бile байырлап кышкыржы берген. Ынчан арткан дайзыннар — кара гномнар болгаш сарбашкыннар — оларга дузалажып халчып келген. Аажок улуг Арзылаңче мөөңү-бile хөме халдааш, олар Ону ойтур октап алгаш, хүлүп эгелээн. Халдакчылар, та чүү ындыг маадырлыг чорук кылган дег, тиилелгелиг алгыржып турган. Шынап-ла, Арзылаң оларны чаңгыс аспаа-бile чылча базып шыдаар ийик. Ындыг-даа болза, Ол, кажан дайзыннары хендирлерни Ооң мага-бодунчe кестинип кире бээр кылдыр дыңзыды тыртып каарга безин, шимчевээн, чаңгыс-даа ыыт үндүрбээн. Арзылаңны хүлээш, ону Даш Ширээже сөөртүп чоруп кааннар.

— Туруңар! — деп, Ак Кадай чугаалаан. — Баштай ону кыргып каалтар херек.

Өжээннig алгы-кышкының частыышкыннарынга үдеткеш, мөөң амыттан чон аразындан холунда хачылыг магачын үнүп келгеш, Асланның чанынга дискектенип олуруп алган. «Халырт-хүлүрт» деп хачы халырап, черже алдын дүргектер чагтан дег дүжүп турган. Магачын көдүрлүп кээрge, уруглар боттарының чаштынган черинден көңгүс өске Асланны көрүп каан — Ооң бажы чөл чокта, бичизи кончуг ышкаш сагындырган! Асланның дайзыннары база Ооң кайы хире өскерли бергенин көрүп каан.

— Көрүңер даан, бо болза анаа-ла улуг моортай ышкажыл! — деп, оларның бирээзи алгырган.

— Бис оон коргуп турган бис де! — деп, өскези хөлзеп алгырган.

Асланны долгандыр бөлдүнчүп алгаш, олар Ону кочулап эгелээн. «Диис-диис-диис!» — деп, олар алгырышкан. «Сен бөгүн чеже күске туттун?» «Сүт ижиксей-дир сен бе, дииспек?»

— Ах, канчап ынчап боорларыл — дээш, Лүүси ишкирнип ыглай берген. Ооң карааның чажы чаагын куду дамырак суг дег агып бадып турган. — Бужар куурумчулар!

Баштайгы аар хөлзээшкін эрте бээргэ, челин кестиритип каапкан Аслан Лүүсиге мурнундаагызындан артык дидим, кайгамчык чараш кылдыр сагындырып эгелээн.

— Ооң хаайынче хөмээштен кедирип калыңар — деп, Ак Кадай дужааган.

Ам Аңаа хөмээш кедирип турда безин, ооң аажок улуг аксы чанғыс шимчээн болза, оларның ийи-үш хирези хол-бут чок артар ийик.

Бінчалза-даа Арзылаң мурнуку хевээр шимчевээн. Дай-зыннарын Ооң ындызы улам хорадаткан ышкаш сагындырган. Олар шупту, чанғыс амытан дег, Олче шурай-ла бергеннер. Хұлұглұг чыдырда, Олче чоокшулаарындан коргуп турганнары безин, ам дидимнели бергеннер. Каш минутада Аслан шуут көзүлбейн барган — ол бұғы шаарланчак бөлүк Ону ол хире сырый үглеп келген. Маңғыстар Арзыланың теп-шанчып, соп, Олче дүкпүрүп, Ону шоодуп турганнар.

Адак соонда ол бұғы оларның хөөнүнге дәэптерге, олар ҳұлұглұг Арзыланың Даش Ширәэже сөөртүп алгаш чорупкан. Каждан олар Ону ынаар сөөртүп эккелгенде, Аслан аажок улуг болгаш, шупту Ону арай деп Ширәэже салып алган. А ооң соонда хендирлерни оон-даа дыңзыды тыртып қааннар.


— Кортуктар! Кортуқ хейлер! — деп, Сүүзен ишкирнип ыглап турган. — Олар ам-даа Оон коргуп тураган-дыр. Ам безин aan.

А оон Асланны қалбак Дашка чыпшып шарып қаан. Ол ам хендир дүргә дег сагындырган. Бұғы амытаннарның ыыды читкен. Холдарында чырытқылығ дәрт шулбус қадай Ширәениң дәрт азында туруп алган. Ак Кадай, әрткен дұне дег, тонун уштуп октапкан, чүгле ам ооң мурнуңда Эдмунд әвес, Аслан чыткан. Оон бижәэн чидидип әгеләэн. Биженекке чырытқының чырыы дәэптерге, уруглар шак ол нарын болгаш коргунчуг хевирлиг бижекти қандан әвес, а даштан қылғанын көрүп қаан.

Ам-на Ак Кадай Асланче чоокшуладап келгеш, Ооң бажының чанынга туруп алган. Ооң арны өжүккенинден хуула берген, а Аслан биеәги хевээр дәэрже көрүп чыткан, Ооң қарастарында килен-даа, коргуушкун-даа чок болган — чүгле муңгарал. Ак Кадай әәккеш, шанчар бетинде өөрүп байырлап чугаалаан:

— Че, кайывыс удуп алган-дыр? Мелегей, бодуннун өлүмүн-бile өскерликчи оолду камгалап аар мен деп бодадың бе? Дугуржуп алғанывыс ёзуғаар мен ооң орнуңга сени өлүрүп каар мен. Чажыт Билди-билиг ёзуғаар өргүлдү қылған турар ужурлуг. А сен өлү бәэрингे, ону база өлүрүп каар мен — кым менә шаптыктап шыдаарыл? Кым ону мәәң қолумдан ушта тыртып аарыл? Сен Нарнияны менә кезәә-мөңгеде бериптиң, бодуннун амы-тыныңы осқундуң база өскерликчини өлүмден камгалап шыдавадың. А ам, ону билип чыда, өлү бер!

Лұғас биле Сүүзен Ак Кадайның бижекти қадалдырышанчыпканын көрбәэн. Оларга ону көөрү аажок берге боорға, қарастарын шийипкеннер.



XV

ҮЕ-ДҮПТУҢ-ДАА МУРНУНДАГЫ ЧАЖЫТ БИЛДИ-БИЛИГ

УРУГЛАР АМ-ДАА, АРНЫН ХОЛУ-БИЛЕ ДУГЛАП алгаш, чадан үнүштер аразынга олурда, Ак Кадайның үнү оларға дынналган:

— Шупту мәэн соом-бile, дайзыннарны узутқап каалы. Ам Улуг Мелегей, Улуг Моортай өлгендe, кижи сысқындызын база ескерликчилерни дүрген тиилеп аар бис.

Дараазында әләэн каш минута уругларга багай төнчүлүг бооп болур турган. Өжээрек маңыстарның бүгү шаарланчак бөлүү черлик алгы-кышкы, янзы-бүрү эдискилерниң ыы-сызы болгаш өткүт сыйлап-коолаан ыыдынга үдеткеш, Сүүзен биле Лүүсиниң чаштына берген чериниң чаны-бile ийни куду халып ыңай болган. Уруглар чаны-бile кара күштерниң соок хатсалтын дег кончуг дүрген эртип турарын, кижи-бугаларның аар дуюгларының адаанда черниң канчаар сирилләенин, дастар биле часкыларның кара чалғыннарының баш кырында канчаар хаккылаанын медереп билип турган. Өске өйде болза, олар кортканиндан сирилләэр ийик, а ам оларның чүректери качыгдалга алысқан болгаш, олар чүгле Асланның бужар байдалга коргунчуг өлүмүнүң дугайында бодаарынга өйлешкен.



Сөөлгү ыыт-шимәэн оо-жургай бәрge, Сүүзен биле Лүүси тей бажынчe кедеп чедe берген.

Ай барык ажа берген, чуга булуттар ону бо-ла дуглас турган, а хендир-бile хұлұп багласаан өлүг Арзылаң дәэр ағында ам-даа көстүп чыткан. Лүүси биле Сүүзен өл ойт-сигенчe дис кырынга олуруп алгаш, Асланны ошқап, Оон кайгамчык чарап челин, ылавылаарга, оон артып калган чүүлдү сүйбап эгелләэн. Карактарын ыжыздыр ыглап алғаннар. Ынчан олар бот-боттарынчe көрүшкеш, ындыг чaaаскаанзыргай болбазы-бile холдарын туттунчуккаш, катап база ыглай бергенниер, оон катап база соксап кааннар. Адак соонда Лүүси:

— Бо аажок коргунчуг хөмәешче көрүп шыдавас-тыр мен. Ону шүтүп шыдаптар эвес бис бе? — дәэн.

Олар хөмәэшти ушта тыртарын оралдашкан. Ол ындыгла белен эвес болган, чүгө дәэрge оларның салаалары соогундан көжүп калган база караңгызы аажок апарган болган, ынчанмыже олар адак соонда ону кылып шыдапкан. Ынчан уруглар катап база ыглажып, Арзылаң хаайын сүйбап, Оон хан биле көвүүн аштап чодуп эгелләенир. Оларга кайы хире чaaаскаанзыргай, коргунчуг, мунгаргай болганын тодарадып бижип шыдавас-тыр мен.

— Чүү деп бодаар сен, Оон хұлұүн чежип шыдаар бис бе? — деп, Сүүзен чугаалаан.

Ынчалза-даа өжээрек маңыстар хендирлерни уруглар чежип шыдавас кылдыры дыңзыды тыртып каапкан болган.

Номчукчуларның кайызы-даа бодунун чуртталгазында Сүүзен биле Лүүси ышкаш аас-кежик чок турбаан боор деп идеңдер-дир мен. Ынчалза-даа силер кажан-бир дүннү өттүр карааңар шуут кургай бергижеге чедир ыглаан болзунарза, адак соонда силерни оожургал база моон соңгаар кандыг-даа эки чүве болбас деп бодал хаара тудуптарын билир боор силер. Чүүдаа болза, Лүүси биле Сүүзенге ынчаар сагындырган. Шактар эртип-ле, соогу дам барып-ла турган, а олар чүнү-даа эскербәэн. А оон Лүүси чөөн чүктө дәэр кыдыры бичиү чырый бергенин

көрүп каан. Уруг оон өске-даа чүүлдерни база көрген: ооң буттарының чанында ойт-сигенде бир-ле бичиижек амытаннар ыңай-бээр чүгүржүп турган. Баштай уруг оларже кичээнгей салбаан. Дөмей-ле эвес бе?! Ам аңаа бүгү чүве хамаан чок апарган болгай. Ынчаарга удавайн аңаа ол амытаннар — кымнар-даа болган болза — Ширээниң буттарын дамчыштыр өрү көдүрлүп эгелээн ышкаш сагындырган. Ам олар Асланның мөчү-бодунда маңажып туар-дыр. Уруг чоокшуладыр эækкеш, кандыг-ла-бир куу аңчыгаштарны көрүп каан.

— Тыфу! — деп, Ширээниң өске талазында олурган Сүүзен хөлзеп алгыра каапкан. — Чүү адам бужар чүвэл! Чүдек күскелер! Моон ырап чорунар! — Оон ол күскелерни сывырары-бие холун көдүрүп келген.

— Мана — деп, ол үеде күскелерден карак салбайн турган Лүүси чугаалаан. — Көрүп тур сен бе?

Уруглар эækкеш, топтал көрүп эгелээн.

— Бодаарымга... — деп, Сүүзен чугаалаан. — Элдептиин аа! Олар хендирлерни хемирип тур!

— Ынча деп бодадым-даа — деп, Лүүси чугаалаан. — Бокүскелер — өнүктер-дир. Күжүрлер Ону өлүг деп билбейн ту-пар. Аңаа дузалажып, хүлүгден хостаар деп туарлар-дыр.

Ол аразында барык чырый берген. Уруглар бот-боттарының арыннарын ылгап эгелээн — ак тос чүвэлөр болган! Хендирлер үзе хемирген күскелерни база көрүп кааннар: чүс-чүс бичии ой-күскелер. Адак соонда хамык хендирлер дараалаштыр үзе хемиртине берген.

Чөөн чүктө дээр шуут агарып, сыйлыстар, горизонт кы-рында чаңгыс улуг шолбандан ангыда, имирерип калган.



Соогу аажок апарган. Күскелер тарай маңажы берген, уруглар Асландан хендирлер дүргектерин ап октапкан. Хүлүг-бек чокта, Аслан бодунга дөмей кылдыр көзүлген. Бичии болгаш-ла, чырып кел чыткан, ынчангаш Ооң арын-шырайы улам-на шевергин чарааш кылдыр көстүр болган. Аргада, оларның артында, күш мыжыраан. Уруглар артында сырбаш кылынган — хөй шак дургузунда ыржымны чаңгыс-даа ыыт үревейн турган-на болгай. Өске күш харыс кылдыр бир-ле чүве сыйырган. Удавайн бүгү арга күштар үннери-бие эдип, сыйыра берген.

Дүн эрткен дээрзинге кандыг-даа чигзиниг артпаан. Эртен дүшкен.

— Мен дыка-ла дондум — деп, Лүүси чугаалаан.

— Мен база — деп, Сүүзен билинген. — Кылаштажыр бис бе?

Олар тейниң чөөн талакы ийинге келгеш, куду харап көрген. Улуг шолбан ам көстүр-көзүлбес апарган. Куду арга каарып көзүлген, ынчалза-даа ыракта, дээр биле черниң тудушкаанда, далайның дилиндээ чырып турган. Дээр ак-кызыл апарган. Уруглар ыңай-бээр кылаштажып, бичии-даа болза чылыгарын оралдашкан. Ох, оларның турупкан деп чувезин! Буттарын арай деп сөөртүп, кылаштажып чорааннар. Далай биле Кэр-Паравелче көөр дээш доктаай бергеннер. Чүгле ам олар ону ылгап көрүп шыдааннар. Олар көрүп турда-ла, дээр биле далай аразында кызыл дилиндек алдынналы берип, сугдан хүннүң кыдыры аяар-оожум көстүп келген. Ол-ла өйде олар артында, даг-кижи аажок ишкир аяан буза шаапкан дег, дыңзыг дазыраан ыыт дыңнап кааннар.

— Бо чүл? — деп, Лүүси Сүүзенниң холундан тудуп албышаан чугаалаан.

— Мен... көөрүнден коргуп тур мен — деп, Сүүзен чугаалаан. — Ында чүү болуп тур? Коргунчуун.

— Ам база Аслан-бие бир-ле чүве кылып турлар. Бир-ле багай чүве — деп, Лүүси чугаалаан. — Дүрген бараалы.

Ол хая көрнүп келгеш, Сүүзенни эдертил алган.

Хүн херели дээп кээрge, бүгү чүве көнгүс өскээр көстүп, шупту өннөр болгаш өннөрниң янзылары өскерли берген болгаш, олар баштай чүү болганын билбейн барган. А оон дораан Даши Ширээни ханы тиг-бие ийи чартык кылдыр одура шаап каанын, а Асланның чогун көрүп кааннар.

— Коргунчуун аа!.. — деп, Лүүси ыглай берген. — Өлүп каарга бэзин, Аңаа амыр-дыш бербес.

— Кым ынчанганыл?! — деп, Сүүзен хөлзеп алгырган. — Мөөң утказы чүл? Катап база Билди-билиг бе?

— Ийе — деп, оларның артында дыңзыг үн дыңналган. — Катап база Билди-билиг.

Олар хая көрнүп келген. Уругларның мурнунда хүнгэ чайыннап, челин силгип — оозу биеэгизинден улгаттыр өзүп үнүп келген хире — Аслан бо турган!

Ах, Аслан! — деп, Олче өөрүшкү болгаш коргуушкун биле көрбүшшан, уруглар ийилээн алгырыпкан.

— Сен дириг сен бе, хайыралыг Аслан? — деп, Лүүси айтырган.

— Ам — ийе — деп, Аслан харыылаан.

— Сен... эвес сен... эвес бе? — деп, сирилээн үн-билие Сүүзен айтырган. Ол «хей-чуве» деп сөстү ыыттаар кылдыр бодун албадап шыдаваан.

Аслан алдынналчак бажын доңгайткаш, оон хаваан чылгап каан. Ургунч арнынчे Ооң чылыг тыныжы эзиннелип, дүктүң чаагай амданы айдызап келген.

— Мен асаа дөмей-дир мен бе кай? — деп, Ол чугаалаан.

— Ах, чок-чок, Сен дириг-дир сен, шынап-ла Сен-дир сен! Ах, Аслан! — деп, Лүүси алгыра берген, оон ийи уруг Ону ошкап-чыттаап, куспактап эгелээн.

— А бо бүгү кандыг уткалыг чүвөл? — деп, олар элээн оожургай бергенде, Сүүзен айтырган.

— Утка мындыг — деп, Аслан тайылбырлаан. — Ак Кадай үе-дүлчө ханылап кирген Чажыт Билди-билигни билир болгандыр. А бир эвес оон-даа хандыр, Нарнияның төөгүзү эгелээр бетинде турган ыржымче база дүмбейже бакылап шыдаар турган болза, өске Чажыт Демдектерни номчуп аар ийик. Өскерликичиниң орнунга өргүл Ширээзинче буруу чок, кандыг-даа үүлгедиг кылбаан амытан эки туразы-билие үнүп кээр болза, Ширээ буступ каарын база Өлүм боду оон мурнунга аткаарлай бээрин Ак Кадай билир аар ийик. А ам...

— Ийе-ийе, ам чүү боорул? — деп, адыш часкавышаан, Лүүси айтырган.

— Ах, уруглар — деп, Арзылан чугаалаан. — Күжүм катап кирип турарын билир тур мен. Тудунар-ла мени!

Бир секунда хире Ол чаңгыс черге турган. Ооң карактары кыланайып, даваннары сиринейнип, кудуруу быгыннарын улдап турган. Оон Ол агаарже бедидир шурай берип, уругларны

ажа ужуккаш, Ширээниң өске талазынга черже олура дүшкен. Лүүси чүге ынчап турарын боду-даа билбейн, бар шаа-билие каттырышаан, Асланны тудуп аар дээш Ширээже халбактанып үне берген. Арзылан катап база шурай берген. Сүрүүшкүн эгелээн. Аслан долгандыр халып-ла, бирде уругларны оранчок мурнап, бирде оларның холунче кире бер чазып, бирде оларның аразы-билие өде халып, бирде оларны агаарже бедидир өрү октапкаш, аажок улуг хилиң дүктүг мурнуку даваннары-билие дозуп тудуп ап, бирде оът-сигенге даваннар, холдар-буттарны орааштыр үжелээ дүкпуртуландыр чуглур кылдыр кадап каан дег тура дүжүп туруп берген. Ийет, ынчалдыр чүгле Нарнияга ыймакта-жып ойнап болур. Бо оюн чаыс-чайыктыг шуурган-билие оюнга бе азы дииспеек-билие оюнга дөмей бе дээрзин Лүүси билир чадап каан. Эң-не хөктүг чүве болза кажан уруглар эгиштей бергеш, ам-на оът-сигенче кээп дүжергэ, олар олчаан могаанын-даа, аштап-суксаанын-даа уттуупкан.

— Ажыл-херекче шымнып кирер үевис келген-дир — деп, Аслан чугаалаан. — Ырланыр деп барганымны билир тур мен. Кулааңац дуглап алыңар!

Олар оон айы-били күүсеткен. Кажан Аслан туруп келгеш, ырланыры-билие белеткенип, аксын ажыдыптарга, Арзылан уругларга аажок түрлүг көстүрге, Олче көрүп диттикпээннер. Оон ырланган үнүндөн ыяштар черже ийлени бергенин олар көрүп каан — хат киткәрге, оът-сиген ынчалдыр ийлени бээр болгай.

Оон Ол:

— Узун орук мурнууста манап тур. Мени мунуп алыңар — дээн. Арзылан чёрже ээгип аарга, уруглар Ооң чылыг алдынналчак ооргазынче халбактанып үне берген: баштай Сүүзен олурупкаш, чеди быжыг сегирип алган, оон соондан Лүүси олурупкаш, Сүүзенден быжыг туттунуп алган. Аслан бут кырынга туруп келгеш, эң-не чүгүүрүк айттандан-даа дүрген бурунгаар маңрап ыңай болган — баштай ийни куду, а оон шыргай эзим-били.

Ах, ол маңның кайгамчыктын! Нарнияга олар-билие болган бүгү чүведен эң экизи ол турган боор. Силер кажан-бир айт мунгаш, даалыктаткан сiler бе? Шак ол маңны чүгле дуюглар дадыраары биле айт деринин шыңгыраары чокка бодап көрүнчөр даан, чүге дээргэ Арзыланың аажок улуг даваннары чирге барык-ла дааш чок дээп чораан. А дас кара, бора азы доруг айт ооргазының орнунга алдынналчак кештин чымчак эрбеннел-чээн, хатка эстээн чеди бодалтыңар даан. А оон эң-не чүгүүрүк

аъттан ийи катап дүрген бурунгаар ужугуп бар чыдараңарны болап көрүнөр. Артында-ла силерниң хөлгөнөр дын-даа хереглевес, кажан-даа туруп-могавас. Ол улам-на ырадыр, тайып ушпайин, ол-бо талаже эгбейн, ыяштар уннарының аразы-бile капшагай былдамыктап, чадаң үнүштерни, шырышталган даяларны, дамырак сугларны ажа халдып, хемчигештерни сузуп кежип, терең хемнерни эштип кежип маңнап бар-ла чыдар. Силер Ону мунупкаш, орукка, сесерликке эвес, өвээнчилиг ээн черлергедаа эвес, а бутү Нарнияны кежир, чазын дыт үнген хөлгөлиг кокпалар-бile, дуб ыяш үнген хүннээрек алаактар-бile, черлик вишняның хар дег ак садтары-бile, коолаан хоолааштар чаны-бile, чингис шыпкан хаялар болгаш чаңгыланып турар куйлар чаны-бile, оттуг чадан үнүш шыпкан хат каккан ийлерни өрү, өвээнчи сиғен хөме үнген даглар деспектери-бile, баш дескинип турар кадыр даглар кыдыры-бile, а оон — куду, куду, куду — катап база арга-ыяштыг чоогалар болгаш ак-көк чечектер шыва алган карак четпес шынаа-шыктар-бile халдып-ла олурап силер.

Биче дүүште олар кадыр тейниң бажында турган, оон эдээнде шивээ көзүлгөн — үстүндөн ол ойнаарап ышкаш сагындырган — олар көөргө, шивээ чүгле шиш баштыг суургалардан бүткөн дег болган. Арзылан дүрген маңнап орган болгаш, шивээ секунда санында-ла улгадып турган, ынчангаш уруглар «Бо кымның шивээзил?» деп боттарындан айтырып четтикпээнде-ле, олар оон чанында келген. Ам шивээ ойнаарап ышкаш сагындыраа. Ол турлуг бедий берген турган. Ханада бизендер аразында кым-даа көзүлбээн, хаалганы дээктеп каан болган. Аслан маңын оожургатпайн шивээже халып кел-ле чыткан.

— Бо — Ак Кадайның ордузу-дур! — деп, Ол ырланган.
— Быжыг туттунуңар!

Дараазында карак чивеш дээр аразында оларга делегей аай-баш чок бир андарлы берген ышкаш сагындырган. Арзыландаа калып көрбээни шураашын калыры-бile белеткенгеш, шивээ ханазын дорт ажа шурай берген, ылавылаарга, ажыр ужа берген. Уруглар арай деп тыныш ап, Оон ооргазындан чүүдаа болза дириг-менди чуглуп бадып келгеш, көжээлер долдур турупкан даштар дөжей салган делгем иштики шөл ортузунда турарларын көрүп кааннар.



XVI

КӨЖЭЭЛЕР-БИЛЕ БОЛГАН ЧҮҮЛ

— КАНДЫГ КОНЧУГ ЭЛДЕПТИГ ЧЕР БООР! — ДЕП, Лүүси хөлзөп чугаалаан. — Яңзы-бүрү даш амытаннарының хөйүн! Музейде турар-даа дег бис.

— Кыш-ш — деп, Сүүзен сымыранган. — Асланның чүнү кылыш турарын көр даан.

Ийе, Ону көрзө чогуур турган. Аслан даш арзыланчे чаңгыс шурааш-ла, чеде халый бергеш, олче үрүпкен. Аслан ол дораан, бодунун кудуруун тудар дээн диис дег, дескинdir эргилгеш, сактыр болзунарза, даш арзыланчे ооргазын көзүлдүр каш базым черге турган даш гномче үрүпкен. Оон гномнуң артында даш кылдыр хуула берген бедик ыяш ээзиниң чанынче халый берген. Даши тоолайже үрер дээш кыдырынче ээпкен, оон он талазында ийи кижи-аскырже шурай берген. Ынчан Лүүси алгырыпкан:

— Ой, Сүүзен! Көр даан! Арзыланчे көр даан!

Оттуг-ыяшты шаккаш, солун үзүндүзүнгө дегзиштерге, чүү боорун көргөн боор силер. Баштайгы секундада чүү-даа болбайн турар ышкаш сагындырар, а оон солуннун кыдыры-бile чалбыштың чингэ агымы чалып чорупканын эскерип каар силер. Ол ышкаш чүүлдү ам олар көрүп турган. Аслан даш арзыланче үрүптерге, ак маны-даш оорганы дургаар хензиг алдын агым

маңнап ыңай болган. Агым калбара берген — сактырга, оттуң саазынны хөмө алры дег, арзыланы алдын чалбыш хөмө апкан ышкаш болган. Артықы даваннары биле кудуруу ам-даа даш хевээр турган, ынчалза-даа ол челин силгиптерге, бүгү аар даш дүргектер дириг агым бооп бада берген. Арзылаң улуг кызыл аксын ажыткаш, уругларны чылыг тыныжы-бile хөмө ап, таптырыганып эзээн. А оон артықы даваннарын база шимчеди берген. Арзылаң оларның бирээзин көдүргеш, дырангылаан-даа. Оон соонда Асланның көрүп кааш, соондан халып кәэп, улуг өөрүшкүден сыйыңайып, Оон думчуун чылгаарын оралдажып, Ону долгандыр шурап эгелээн.

Уруглар арзыландан көрүжүн чайладыр харык чок турган болбайн канчаар, а кажан олар ам-на эргилип кәэрge, оларның көрген чүүлү арзыланын уттур кылдыр албадапкан. Оларны долгандыр турган бүгү көжээлер дирип эгелээн! Иштики шөл ам музейге дөмей эвес апарган, ол ам зоопаркка дөмей ышкаш сагындырган. Асланның соондан самнап-шураан мөөң амытаннар кончуг дүрген халчып эгелээн болгаш, удавайн Ол Боду барык көзүлбестей берген.

Иштики шөл ам чөлээш ышкаш чузун-баазын өңнүг бооп көзүлгөн: кижи-аскырларның кылаң хүрөң быгыннары, чаңгыс-мыйыстарның көк мыйыстары, күштарның кылаңнааш чалгын-чүглери, дилгилерниң кызыл-сарыг кештери, ыттар биле кижи-хуналарның кызыл-хүрөң дүгү, гномнарның сарыг уктары болгаш кып-кызыл бедик бөрттери, хадың-кыстарның мөңгүн хептери, шиви-кыстарның — кылагар ногаан, дыткыстарның чырык ногаан, саргарып көстүр хептери. Ол бүгү өңнер маны даштың өлүг ак өңүн солупкан. А өлүг ыржымны солуп, өөрүшкүлүг киштээшкін, ээрги, ырланыышкын, мыжыраашкын, сыйылаашкын, мукулаашкын, даваннар даажы, алгыкышкы, каткы-итки болгаш ырыш-шоор дыңналып келген.

— Ой — деп, Сүүзен өскерли берген үн-бile чугаалаан.
— Көр даан! Бо... ол айылдыг эвес бе?

Лүүси Асланның кайгамчык улуг даш даг-кижинин будунче үрүп турарын көрүп каан.

— Кортпаңар! — деп, Аслан хөглүг ырланган. — Буттар шимчей бээрge-ле, арткан мага-бот соондан бүрүнү-бile катап аана апаар.

— Мен көңгүс өске чүве дугайында бодадым — деп, Сүүзен дунмазынга сымыранган.

А ам, Аслан ону төндүр дыңнаан-даа болза, кандыг-бир чүве кылышы орайтаан болган. Даг-кижи шимченип эгелээн. Оон моңун эктинге салып, караан дүрбээш:

— О-хо-хо! Мен удууп калган боор мен. Маңаа бир черге, мээн буттарым адаанга маңнап турган ырбысын Кара илбичи Кадай кайыл? — дээн.

Арткан амытаннар маңаа чүү болганын аңаа шупту та-йылбырлап эгелээн. Ол холун кулаанга дээскеш, бүгү чүвени эгэзинден эгелеп катап чугаалап бээрин олардан дилээн. Кажан ол чүү болганын ам-на билип каанда, бажын сараат сиғен бажындан бедивес хире чавыс мөгейгеш, дыкадыр хүлүмзүрбушаан, Асланның мурнунга бөргүн ужуулган. (Англияда ам даг-кижилер дыка эзвээш боорда, оларның аразында эки аажы-чаңыглары аажок ховар таваржып турар, ынчангаш мөөрөй салып маргыжып боор мен — хүлүмзүрүп турар даг-кижини кажан-даа көрбээн силер. А ону көрзэ эки!)

— Че, шивээниң иштин хынаал көөр үе келген-дир — деп, Аслан чугаалаан. — Шымдаңар, өнүүктер, шупту барыңар. Адаандан үстүнгэ чедир бүгү булуңнарын база ээзинин удуур өрээлин үжеп-чиндицер. Кандыг-бир салымы багай туттурукчу кайда турup болурун кым билир боор.

Олар шивээниң иштинче кире халышкан. Үр үеде бүгү караңгы, коргунчуг, дунааргай эрги шивээгэ ажыдып турар соңгалар ыды болгаш «Кара-бажыңын утпанар...» — «Бо эжикти ажытчып көр...» — «А бо база бир ээрилчек чада тур...» — «Ой, көр даан, мында кенгүрү тур, хөөкүйнү... Асланның кый дептицер!..» — «Фу, ышкам деп чувезин!.. Утче дүжүп кире бердинер халак... Эй, үстүнде кым барыл?! Мында, чада шөлүнде, олар эмгежоктур!» — деп кый дишкен үннөр дыңналып турган. А кажан Лүүси:

— Аслан! Аслан! Мен дээрги Тамнусту тып алдым! Ой, ынаар дүрген бараалы! — деп алгырып маңнап кээрge, өөрүшкүнү чүү дээр!

Үр болбайн Лүүси биле бичии кижи-хуна, холдарындан туттунчупкаш, хөглүг самнап эгелээн. Магалыг эки кижи-хунага ону даш көжээ кылдыр хуулдурупканы бичии-даа хора халдат-паан, ол дугайында кижи-хуна чүнү-даа сагынмайн турган болгаш, Лүүсинин чугаалаан чүүлүн улуг сонуургал-бile дыннаан.

Адак соонда өнүүктер Ак Кадайның шивээзин үжеп-чиндириин соксап каан. Шивээ ээн, эжик-сонгазын аңгайтыр



ажыдып каан турган, чырык болгаш чаагай чыттыг часкы агаар шаандан бээр кирип көрбээни бүгү дүмбей, дүндүгүр булуңнарны дола берген. Асланның хостап кааны шупту туттурган амытаннар шивээде иштики шөлчө сөктүп үнүп келген. Ынчан оларның бирээзи, Тамнус ышкаш, мынча дээн:

— А моон канчап үнер бис?

Аслан хананы ажа шурай берген болгай, а хаалга дээктиг хевээр турган.

— Че, ол-даа белен — деп харылааш, Аслан бүткүр боду туруп келгеш, даг-кижиже алгырган: — Эй!.. Сен — үстүнде кижи! Адын кымыл?

— Рамбл-баффин дээр, мындаагылар силерниң чөвшээрэлинер-бile — деп, бөргүн ужулбушаан, демгизи харылаан.

— Кончуг эки-дир, Рамбл-баффин — деп, Аслан чугаалаан.
— Бисти моон үндүрүп көр.

— Ынчанмайын канчаар, мындаагылар. Улуг күзелдиим-бile — деп, Рамбл-баффин чугаалаан. — Хаалгадан ыңай туруңар, чыкпактар.

Даг-кижи хаалгага чеде бергеш, бодунун кончуг улуг мону-бile улдап-ла эгелээн: тук! тук! тук! Баштайгы согудан хаалга кызырткайны берген, ийигизинден — дызырткайны берген, үшкүзүнден — буступ калган. Ынчан ол суургаларны улдап эгелээн, каш минута эрткенде, суургалар болгаш олар-бile тудуш хана кезектери черже чыжырадыр кээп дүшкеш, бузундулар оваазы кылдыр хуула берген. Кажан доозун дүжүптерге, даштан бүткен, чангыс-даа сижен үнмээн иштики шөлдүң ортузунга тура, ханада дэжик чер ёттүр ногаан шынаа-шыктарны, хатка калбан наан ыяштарны болгаш аргада кылаңнаан дамырак сугларны, а арга ындында — ак-көк даглар биле оларның кырында дээрни көөрү дыка-ла элдептиг болган.

— Бүгү бодум суг дер дүштүм — деп, паровоз ышкаш эгиштевишаан, даг-кижи чугаалаан. — Күш-шыдалым шоолуг эвес хире. Кызыжактар, силерде думчук аржылы бар бе?

— Менде бар — деп, бут баштап турбушаан база холун бар шаа-бile өрү сунумушаан, Лүүси чугаалаан.

— Четтиридим, дунмакым — деп, Рамбл-баффин чугаалааш, ээгип келген.

Дараазында минутада Лүүси даг-кижиниң улуг-эргээ биле айтыр-салаазының аразында кыстыртып алгааш, агаарже ужукуп үнүп бар чыдарын эскерип каан. Харын-даа, уругну оондаа бедидир көдүрүпкеш, демгизи хенертен сырбаш дээш, ону черже камныг салбышаан:

— О, ёршээ... Ургунун бодун тудуп алган ышкажды мен... Буруулуг болдум, дунмакым, мен силерни думчук аржылы деп бодадым — дээн.

— Чок, мен аржыыл эвес-тир мен — дээш, Лүүси каттырыпкан. — Ол бо-дур.

Бо удаада Рамбл-баффин аржыылды тудуп апкан, ынчалза-даа аңаа уругнуң аржыылы дөмөй-ле әлезинчигеш ышкаш болган, ынчангаш, оон қызыл арнын шыңгызы кончуг хевир-бile дүрбүп олуарын көргеш, Лүүси мынча дээн:

— Силерге оон ажыы чок боор деп бодаар-дыр мен, дээрги Рамбл-баффин.

— Черле ындыг эвес, черле ындыг эвес — деп, даг-кижи әэлдек харылаан. — Ындыг чараш аржыылчыгаш кажан-даа көрбээн мен. Ол хире чымчак, ол хире элтиг. Ол хире... ону кан-чаар чугаалаарын билбес-даа-дыр мен.

— Даг-кижи шынап-ла аянныг-дыр! — деп, Лүүси дээрги Тамнуска чугаалаан.

— Шын-дыр! — деп, кижи-хуна харылаан. — Баффиннер дөгере ындыг болур. Даг-кижилерниң Нарнияда эң-не хүндүктелдиг төрел салгалдарының бирээзи-дир. Хөлүн эрттир угааныг эвес бооп чадавас — мен угааныг даг-кижилерге ам-даа таварышпаан мен — ынчалза-даа бурун төөгүлүг төрел салгал. Чаагай өг-буле чаңчылдарлыг. Чүнү чугаалаксаанымны билип тур сiler бе? Ол бак кижи турган болза, Ак Кадай ону даш кылдыр хуулдурбас ийик.

Ол өйде Аслан мурнуку даваннарын часкапкаш, шупту амытаннарны ыржымны сагырынче кыйгырган.

— Бөгүн кылыр ужурулуг бүгү херектеривисти ам-даа чедир кылбаан-дыр бис — деп, Ол чугаалаан. — Удуу чыдыптар бетинде, Ак Кадайны тиилээр дээр болзуусса, тулчуушкун кайда чоруп туарын доп-дораан тодарадыр херек.

— Оон тулчуп кирилтеривиске идегедим — деп, эң улуг кижи-аскыр немеп каан.

— Ынчанмайн канчаар — деп, Аслан чугаалаан. — Че, шимчеп үнүптээли! Дүрген маңнап албастар — уруглар, гномнар, бичиижек аң-мен шыдаарларны — арзыланнар, кижи-аскырлар, чаңгыс-мыйыстар, аyttar, даг-кижилер болгаш эзирлерни мунуп алзын. Чытчы амытаннар дайзыннарның изинге дүрген-не таваржыр дээш, арзыланнар бистер-бile мурнунга кады чорупсун. Чеве, бөлүктөргө дүрген хувааттынып алынار.

Алгы-кышкы, дүвүрээзин көдүрлүп үнген. Ийги арзылаң кымдан артык хөлзеп турган. Ол бир бөлүктөн өске бөлүкчө,

аажок чай чок бооп көстүп, а херек қырында чүгле мыя мону айтырап дээш, кеже маңнап турган:

— Асланның чүнү чугаалаанын дыңнадыңар бе? «Арзыланнар бистер-бile». Оон-бile база мээн-бile дээни ол-дур. «Арзыланнар бистер-бile». Мен Асланга ол дээш чүден артык ынак мен. Бичии-даа адыйыргавас, хоолургавас. «Арзыланнар бистер-бile». Оон-бile база мээн-бile дээни ол-дур.

Аслан хөлзеп-шуугаан арзыланчэ үш гном, ыяш ээзи кыс, ийи тоолай болгаш чараа-чеченни олуртуп кагыжеге чедир, ол чугаазын катаптап-ла турган. Чүгү харын ону бичии оожургадыпкан.

Шупту амытаннар белен апаарга — шынын чугаалаар болза, бүгү амытаннарны туруштарын ёзугаар хуваар талазы-бile Асланга кадарчы ыт дузалашкан — олар ханада дежик чедамчыштыр орукче үнүпкен. Баштай арзыланнар биле ыттар бир таладан өске талаже дүвү-далаш чыттап халып турган, а оон бир сүрүкчү ыт ээр берген — иске таварышканы ол. Оон соонда чаңгыс-даа минута хей эртпээн. Арзыланнар, ыттар, бөрүлөр болгаш өске-даа араатан аннар думчуун черже халайтып алгаш, бурунгаар маңнажып ыңай болган, а арткан амытаннар, оларның соонда бүдүн километр ажыг черде шөйлү берген, арай деп четтигип чораан. Дилги аннаары чоруп турар деп бодап болур, чүгле мыйыс эдискилер үнүнгө ында-хаая ийги арзыланың ырланыры азы Асланның Бодунун оон-даа чоон, оранчок түрлүг ырланыры каттыжып турган. Ис улам-на көсүкү апар чыткан. Истеп сүргеннер улам-на дүрген маңнажып орган. А оон олар кызаа чооганың сөөлгү ээр черинге чоокшуулап келгенде, Лүүси чаа ыттар — алгы-кышкы болгаш демирниң демиргэ кыжыраарын дыңнап каан.

Шак ынчан чооганың ужу келген, а Лүүси ол ыттар кайыын кээп туарын билип каан.

Питер, Эдмунд болгаш Асланның шерии Лүүсиниң эрткен дүне көргени коргунчуг маңгыстарның шаарланчак мөөң болуунгэ удур бар шаа-бile дайылдажып турган, чүгле ам, хүн чырыында дайзыннар оон-даа коргунчуг, дүрзүнчүг болгаш өжээннег кылдыр көзүлгөн. Олар дыка хөй апарганын Лүүси эскерген. Ынчарга Питерниң шерии — а Асланның кезек оларның артындан чедип келген — аажок эвээжеп калган болган. Чадайын шөлүн көжээлер шыва алган — Ак Кадай илбилиг мергезин ажыглап-ла турган хире. А ам, бүгү чувениң аянын бодаарга,

ол мергезин ажыглавайн баргаш, даш бижээ-бileе чаалажып, бо удаада Питерге удур сокчуп турган. Олар аажок кадыг-дошкун тулушканындан Лұуси чүү болуп турар аайын арай деп-ле тып четтигип турган. Бижек биле хылыш дыка дүрген караңайнчып, хары угда үш бижек биле үш хылыш месилдешкен ышкаш сагындырган. Ийи дайынчы шөл ортузунда тутчуп турган. Лұуси кайнаар-даа көөрге, кадыг-дошкун сегиржип алышыкын бүгү талада киткәэн.

— Шурай берицең, уруглар — деп, Аслан алғырарга, угашкылар Оон ооргазындан дүже халышкан.

Барының чүкте фонарьлыг адагаштан эгеләәш, чөөн чүктө далай эриинге чедир бүгү Нарнияны серт кылындыр ырланып-каш, аажок улуг Арзылаң Ак Кадай же шурай берген. Карак чивеш дәэр аразында Лұусиниң мурнунга Кара илбичи Кадайның Асланче өрү алзы угланган, аажок коргуп база элдепсинген арны шывараш кылынган. А оон Ак Кадай биле Арзылаң черге дүргектелдир аңдаштанып эгеләэн. Ынчан Асланның Шулбус Кадайның шивәэзинден эдертип эккелген бүгү амыйтаннары дайынчы алғы-кышкы-бileе дайзынче халдал кирипкен. Гномнар — дайынчы балдыжыгаштар, даг-кижи — аар мон (буттары-бiledаа ол хөй-ле дайзынны чылча базып каапкан), кижи-асқырлар — хылыштар биле дуюглар, ыттар — диштер, чаңгыс-мыйистар — мыйистарын ажыглаан. Питерниң могап-турупкан шерии «Ура!» деп алғыржы берген, дайзыннар сыйылашкан, чаа келгеннер алғыржып, ырланып, мөөрешкен — бүгү арга-эзимниң бир кыдыындан өске кыдыынга чедир тулчуушкуннуң коргунчуг дааш-шимәени дыңналып турган.



XVII

АК ИВИНИ СҮРГЕНИ

ЭЛЭЭН КАШ МИНУТА БОЛГАШ, ТУЛЧУУШКУН доозулган. Дайзыннарын хөй кезии Асланның шерииниң баштайгы хөме таварышкының үезинде кырлып калган, а дириг артканнары Ак Кадайның өлгенин көргеш, дезипкен азы дүжүп берген. Оон ам Аслан биле Питер бот-боттарының холдарын дыңзыг тутчуп мендилешкен. Лұуси Питерни амгы ышкаш кылдыр кажан-даа көрүп көрбәэн: оон арны агарып, шынгызырай берген, ол бодунун хар-назындан оранчок улуг ышкаш сагындырган.

— Бис Эдмундуга өөрүп четтирер ужурлуг бис, Аслан — дәэн Питерниң сөстерин Лұуси дыңнап каан. — Ол эвес болза, чылча шаптырар ийик бис. Ак Кадай бодунуң мергезин он-солагай талаже чайып-ла турду, бистиң шериивис даш кылдыр хуулуп-ла турду. А Эдмундуну чүү-даа чүве доктаадып шыдавады. Ак Кадайга чедер дәэш, оон оруун дуглаан үш магачыны ол узуткап кагды. Ак Кадай леопардтарыңың бирәэзин даш



— Лүүси, дүргеде — деп, Аслан чугаалаан.

Ынчан Лүүси хенертер Соок-Ирейден белек кылдыр алганы эмниг ханды дугайында бир дугаар сактып келген. Уругнуң холдары аажок сирилеп, шил аксын уштуп чадап шаг болган, а оон ам-на ажыдыпкаш, каш дамдыны ақызының аксынче кудупкан.

— Бисте өске балыглатканнار хәй-дүр ийин — деп, Аслан уругга сагындырган, а Лүүси Эдмундуңуң ак тос арнынчесалдыкпайн көрүп, ханды аңаа дузалаан ирги бе деп бодап туруп берген.

— Билир мен — деп, Лүүси четтиктейн харыылаан. — Бичии манап көр.

— Еваның кызы — деп, Аслан улам шыңгыны катаптаан.

— Өскелер база өлүрүнүң кырында турар-дыр. Эдмунд ужун оларның чежези ам өлүр ужурлугул?

— О, Аслан, мени өршээп көрем — деп, Лүүси турбушаан чугаалааш, Оон-бile кады чорупкан.

Дараазында чартык шакта олар ажыл-херек кылып: уруг — балыглатканнарны, Аслан — даш кылдыр хуулдурғаннанрытынгарып чоруп турган. Кажан Лүүси ам-на хосталы берип, Эдмунду же эглип кәэрge, ол бут кырында туруп келген, балыглары экирий берген болган. Уруг ақызының ындыг кайгамчык эки аян-шинчилиин шагдан бәэр, дыка үр көрүп көрбәэн. Шынын чугаалаар болза, оон школаже барып эгеләэн хұнұнден бәэр. Ылап-ла аңаа, шак ол аажок багай школага ақызы шын оруктан өскәэр барған болгай. А ам Эдмунд катап база биеэги боду апаратып, улус караанче дорт көрүп шыдаар болу берген.

Оон аңаа-ла, чаа-дайын шөлүнгө, Аслан Эдмундуға хұндулұғ ат-дужаал тывыскан.

— Сонуурғанчының аа — деп, Лүүси уғбазынга сымыранған, — Аслан ону дәэш канчанғаның Эдмунд билир ирги бе? Аслан Ак Кадай-бile шынап-ла чүнүң дугайында дугуржуп турған дәэр сен?

— Кыш-ш... Чок. Билбес болбайн канчаар — деп, Сүүзен чугаалаан.

— Чүү деп бодаар сен, аңаа чугаалаар бис бе? — деп, Лүүси айтырган.

— Чок болбайн канчаар — деп, Сүүзен харыылаан. — Ону билип аары аңаа дықа берге болур. Оон орнунга турған болзуңза, бодуңнүң канчап баарыңы бодап көр даан.

— Індиғ-даа болза, ол билген турар ужурлуг — деп, Лүүси чугаалаан.

Бінчан оларның чугаазы үзе кирдирипкен.

Ол дүне олар дайын-чаа шөлүнгө удууп хонған. Аслан бұгү амьтандарны канчап чемгерип шыдапқаны билбес мен, канчаарга-даа, кежәекиниң сес шак үезинде олар шүпту оътсигенде шайлап олурған. Даартазында олар улуг хемниң кыдыны дурғаар чөөн чүкчө шиглей шимчеп үнүпкен. База бир хұн болғаш, кежәэлкітей хемниң аксынга келгеннер. Оларның кырында улут эвес тейде турар Кәр-Паравел шивәәниң суурғалары бедип турған, а оларның мурнунда элезиннің бүүрелчиннер дестейип, ында-мында элезин-кум аразында хаялар, дустуг сүглуг хөөлбекчигештер болғаш суг үнүштери көзүлген. Далаизыг чыт айдызылып, эрикчө төнмес-батпас көк-ногаан чалғыглар сүрүштүр чуглуп-ла турған. А ак-кусуннанарның алғырарын чүү дәэр! Кажан-бир шагда оларны дыңдаан сiler бе? Оларның канчаар алғырарын сактыр-дыр сiler бе?

Кежәеки чем соонда дөрт уруг катап база далайже баткаш, майыктааштар болғаш уктарын уштуп окталкаш, элезин сүзүп, кызыл-даван маңнажып эгеләэн. А дараазында хұн оон артык байырлалдыг болған. Ол хұн Кәр-Паравелдин Улуг Залынга — чаан сөөгүнден кылған дәэвирилиг, чөөн талакы ханада дорт-ла далайже үнген эжиктig болғаш алдын-доос чүглери-бile каастаан барыын талакы кайгамчык залға — оларның бұгү эш-өөрү кады турда, трубалар дыңзыг этсип үдең турда, Аслан уругларны хааннаар кылдыр дүжүлгеге саадаткан. «Питер хаан делгерезин! Сүүзен кадын делгерезин! Эдмунд хаан делгерезин! Лүүси кадын делгерезин!» — деп кулак уюқ алғы-кышкыга үдеткеш, Аслан оларны дөрт дүжүлгеге эккелген.

— Адамның оолдары, Еваның кыстары! Кым Нарнияга оода чаңгыс хүн хаан азы кадын болғаныл, ол маңаа кезээ шагда хаан азы кадын бооп артар. Силерге хұләэткен алдар-хұндұнұ төлептіг чүктенер — деп, Арзылаң чугалаан.

Чөөн талакы ханада аңгайтыр ажыдып каан әжик өттүр далай әэлериниң үннери дыңналған. Олар Нарнияның чаа чагырықчыларынга мактал ыrlаар дәеш әрикче choокшуладыр әштип келген чүве-дир.

А оон уруглар дүжүлгелерге саадапкан, оларның холда-рынга дүжүлге демдә мергелерни тутсуп берген. Олар ботта-рының дайынчы әштери: кижи-хуна Тамнус, әжеш кундустар, кайгамчык улуг Рамбл-баффин болғаш леопардтарға, кижи-асқылар болғаш гномнарга, даш қылдыр хуулдуртулкан ар-зыланға шаңналдар үлеп әгеләэн. Ол дуне Кәр-Паравелге улуг байырлал болған — әртенге chedir найырлап-дойлап, самнап-хөглеп келгенинер. Алдын кундагалар чайынналып, арага хем суу дег күттунуп турган, шивәде дыңналған хөгжүмгे харыы қылдыр далай әэлериниң кайгамчыктыг, тааланчыг болғаш кударанчыг хөгжүму оларга дыңналып кәәп турган.

Ол бұғы хөгләәшкин болуп турда, Аслан шивәэден бұдүү чылбыртып үне берген. Уруглар ону әскерип кааш, чүү-даа ди-вәэннер, чүгө дәәрге дәәрги Кундус оларга сагындырып каан турган:

— Аслан бодунуң туразы билип chedip кәэр база чоруй баар. Бөгүн Ону көөр силер, а даарта көрбес силер. Ол чаңгыс черге ижигер хөңнү чок... оон ыңай, билдингир херек, Оон



корум-чурум тургузар ужурлуу өске чурттар хөй-ле болгай. Са-ғыш човаваңар. Ол силерге кәәп каап турад. Чүгле Ону албадаан херә чок. Ол дәәрге холга өөрентген арзылаң әвес ышкаждыл. Ол черле черлил Арзылаң болгай.

Көрүп тур силер, бистиң төөгүвүс барык-ла — ынчалза-даа шуут база әвес — төңчүзүнде chedip келген-дир. Иий хаан биле иий кадын боттарының чуртун эки башкарып турган. Оларның хааннаашкыны үр болғаш амыр-чыргалдыг болған. Баштай олар Ак Кадайның дириг арткан талалакчыларының, узуткаар дәеш хөй үе чарыгдан. Эән булуңнарда чиир-тим маңғыстар оон-даа үр чаштынып чоруп турган... Бир чер-ге чылбыра-кадай, өске черге магачын-даа көстүп кәэр-ле. Бир черге кижи-бөрү көзүлген-даа боор-ла, а өске черге кыс бажың әәзи — четкөр дугайында чугаа-даа үнген боор-ла. Ынчалза-даа адак соонда бұғы хоралыг амьтандырып шыдааннар. Уруглар чөптүг хоойлулар үндүрүп, Нарнияга корум-чурумну тудуп, эки ыяштарны хей кеспезин дәеш харагалзап, бичии гномнарны база кижи-хуналарны школага немелде өөредилгеден хостап, өскениң херәэнче холгаарлаар, кожаларынга хора халдадып, киришпеске киржир амьтандарның шуптузун кезе-дип, а ак сеткилдиг болғаш тайбың чурттаап, өскелериниң чурт-талгазынга шаптык катпастарға дузалажып турган. Нарнияның соңғы қызыгаарын үреп кирип диттиккен бак сагыштыг даг-кижилерни (Рамбл-баффинге шуут дөмей әвес аан) сывырып чорудупканнар. Далай ындының чурттары-бile эп-найырал харылзааларын быжыглаары-бile эвилелдер тургузуп, ынаар дәәди деңнелдиг аян-чоруктар қылып, боттарынга байырлалдыг хұләәп алышкыннар чорудуп турганнар.

Чылдар әртип-ле турган. Уруглар боттары база өскер-лип әгеләэн. Питер узун делгем әгиннег аныяк эр, эрес-дидим дайынчы апарған, ону Өндүр-бедик хаан деп адай берген. Сүүзен хөнү сыйныг, әәжекке чеде бәэр чыгысы кара чаштыг чараш аныяк херәэжен апарған, далай ындының чурттарының хааннары боттарының әлчиннерин Нарния же үзүк-соксаал чок чорудуп, ону кудалап-ла турган. Ону Чаагай сеткилдиг кадын деп адап каан. Питерге көөрде, Эдмундуң аажы-чаңы бодамчалыг болғаш оожум болған. Ону Чөптүг хаан деп адап каан. А алдын чаштыг Лүүси үргүлчү хөглүг көстүр, ынчангаш кожа тажылар шупту ону кадай қылып алысаар турган, а Нарнияның чону ону Эрес-дидим кадын деп адап алған.

Олар ынчалдыр — өөрүшкүлүг болгаш аас-кејиктиг чурттап, хеп шкавының ындыы талазында боттарының биеэги чуртталгазын, бистиң дүжээн дүжүвүстү сактырывыс дег, чүгле ынчаар сактыр турганинар. Оон бир катап Тамнус — ол ынчан улгады берген база чооннап калган турган — оларның черинде Ак Иви катап база көстүп келген деп медээ эккелген. Ол Ивинани тудуп апсызарза, силерниң бүгү күзелдеринерни күүседип бээр дээрзин утпаан боор силер. Ийи хаан биле ийи кадын болгаш оларның чоок хүрээлэшкени барыны талакы арга-эзимче аң-наашкын кылып, аңчы ыттар тудукчуларынга болгаш аңчы мыйыс эдискилерлиг аңныыр даамалдарынга үдеткеш чорупканнар. Удавайн олар Ак Ивинани көрүп каан. Ооң соондан шыргай аргалап орук-чирик шиливейн халдып ыңдай болганинар. Оларның чоок хүрээлэшкенинин альттары пат турупкан, чүгле хааннар болгаш кадыннар Ивинани соондан кончуг дүрген маннадып органинар. А оон олар ивинани альттар эртип шыдавас шырышче чаштына бергенин көрүп каан. Ынчан Питер хаан мынча дээн (олар ам көңгүс ёске аян-бile чугаалажыр апарган, чүгэ дээрге үр уде кадыннар болгаш хааннар болуп келген турганинар):

— Дунмаларым, альттардан дүжүп аалы, чүгүрүктери-висти маңаа каалкаш, бо ивинани чадаг сүрүп чоруптаалыңаар, чүгэ дээрge назыным дургузунда мындыг шевергин аң аңнап көрбээн-дир мен.

— Дээрги хаан! — деп, олар харыбылаан. — Сээн күзел-соруун ёзугаар болзунам.

Оон олар чадаглангаш, альттарын ыяштарга баглап кааш, арганың шыргайынче базып кирилкеннер. Олар ынаар ханылап четтикпээнде, Сүүзен кадын мынча дээн:

— Эргим эш-өөр, бистиң мурнувуста кайгамчык чүүл тур! Көрүнер даан: бо ыяш демирден бүткен-дир!

— Дээрги кадын! — деп, Эдмунд хаан чугаалаан. — Бир эвес топтап көөр болзунарза, ол болза бажында фонарь азып каан демир адагаш дээрзин көрүп каар силер.

— Арзылаң чели-бile аашкынып тур мен, дыка-ла элдеп-тир — деп, Питер хаан чугаалаан. — Фонарьны ындыг чөрье канчап тургузар боор. Мында ыяштар ону бүгү таладан сырый бү-ээзлөп, оларның будук-бүрүзү оон кырынче дыка бедидир көдүрлүп, ону кыпсып каар-даа болза, оон чырыын кым-даа эскербес-тир.

— Дээрги хаан — деп, Лүүси кадын чугаалаан, — бодап көөрге, демир адагашты тургузуп турда, мында ыяштар эвээш болуп, шаараш үнүп азы шуут үнмейн турган-дир. Бо арга чаа үнгөн, а адагаш эрги-дир.

Оон олар шупту адагашты топтап көрүп эгелээн. Оон Эдмунд хаан мынча дээн:

— Чүгэ ындыг дээрзин билбес мен, чүгле фонарь биле адагаш сеткилимде бир-ле элдептиг минниишкенни оттуруп тур — бо ышкаш бир-ле чүвени дүжүмде азы дүжеп чыдарым дүште көргөн дег-дир мен.

— Дээрги хаан — деп, олар аңаа харыбылаан, — бис база шак-ла ындыг сеткилгэ алзып тур бис.

— Харын-даа — деп, Лүүси кадын чугаалаан, — бир эвес бо фонарьлыг адагаш артынче эрте бээр болзуувусса, бисти кайгамчык ужууралдар азы салым-хуунун бүрүн өскерилгези манап турар деп бодал менден адырылбайн тур.

— Дээрги кадын — деп, Эдмунд хаан чугаалаан, — мээн сагыжым база ону эндевейн тур.

— Мээзии база, эргим дунмам — деп, Питер хаан чугаалаан.

— Мээзии база — деп, Сүүзен кадын каттышкан. — А ындыг болганды, альттарывысче эглирин, Ак Ивинани оон ыңдай суу рбезин сүмелеп тур мен.

— Дээрги кадын — деп, Питер чугаалаан, — сенээ удурланырын чөпшээреп көрем. Нарнияны дөртөлээ чагырып эгелээн үөвистен бээр чаңгыс-даа катап кандыг-бир чаагай херек — тулчуушкун, дайынчылар мөөрэйи, чөптүг шииткел херээ азы ёске-бир херек эгелеп алгаш, ара соксаанывыс таварылга туруп көрбээн. Харын-даа, эгелеп алган бүгү чүүлүвүстү эчизинге чедирип турган бис.

— Угбай — деп, Лүүси кадын чугаалаан, — мээн хаан акым чөптүг сөстер чугаалады. Багай чүве оштааш азы коргууш-кунуус дээш дедир ээп, мындыг тулган олчаны ышкынып аар болзуувусса, биске ыянчыг болур деп бодаар мен.

— Силерлер-бile чөпшээрежип тур мен — деп, Эдмунд хаан чугаалаан. — Оон кадында бо бүгүнүн утказын билип аар күзел мени хаара тудуп тур. Нарнияда азы Ортуулуктарның шуптузунда бар эц улуг эртине дээш безин мен бодум турам-бile дедир эгбес мен.

— Ындыг болза, Асланның ады алдаржызын — деп, Сүүзен кадын чугаалаан. — Силерлер шупту ынчаар бодап


турар болганыңарда, бурунгаар чоруптаалы база бисти манап турар ужураддарга таварышкаш, аткаарлаваалы.

Оон кадыннар болгаш хааннар эң шыргай черже кире берген. Олар он базым безин кылып четтикпейн, боттарының мурнуунда көрүп турары чүүлдү фонарлыг адагаш дээрин сактып келгеннер, а база он базым кылгаш, будуктар эвес, а алгы тоннаар аразы-бile арай деп эртип бар чыдарын ожаап билип кааннар. Дараазында минутада олар хеп шкавының эжикчигежинден бөлүү-бile үне халышкаш, ээн өрээлде турар апарганныар. Ам олар аңчы хеп кеткен хааннар болгаш кадыннар эвес, а анаа-ла Питер, Сүүзен, Эдмунд болгаш Лүүси боттары анаа хеви-бile болганныар. Оларның хеп шкавынче Макриди угбайдан чаштына бергени ол-ла хүн, ол-ла шак хевээр. Макриди аян-чорукчулар-бile эжик ындында коридорда ам-даа чугаалажып турган. Аас-кежик бооп, демгилери ээн өрээлче кирип, аңаа уругларның кырынга барбаан.

Бо төөгү оон-бile төнүп каап болур ийик, чүгле уруглар хеп шкавындан дөрт тоннуң кайнаар чиде бергенин профессорга тайылбырлаар ужурууун билип турган. А профессор — ылап-ла кайгамчык кижи аа! — мелегей чүве чулчурбазын база хоозун чүве чогаатпазын оларга чугаалаваан, харын-даа, олардан дыннаан бүгү чүвэзинге бүзүрөй берген.

— Чок — деп, ол чугаалаан, — тоннаар ап аар дээш хеп шкавын дамчыштыр эртерин оралдажыры кандыг-даа ажык-дуза чок деп бодаар мен. Ол орук-бile силер ам Нарния же оон ыңай кирип шыддавас силер. Тоннарны ап алыр-даа болзунарза, ам оларның ажыын көөрү берге боор. Чүүже? Ийе, кажан-бир ынаар барып болбайн канчаар силер. Нарнияның хааны турган кижи кезээ шагда Нарнияның хааны бооп артып каар. Ынчалза-даа чаңгыс-ла ол орук-бile ийи катап эртерин оралдашпаңар. Черле ынчаш ынаар чеде бээрин шеневендер. Барык-ла манавайн турундарда, ол чайгаар болу бээр. Нарния дугайында араңарда безин хөй чүве чулчурбандар. Чугаалажып турар улузуңар база-ла шак ындыг ужураддар эрткен деп бүзүревээн шааңарда, кымга-даа ону чугаалаванар. Чүүже? Ону канчап билип каар силер че? О, билип каар силер, чигзинмейн көрүңер. Чугаалай бээри элдеп-тиг төөгүлер, безин көрүжү оларның чажыдын өчүп берилтер. Карактарыңар ажык болзун. Амгы школаларда боларны та чүү чүвеге өөредип турар чүвел?!

Ам-на бис хеп шкавынга болган ужураддарның эң-не төнчүзүнгө чедип келдивис. Ынчалза-даа профессор часпаан болза, Нарнияга ужураддарның ол чүгле эгези-дир.



ДОПЧУЗУ

I

Лүүсиниң хеп шкавынче бакылааны / 6

II

Лүүси ол черден чүнү тып алганыл / 12

III

Эдмунд болгаш хеп шкавы / 21

IV

Рахат-лукум / 28

V

Ам база шкафтың кижилер
ораны талазында / 36

VI

Аргаже / 44

VII

Кундустар-бile кады эрттирген хүн / 51

VIII

Дүштеки чем соонда чүү болганыл / 60

IX

Ак Кадайның ордузунда / 68

X

Кара илби-шиди күжүн
чиририп эгелээн / 76

XI

Аслан чоокшулап кел-ле чыдар / 84

XII

Питерниң бирги тулчуушкуну / 92

XIII

Үе-дүптүң Чажыт Билди-билии / 99

XIV

Ак Кадайның тиилелгези / 107

XV

Үе-дүптүң-даа мурнундагы
Чажыт Билди-билиг / 116

XVI

Көжээлер-бile болган чүүл / 123

XVII

Ак Ивини сүргени / 131

